

MATEO ITSIRINKAKOTAKERI JESOKIRISHITO TYARA IKANTA YOGAVISAAKOTANTIRA

*Yashikiiganakeririra Jesokirishito
(Ir 3.23-38)*

¹ Maika nontsirinkakogetakero ivairopage pairaninirira yashikiiganakeririra Jesokirishito. Irirori inti iyashikiiganakerira Averan intiri Iravi.

² Antari okyara yogari Averan itomintakari Isaako.*
Irirokya Isaako itomintakari Jakovo.*

Irirokya Jakovo itomintakari Jora intiegiri irirentiegi.*

³ Irirokya Jora itomintakari Parese intiri Sari.
Ogari iriniro opaitaka Tamare.

Impogini Parese itomintakari Eserome.

Irirokya Eserome itomintakari Arame.

⁴ Irirokya Arame itomintakari Aminaravo.

Irirokya Aminaravo itomintakari Naason.

Irirokya Naason itomintakari Sarimon.

⁵ Irirokya Sarimon itomintakari Voose. Ogari iriniro opaitaka Iraava.

Impogini Voose itomintakari Oveti. Ogari iriniro opaitaka Irote.

Impogini Oveti itomintakari Isai.

* **1:2** Jen 21.1-3 * **1:2** Jen 25.21-26 * **1:2** Jen 35.22-26

- 6** Irirokya Isai itomintakari Iravi pegan-kicharira igoveenkariegite iseraereegi.

Irirokya koveenkari Iravi itomintakari Saromon. Ogari iriniro Saromon onti yagavetarira Oriashi.

- 7** Impogini Saromon itomintakari Irovoame.

Irirokya Irovoame itomintakari Aviashi.

Irirokya Aviashi itomintakari Asa.

- 8** Irirokya Asa itomintakari Josapate.

Irirokya Josapate itomintakari Jorame.

Irirokya Jorame itomintakari Osuashi.

- 9** Irirokya Osuashi itomintakari Joatame.

Irirokya Joatame itomintakari Akase.

Irirokya Akase itomintakari Esekiashi.

- 10** Irirokya Esekiashi itomintakari Manaseshi.

Irirokya Manaseshi itomintakari Amon.

Irirokya Amon itomintakari Joseashi.

- 11** Irirokya Joseashi itomintaigakari Jekoniashi intiegiri irirentiegi impo yamaiganunkani maganiro iseraereegi Vavironiaku.*

- 12** Impogini yogari Jekoniashi itomintakari Saratieri.

Irirokya Saratieri itomintakari Sorovaveri.

- 13** Irirokya Sorovaveri itomintakari Aviote.

Irirokya Aviote itomintakari Eriakime.

Irirokya Eriakime itomintakari Asoro.

- 14** Irirokya Asoro itomintakari Saroko.

Irirokya Saroko itomintakari Akimo.

Irirokya Akimo itomintakari Eriote.

- 15** Irirokya Eriote itomintakari Ereasaro.

* **1:11** 2 Kov 24.14-15

Irirokya Ereasaro itomintakari Matan.

Irirokya Matan itomintakari Jakovo.

¹⁶ Irirokya Jakovo itomintakari Jose. Ogari itsinanetsite Jose opaitaka Maria. Irorori onti iriniro Jeso ikantaganirira aikiro Kirishito.*

¹⁷ Maganiro tsirinkakoigankicharira ivairopage aka ikaravageigake 14 itsititapanutara itimakera Averan ikaravagetake itimakera Iravi. Ario ikañoigaka aikiro maganiro tsirinkakoigan-kicharira ivairopage itsititapanutara itimakera Iravi ikaravagetake yamaiganunkanira Vavironiaku ikaravageigake 14. Impo ario ikañoigaka aikiro maganiro tsirinkakoigankicharira ivairopage itsititapanutara yamaiganunkanira Vavironiaku ikaravagetake itimakera Kirishito ikaravageigake 14.

Imechotakera Jesokirishito

(Ir 2.1-7)

¹⁸ Maika nonkenkitsatakotakeri Jesokirishito tyara ikantaka ikyasanokyara ipokutira aka kipatsiku imechotakera. Pairani otimake tsinane opaitaka Maria. Inti kashigakaro surari ipaita Jose. Impo tekyara iragero itimake otyomiani, intitari timakagakeri Isure Tasorintsi. ¹⁹ Yogari Jose ikogavetaka irapakuanaeromera gara yagiro, intitari negintevagetacharira, kantankicha itsarogakagakaro nerotyo tera inkoge

* ^{1:16} Jeso onti onkantakera “yogavisaakotantake Atinkami”. Kirishito onti onkantakera “ikogakagakerira Tasorintsi impegakempara Igoveenkariegite iseraereegi”. (Kamosotero “Jesokirishito” ontiri “Meshiashi” Glosarioku.)

intsavetantakerora irogipashiventakerora,
 onti isurevetanaka irapakuanaeromera
 mairen'i gara ikanti tatoita yapakuavitanairo.
20 Kantankicha iroro isurevetanakara
 inkañotakeromera maika ikoneatimotakeri
 isaankariite Tasorintsi igisanireku ikantiri:
 "Jose, virori vinti iyashikitanakerira Iravi.
 Maika onti nopolashitake nonkantakempira
 kametitake pagakerora Maria pamanakerora
 pivankoku. Yogari otomi intitari timakagakeri
 Isure Tasorintsi, irorotari itimantakarira.
21 Impogini omechotakerira pimpaitakeri Jeso,
 irirotari gavisaakoigakerine itovaireegi ganiri
 ikisaviigiri Tasorintsi ikañovageigara."

22 Ario okañotaka maika kameti ontsatagakem-
 paniri ikantakerira Atinkami Tasorintsi pairani
 iniakagakerira kamantantsirira Isaiashi ikanti:
23 "Ogari terira ineimatero surari ankamonkitake
 intimake otomi.

Irirori impaitakempa Imanoeri"
 (onkantakera: "Ikonoiiigakai Tasorintsi").

24 Impo ikireanaira Jose ikematsatakeri
 isaankariite Tasorintsi ovashi iatake yagakitiro
 Maria yamanakerora ivankoku, **25** kantankicha
 tera ineimatero kigonkero omechotakerira otomi.
 Antari imechotakera yogari Jose ipaitakeri Jeso.

2

Yogonkeigakara govageigatsirira Jerosarenku

1 Antari imechotakera Jeso Verenku Joreaku
 aiño igoveenkariegite Joreakunirira paitacharira
 Erorishi. Impogini ipokaigake Jerosarenku
 pashini govageigatsirira iponiaigaka oatakara

ikontetira poreatsiri. Iriroegi inti ipiriniventaigi impokiropage irogotantaigakemparira posante. Antari yogonkeigapaakara ² ikantaigapaakeri timaigatsirira kara:

—¿Tyara inake kara igoveenkariegite jorioegi ikyakenkarira mechotankitsi?, noneaigakeritari impokiro ikontetapaakera yogaenokanakara nogotantaigakarira mechotake, nopolantaigakarira nonkamosoiguterira nontigeroaventaigakitemparira.

³ Irorompatyo ikemavakera koveenkari Erorishi ogatyo ikenake yovankinavagetañakatyö kara, ariotyo ikañoiganaka maganiro timaigatsirira Jerosarenku. ⁴ Impogini irirori ikaemakagantaigakeri maganiro itinkamiegi saseroroteegi intiegiri aikiro gotagantaigirorira itsirinkakotanakerira Moiseshi ikogakotagantaigakeri tyara kara imechotakera Ikogakagakerira Tasorintsi impegakempara Igoveenkariegite iseraereegi. ⁵ Iriroegi ikantaigiri:

—Anta Verenku Joreaku, ariotari ikantakeri pairani kamantantatsirira itsirinkakotanakerora Veren ikanti:

⁶ Virori, Veren, nankitsirira Joraku, pañor pavisake inkemakoitakemprira pavisakerora pashinipage apatogetara pankotsi itimantaigakarira tovaini Jorakunirira, imechotantakempitari Igoveenkariegite maganiro iseraereegi.'

⁷ Impogini Erorishi maireni ikaemakagantaigakeri govageigatsirira teratyo tyani

inkamante. Iroro yogenkeigapaakara ikantaigavakeri:

—¿Tyati pineantaigakari ikontetapaakera impokiro?

⁸ Impogini ikemakera ikamantaigakerira itigankaigakeri Verenku ikantaigavakeri:

—Atsi piaige pinkogasanoigakiterira, impo pineaigakeririka pimpigaigae pinkamantaigakenara kameti noatakiteniri naro aikiro nontigeroaventakitemparira.

⁹ Iroro ikemaigakera ikantaigakerira iaiganake Verenku. Yogari impokiro ineaigakerira okyara anta itimaigira iivaiganakeri impo yaganakerora okatinkatakera pankotsi inantakarira Jeso ario ikusoenkatapaake kara. ¹⁰ Antari ineaigairira aikiro ogatyo ikenaigake ishinevageiganakatyro kara. ¹¹ Impo yogenkeigapaakara pankotsiku ikaiganake tsompogi ineaigapaakeri Jeso ontiri iriniro ovashi itigeroaventaigapaakari. Impo itsaakoigakero yamaigakeneririra ipaigakeri kori, kasankapaneri ontiri mira. ¹² Impogini imagaigakera ikamantaigunkani igisanireku ganiri ipigaiganaa Erorishiku, nerotyo ikenapitsatantaganaaririra parikoti iaigaira itimaigira.

Jose ishigakaganakarira Jeso anta Ejipitoku

¹³ Impogini iaigaira iriroegi yogari isaankariite Tasorintsi ikoneatimotairi Jose igisanireku ikantiri: “Tinaanake ganakero pitsinanetsite intiri otomi piate shiganake anta parikoti Ejipitoku, inkogakagantakeritari Erorishi irogakagantakerira. Pinkantakan pintimakera kara

kigonkero nonkamantaempira kametitake pimpi-gaera.”

¹⁴ Irorotyo ikemakera ikantakerira ogatyo ikenake itinaanaka yaganakero itsinanetsite intiri otomi ishiganinkaiganaka tsitenigetiku iaigakera Ejipitoku. ¹⁵ Itimuntevageigake anta asatyo ikamanaira Erorishi. Ario ikañoigaka maika kameti otsatagakenkaniniri ikantakerira Tasor-intsi pairani itsirinkakagakerira kamantantatsirira ikanti: “Itimavetaka Notomi Ejipitoku, impogini nokaemairi.”

Erorishi yogakagantaigakerira ananekiegi

¹⁶ Impogini yogari Erorishi ineakera tera impigaigae govageigatsirira ikisamatantanakatyo ovashi itigankaigakeri soraroegi irogaigakiterira maganiro ananekiegi timaigatsirira Verenku intiegiri aikiro timageigatsirira ochoenigetira impogereaaigakerira maganiro ikyarira mechoigankitsi kigonkero inkaratagaigakeri shiriagakoigankicharira piteti. Irorotari ipampiatake ikantaigakeririra govageigatsirira. ¹⁷ Ario ikañotaka maika otsatagunkanira itsirinkakotanakerira pairani kamantantatsirira Jeremiashi ikanti:

¹⁸ “Okemunkani anta Iramaku okaema-vatunkanira,
ontityo oyashikiiganakerira Irakere
iragatsikanaiganakanakarira otomiegi teratyo
onkaraigae.

Tyampa onkantaigakenkani ogishineaigaenkanira, kamavioigaketari maganiro otomiegi.”

¹⁹ Impogini ikamanakera Erorishi yogari isaankariite Tasorintsi ikoneatimotairi Jose igisanireku ikantiri: ²⁰ “Maikari maika tinaanake ganaero pitsinanetsite intiri otomi piataera anta Iseraereku, kamaigaketari kogaigavetankicharira irogaigakerimera.”

²¹ Iroro ikemavakera ikavirritapanuta yaganairo itsinanetsite intiri otomi iataira Iseraereku, ²² kantankicha antari ikemakotakerira Arekerao itomi Erorishi ipugairira iriri ipegakara koveenkari Joreaku ogatyō ikenake itsaroganake ovashi tera inkoge iriataera anta. Impogini ikamantunkani igisanireku ganiri iatai Joreaku, nerotyo iatantakarira Garireaku. ²³ Yogenketapaakara anta itimapaaake Nasareku. Ario okañotaka maika otsataganakara ikantaigakerira kamantantaigatsirira iniakoigakerira Jeso ikantaigakera onti inkantakenkani, “Inti Nasarekunirira.”

3

Joan Giviatantatsirira ikenkitsavagetaakera osarigagitetaakera

(Mr 1.1-8; Ir 3.1-9, 15-17; Jn 1.19-28)

¹ Aiñokyara itimaveta Jeso Nasareku iatake pashini matsigenka paitacharira Joan ikenkitsavagetaakera anta osarigagitetaakera ikanti: ² “¡Kantatigaiganakempa pampakuaiganakerora povetsikageigira terira onkametite, panikyatari aganakempa impegantakemparira Tasorintsi Igoveenkariegite maganiro kematsaigakerinerira!”

³ Yogari Joan irirotari ikamantakotakerira kamantantsirira Isaiashi pairani ikantakera:
 “Iriatake pashini matsigenka anta osarigagite-tapaakera inkenkitsatakera imaraenkarika kara inkante:
 ‘Pakuaignakero povetsikageigira terira onkametite pinegintetashiigavakemparira Atinkamiegi.’ ”

⁴ Irirori onti yogagutaka manchakintsi ovetsikantunkanirira iviti kameyo, aikiro isun-toratsatakari imeshina. Intagani yogaka tsinaro intiri pitsi. ⁵ Impogini iaigake inkamosoigakerira tovaini matsigenkaegi timaigatsirira Jerosarenku intiegiri pashiniegi Joreakunirira intiegiri aikiro choenitakoigakarorira nia paitacharira Jororan. ⁶ Antari ikemaigakerira ikenkitsavagetakera ovashi ikamantakoiganakero magatiro yovetsikageigirira terira onkametite impo yogiviaigakeri Jororanku.

⁷ Kantankicha iatashiigakeri aikiro tovaini pariseoegi intiegiri saroseoegi ikantaigakerira irogiviaigakerira. Irirori ineaigavakerira ikantaigavakeri: “¡Viroegi kañoigakavi tsiroti! Ontitari pamatagaigaka tera arisano pinkematsatagsantsiige. ¿Matsi tyanimpatyora kantaigakempira pimpokaigakera aka nogiviaigakempira ganiri ikisashiigimpi Tasorintsi impogini inkisashiigakemparira maganiro kañovageigacharira? ⁸ Atsi negintetasanoigempanityo kameti ineaigakempiniri maganiro arisano pikantatigaigaka papakuaignakera povetsikageigira terira onkametite pikematsatasanoigakerira Tasorintsi.

9 Gara pikantaigi: ‘Gara ikisashiigana Tasorintsi, nantitari iyashikiegi Averan.’ Nonkamantasanoigakempi inkogakerika Tasorintsi iragaveaketyo inoshikagetakerora ogapage mapu impegakagagetakemparora iyashikiiganakerira Averan. **10** Kantankicha maika panikya inkisashiigakempari Tasorintsi maganiro terira inkematsatasanoigeri inkañotagakemparora otogaganira inchato terira ontimumate okitsoki impo otagunkanira.

11 “Narori onti nogiviaigakempi niaku oneakenkaniniri arisano pikantatigaigaka papakuaigakerora povetsikageigira terira onkametite, kantankicha panikya iripokake pashini tigankimoigakempineririra Isure Tasorintsi intimasurentagarantaigakempsira, kantankicha pinkonogagarantaigakempsira intigankagarantaigakempi morekariku. Irirori paioptyo yavisakena yagaveavagetakera. Narori garorokarityo nokañotumatari irirori, onti nagamaavagetakari, paioptari yavisavagetakena. **12** Antari iripokapaakera inkantapaake tyani kematsatasanoigakeri Tasorintsi, aikiro tyani terira inkematsaigeri. Yogari kematsatasanoigakeririra intentaiganakeri intimimoigakerira Tasorintsi. Yogari terira inkematsaigeri intigankaigakeri morekariku garira otsivakumati.”

*Yogiviataunkanira Jeso
(Mr 1.9-11; Ir 3.21-22)*

13 Impogini iponianaka Jeso Garireaku iatakerera Jororanku ikantakerira Joan irogiviatakerira.

14 Kantankicha Joan ikantavakeri:

—Narori garorokari nogiviatumatimpi narompatyo naro pogiviatake.

15 Ikanti Jeso:

—Ariotyo onkañotakempa maika kametitaketari antsatagaigakerora ikantakerira Tasorintsi.

Impo ikantake Joan:

—Je'ee.

Ovashi yogiviatakeri. **16** Impo irorotyo yanagairora Jeso otsapiaku ogatyo okenake ashirenakimatanakatyō inkite ineiri yapusatinkagutapaakari Isure Tasorintsi ikañotapaakari shiromega.

17 Impo inianake Tasorintsi enoku ikanti: “Yogari yoga inti Notomi, notasanovagetarityo kara noshineventakarityo.”

4

Ikogavetakara kamagarini irapakuakagakerimera Jeso ganigera ikematsatairi Iriri

(Mr 1.12-13; Ir 4.1-13)

1 Iroro yagatakera iniakera Tasorintsi yogari Isure yamanakeri Jeso parikoti osarigagiteta-paakera kameti ineasanotakerira kamagarini ariorika iragaveake irapakuakagakerira ganigera ikematsatairi Iriri. **2** Ario inake kara 40 kutagiteri onti ipitashitakaro kogapage tera isekatumatempa niganki itaseganake. **3** Impo yaiñonitanakari kamagarini ikantakerira:

—Irorotari vintira Itomi Tasorintsi atsi kanteronyo oga mapu ompeganakempara sekatsi pisekatakempara.

4 Kantankicha Jeso ikantiri:

—Aityo otsirinkakotunkani Irinianeku Tasorintsi okanti: ‘Ogari sekatsi oshintsitagan tavetaka kantankicha tera patiro onkogakotenkani irorori. Pairo avisake okogakotunkanira ogotasanotakenkanira magatiro ikantagetakerira Tasorintsi, irorotari shintsitagan tatsi suretsiku.’*

⁵ Impo ariokya itentanakari Jerosarenku yaratinkaigapaakera ivankoku Tasorintsi otishitapankoku onavagetiratyo enoku kara

⁶ ikantiri:

—Irorotari vintira Itomi Tasorintsi atsi mitaanakenityo savi, okantaketari otsirinkakotunkanira okanti:

‘Intigankaigakeri Tasorintsi isaankariite irisen-taigakempira.

Iragaigavaemptyo ganiri piparigi mapuseku.’

⁷ Iniitanaatyoye Jeso ikantiri:

—Kantankicha aityo pashini otsirinkakotunkani aikiro okanti: ‘Gara potsimajairi Pitinkami Tasorintsi* pinkantanatakerira: Irorotari pagaveavagetira atsi nanityo maika neakagenaro pagaveane.’

⁸ Impo ariokya itentanakari enoku ochovaankakera otishi yogikoneatimotutarityo magatirosanotyo kipatsi ontiri aikiro magatiropage timantagetakarorira. ⁹ Impo ikantiri:

—Pintigeroaventakenarika maika pimpegakenara pitinkami, naro nompagetakempiro magatiropage pineagetakerira maika.

¹⁰ Iniitanaatyoye Jeso aikiro ikantiri:

* **4:4** Ireo 8.3 * **4:7** Ireo 6.16

—Virori Satanashi, piataenityo parikoti, otsirinkakotunkanitari okanti: ‘Gara pipegumati pashini pitinkami. Panirosanotyo Tasorintsi pinkematsatasanotake.’*

¹¹ Impo ovashi iatai. Irirokya pokaigapaatsi isaankariite Tasorintsi yamaigakenerira iseka ishindsightagaigakerira.

*Ikenkitsavagetakera Jeso Garireaku
(Mr 1.14-15; Ir 4.14-15)*

¹² Impogini yogari Jeso ikemakotakerira Joan yashitakotunkanira iatake Garireaku, ¹³ kantankicha tera intimae Nasareku, onti iatake itimakera Kaperenaoku. Ogari Kaperenao onti onake otsapiaku inkaare paitacharira Garirea ochoenitakotakarora kipatsipage itimantaigarira pairani iyashikiiganakerira Savoron intiri Nepetari. ¹⁴ Ario ikañotaka maika kameti ontsataganakenkaniniri itsirinkakotanakerira kamantantatsirira Isaiashi pairani ikanti:

¹⁵ “Ogari kipatsi itimantaigarira iyashiki-iganakerira Savoron intiri Nepetari, onti onake intati Jororanku okenantapinitaganira oatapinitaganira omaraaniku nia.

Onti opaita aikiro Garirea; itimantaigarao tovaini terira iriroegi iseraereegi.

¹⁶ Yogaegiri timaigatsirira kara yapavat-saakoigavetaka, kantankicha maika atake ikoneagitetakkoiganake; panikya impogereiaigakempa,

* **4:10** Ek 20.3; Ireo 6.13; Jos 24.14

kantankicha maika ont i pokashiigakeri Gavisaakotantatsirira irogaviaakoigakerira.”

¹⁷ Impo ikenkitsavagetanake Jeso ikanti: “Kantatigaiganakempa pampakuaignakanerora povetsikageigira terira onkametite, panikyatari aganakempa impegantakemparira Tasorintsi Igoveenkariegite maganiro kematsaigakerirera.”

Jeso ikantaigakerira 4 kitsavageigatsirira irogiaiganakerira

(Mr 1.16-20; Ir 5.1-11)

¹⁸ Impogini ikenanake Jeso kara ishitetanaka otsapiaku inkaare Garirea. Ineaigapaakeri Sumo intiri irirenti paitacharira Anturishi kitsavageigake, irorotari ipiriniventavageigi iriroegi. ¹⁹ Impo ikantaigiri:

—Maikari maika ont i pipiriniventavageigi pikitsavageigira, kantankicha maika pakuaiganakero pikitsavageigira tsame pogiaiganakenara ariokya nagaveakagaigakempi irirokyo pimpiriniventavageigae matsigenkaegi pinkematsatagaigakerira.

²⁰ Impo iriroegi iokageigapanutiro igitsareegi yogiaiganakerira.

²¹ Iaigavetanaka antakona anta irirokyo inea-paake Santiago intiri irirenti paitacharira Joan pirinitaigake pitotsiku shitikagisevageigake igit-sareegi. Itentaigakari iriri paitacharira Severeo. Impo yogari Jeso ikantaigiri Santiago intiri Joan:

—Tsame pogiaiganakenara.

²² Iroro ikemaigavakerira ogatyo ikenaigake iokaiganakeri iriri pitotsiku yogiaiganakeri Jeso.

*Jeso yogotagaigakerira tovaini matsigenkaegi
(Ir 6.17-19)*

²³ Impogini iatanake Jeso itsotenkanakerotyo Garirea yogotagantavagetakera pankotsipageku yapatoitantaigarira jorioegi ikenkitsatimoigakerira ikantaigakerira tyara inkantaigakempa kameti irogaviaakoigakeriniri Tasorintsi impegakempa Igoveenkarie-gite. Aikiro yovegagematityo tovaini oposantetashigeigakarira mantsigarintsipage, tenigetyo tyara inkatsitumageigae paa vegasanovageigaa. ²⁴ Impo yogaegiri timageigat-sirira parikotipageku Suriaku ikemakoiganakeri yovegantagetaira nerotyo yamageigapaakeneri maganiro mantsigaigankitsirira. Iriroegi iposanteivagetanakatyō kara ikonogaka yatsipereintevageigaketyo kara. Pashini onti ikamakamaigi, pashinikya ishinkogiseigaka, kantankicha irirori yovegageigairi maganiro. Aikiro yoneaganontaigakari itimaguigakerira kamagarinipage. ²⁵ Impo yogiavageiganakerityo tovaini matsigenkaegi poniageigankicharira Garireaku, Tekaporishiku, Jerosarenku, Joreaku ontiri aikiro intati Jororanku, itovaigavagetiratyō kara.

5

Ikenkitsavagetakera Jeso otishiku

¹ Impogini ineraigakerira Jeso maganiro patoventaigakaririra itovaigavagetityo kara itonkoanake otishiku ipirinitakera kara, impo yaiñoniigakari irogamereegei

inkemisantaigakerira. ² Ovashi yogotagaigakeri ikantaigakerira:

*Tyani shinevageigankichane impogini
(Ir 6.20-23)*

³ “Pairo okametitake pinkantaigakera: ‘Garika itsarogakagana Tasorintsi tyampa nonkantakempa, teranika tatakona nagaveimagete naro tsikyata.’ Antari pinkañoigakemparika maika ario pinkante pishinevageigakempa impegakempatari Tasorintsi Pigoveenkariegite.

⁴ “Pairotari irishinevageigakempa impogini maganiro onkenkisureakagaigakemparira maika tatapagerika oita terira onkametite, irogishineaigaeritari Tasorintsi.

⁵ “Pairotari irishinevageigakempa maganiro tsipereakoigankichanerira magatiro tatarikara oita pokashiigakerine, impoginitari ineaigakero magatiro ikashigakagaigakaririra Tasorintsi.

⁶ “Pairotari irishinevageigakempa maganiro kogasanoigankitsinerira intsatagageigakerora magatiro ikogagetakerira Tasorintsi, iragaveakagaigakeritari irirori inkañoigakerora maika.

⁷ “Pairotari irishinevageigakempa maganiro tsarogakagantaigankichanerira, intsarogaka-gaigakemparitari Tasorintsi iriroegi aikiro.

⁸ “Pairotari irishinevageigakempa maganiro suretasanoigakemparinerira Tasorintsi impanirotasanoiganakerira, impoginitari iriaigake itimira ineaigakerira.

9 “Pairotari irishinevageigakempa maganiro gametiaigaerinerira itovaireegi, impegaka-gaigakeritari Tasorintsi itomiegi.

10 “Pairotari irishinevageigakempa maganiro iratsipereakagaigakenkanirira inkisaviigakenkanira ikematsaigakerira Tasorintsi itsatagageigakerora ikogagetakerira, matakatari pegaka Tasorintsi Igoveenkariegitie.

11 “Maika atsi shinevageigempa viroegi pineaigakera irovosanteaigakempira pitovaireegi, inkisavintsvageigakempira, aikiro intsoeventavageigakempira ineaigakera pike-matsaigakenara naro. **12** Ariotari ikañoigunkaniri kamantantaigatsirira pairaninirira yatsipereakagaigunkanira ikisaigunkanira. Antari pineaigakera inkañoigakempira maika, pishinevageigakempatyo kara, pogoiqaketari paioetyo irogishineavageigakempi Tasorintsi impogini anta enoku.

*Kematsaigatsirira onti ikañoigakaro tivi
(Mr 9.50; Ir 14.34-35)*

13 “Viroegi onti pikanaigoigakaro tivi. Pineirotari tivi opochatira paio okogasanotagani, kantankicha antari omasankatera ganigera opochatai, ¿ario tataty onkogavitaenkani? ¿Matsi tyampatyo onkantaenkani kameti ompochatanaera? On-tityo ovuokakenkani parikoti okenapinitaganira agatitinatakenkanira.

14 “Aikiro viroegi kañoigamatakavi tenenkakoi-giririra maganiro matsigenkaegi. Pineirotari pankotsipage ovetsikagetunkanira otishiku apatotunkanira otovaigavagagetityo kara,

¿matsi gara oneagani? Oneakenkanityo, koneataketari. ¹⁵ Ario ikañotaka aikiro mechero yogimata ganira tera ario intatakotenkani kovitiku, ontityo yovitakotunkani enoku kameti irontenenkakoigakeriniri maganiro naigankitsirira pankotsiku. ¹⁶ Ario pinkañoigakempa viroegi pinegintevageigakempa povetsikaigakerora kametiripage kameti ineaigakempiniri maganiro, ovashi inkantaiganake pairo ikametiti Piri timatsirira enoku.

Jeso ikantake otsatagakenkanira Itsirinkakagantakerira Tasorintsi

¹⁷ “Gara pikantaigi: ‘Onti ipokashitake Jeso inkantakera ganigera otsatagaagani itsirinkakotanakerira Moiseshi ontiri aikiro itsirinkakoiganakerira kamantantaigatsirira’, teranika iroro nompokashite, ontityo nopokashitake nontsatagasanotakerora magatiro ikantaigakerira. ¹⁸ Maika nonkamtanasanoigakempi antari gatatara otsonkata inkite ontiri kipatsi otsatagasanotakenkanityo magatiro ikantagetirira Tasorintsi itsirinkakagaigakeririra pairaninirira. ¹⁹ Tyanirika gagakerone patiro ikantakerira, aikiro irogotagaigakeri pashini irimaigakempa iriroegi, garatyō ishineventumaigari maganiro pegaigakeririra Tasorintsi Igoveenkariegit. Kantankicha yogari tsatagasanotakeronerira, aikiro irogotagaigakeri pashini irimaigakempa irirori intsatagasanoigakerora, pairotyo irishineeventavagetenkenkani. ²⁰ Nonkantantaigakemprira maika garika pinegintetasanoiga pavisaigakerira gotagantaigirorira itsirinkakotanakerira

Moiseshi intiegiri pariseoegi garatyo pitimimoigiri Tasorintsi impogini.

*Jeso yogotagantake ganiri okisantagani
(Ir 12.57-59)*

²¹ “Pogoigakerotari ikantaigunkanirira pairani yashikiiganakempirira ikantagani: ‘Gara poganti,* inkisashitakenkanitari maganiro gantaigankitsinerira.’ ²² Kantankicha naro nonkantaigakempi tyanirika kisakerine itovaire irimatakenkanityo irirori impogini inkisashitakenkanira. Aikiro tyanirika kantakerine: ‘Viro tera pogotumate’, iramanakenkanityo itinkamipageku inkisashitakenkanira, kantankicha yogari kantakerinerira: ‘¡Vinti ivegaga!', intagakempatyo morekariku.

²³ “Irorotari nonkantantaigakempirira piaigakerika ivankoku Tasorintsi pamanakenerira pipira povetisakagantakenerira impo katsiketyo pisuretanakemparo pinkante: ‘Ariotari aityotari ikisavitakenarira notovaire’, gatatatyo povetisakagantiri. ²⁴ Onti poganakeri pimpigapanaate pogametitapanuterira pitovaire. Impogini ario pinkante pimpigashitanaeri pipira povetisakagantakenerira Tasorintsi.

²⁵ “Inkisakemprika pitovaire ineakera pipegakotakerira impo inkogavetakempa iramanakemprira joeseku kameti inkantakera irirori tyara inkantaitakempi. Kantankicha viro pinianiatanakeri avotsiku pogishineaerira ganiri yamimpi. Antari iramanakemprika joeseku iriroky kaemakerine soraro, iriroky

* ^{5:21} Ek 20.13

soraro onti iragapanutempi irashitakotakempira.

²⁶ Nonkamantasanotakemptyo garika pipunatasanotairi kisakempirira magatiro pipegakotakeririra garatyoyapakuaimpi shitakotakempirira.

Jeso yogotagantake ganiri oneavintsataganitsinane

²⁷ “Viroegi pogoigakerotari okantunkanirira pairani okantagani: ‘Gara piatashitiro tsinane.’”*

²⁸ Kantankicha naro nonkantaigakempi tyanirika neavintsanatakerone tsinane kañomataka ontinirikatyoiatashitakero, isuretakarotari ineakerora. ²⁹ Irorotari nonkantantaigakempirira maika irorora kañovagetagakempine pokipakosanorirakutirira ariometyo pinkitsogitakerome, pairotari okametitake pinegintetasanovagetaempre para impo pinkamanakerika piatakera pintimimotakerira Tasorintsi, avisakero pinkañovagetakempara impo pinkamanakerika piatakera morekariku. ³⁰ Aikiro pakosanorira irorora kañovagetagakempine ariometyo povatuakerome, pairotari okametitake pinegintetasanovagetaempre impo pinkamanakerika piatakera pintimimotakerira Tasorintsi avisakero pinkañovagetakempara impo pinkamanakerika piatakera morekariku.

Ikantake Jeso gara tyaní okumatiro itsinanetsite

(Mt 19.9; Mr 10.1-12; Ir 16.18)

* **5:27** Ek 20.14

³¹ “Aikiro okantunkani pairani: ‘Tyanirika kogankitsine iokanaerora itsinanetsite kantetyo impakerora sankevanti onkantakera: Maika mataka nokanaimpi.’ ³² Kantankicha naro nonkantaigakempi ompaniro takempirika pitsinanetsite garatyo piokiro. Pokanakerorika impo agaerika pashini pimatakerero pikañovagetagakaro, agaitari pashini. Ario pinkañotakemba viro pagakerika tsinane okunkanirira matakavi kañovagetagakavi.

Jeso ikantake gara tatoita oniakotumamatagani

³³ “Aikiro pogoigakerotari ikantaigunkanirira pairani yashikiiganakempirira ikantagani: ‘Tatarika pinkantake piniakotakeririka Tasorintsi pinkantakera: Ineakena Tasorintsi tera nontsoegumatempa, garatyo pikantatigumatiro impogini, ontityo pintsatagakero.’

³⁴ Kantankicha naro nonkantaigakempi omirinkara pintsatagageigakero magatiro pikantaigakerira ganiri pikogakotumaiga pinkantaigera: ‘Ineakenatari Tasorintsi tera nontsoegumatempa.’ Gara piniakoigiro inkite pinkantaigakera: ‘Nontsoegakemparika kantakarikatyo opitankirika inkite’, intitari shintaro Tasorintsi Igoveenkaririegite maganiro.

³⁵ Ario okañotaka kipatsi irorori gara piniakoigiro pinkantaigakera: ‘Nontsoegakemparika kantakarikatyo onigirika kipatsi’, ontitari yashintagitearira, aikiro gara piniakotumaigiro Jerosaren pinkantaigakera: ‘Nontsoegakemparika asatyo ompegakemba Jerosaren’, intitari shintaro Koveenkari Gaveavagagetatsirira terira intimumate viserinerira. ³⁶ Aikiro

gara piniakoigiro pigishi pinkantaigakera: ‘Nontsoegakemparika ogatyo nonkenake nonkutyapaetanake’, teranika pagaveaige viroegi pinkutatagaigakerora ontirika pimpotsitata-gaigakerora papeatiro pigishi. ³⁷ Gara tatoita piniakotumaigi, intagatityo pinkantaigake: ‘Jeeje, arisano’, ontirika pinkantaigake: ‘Teratyo.’ Antari ontirika piniakogeigake tatarika oita kameti inkematsaigakempiniri pashini, intityo suretagaigakempine kamagarini.

Jeso ikantake gara ipugatagani kisantankitsirira

(Ir 6.29-30)

³⁸ “Viroegi pogoigakerotari okantunkanirira pairani: ‘Tyanirika tisoreaatantakerone okitsi ariotoy inkañotagakenkani irirori intisoreaaatakenkanityo iroki. Aikiro tyanirika tinkaraitantakerone aitsi, ariotoy inkañotagakenkani irirori intinkaraitakenkanityo irai.’ ³⁹ Kantankicha naro nonkantaigakempi gara pipugaigari kisaigakempinerira. Kañotari intimera taakempinerira pivotoku garatyo pipugatari.* ⁴⁰ Ontirika intimake kogankitsinerira iramanakempira joeseku iragutakemprora pogagutakarira savitankitsirira gara pitsaneanakaro† pimanchaki enokutankitsirira. ⁴¹ Ario onkañotakemps aikiro ariorika intimake ganakempinerira iromperatakemprira inkantakemprira pogavokitakiterira choenikona

* ^{5:39} Garatyo pipugatari: literalmente, pishonkanakemps irimatakerora apiporotene irorori. † ^{5:40} Gara pitsaneanakaro: literalmente, pimpakerityo.

anta, piatetyo pavisanakerotyo ikantakem-pirira pogavagetakiterityo antakona anta.
42 Pintsarogakagakemparira nevitakempinerira tatarikara oita, pimpakerityo ikogakotakarira, aikiro tyanirika kogankitsine pampinatakerira tatarikara oita gara pitsaneapitsatari.

*Inkavintsajaigakenkanira kisantaigatsirira
(Ir 6.27-28, 32-36)*

43 “Pogoigakerotari okantunkanirira pairani: ‘Pintakemparira piamicote pinkavintsaaikerira. Irirokya kisakempirira pimpugatanakemparityo pinkisakerira.’

44 Kantankicha naro nonkantaigakempi pinkavintsajaigakerityo iriroegi kisashiigakem-pirira, aikiro piniaventaigakerira maganiro tsipereakagaigimpirira. **45** Pintsatagaigakerorika magatiro nokantaigakempirira maika onti pinkañoiganakempari Piri timatsirira enoku. Kañotari irirori iporeakagirira poreatsiri kameti imporeakoigakeriniri maganiro matsigenkaegi, irirorika kametiigatsirira intirika terira inkametiige. Ario okañotaka inkani irorori yogivariginirira maganiro kematsaigiririra intiegiri terira inkematsaigeri.

46 Nonkantaigakempi antari intaganirika pinkavintsajaigake kavintsajaigimpirira, ¿matsi tatatyo irishineviigakempi Tasorintsi? Ariotari ikañoigari maika kogantaigaririra itovaireegi koriki irashi koveenkari. **47** Ario okañotaka aikiro intaganirika piniaigavake pitovaireegi, ¿matsi ario pineaigake pairo pavisaiigake pikematsaigakerira Tasorintsi? Ariotari

ikañoigari maika yogaegi terira inkematsaigeri.
 48 Irorotari nonkantantaigakemparira maika pinkavintsaantavageigakera pinkañoigakemparira Piri timatsirira enoku ikavintsaantavagetira.

6

Jeso yogotagantake tyara okantagani okavintsaantaganira

¹ “Gara intagati pikavintsaantaigi pineakagaigaikemparira pitovaireegi. Pinkañoigakemparika maika garatyo ishineventtaigimpi Piri timatsirira enoku.

² “Pintsarogakagaigaikemparirika terira irashintumaigempa pimpaigakerira iko-gakoigakarira gara pikamantaigiri pitovaireegi ganiri pikañoigari kematsatamampegaigacharira kogapage. Iriroegi ontitari ineakagan-taigaka pankotsipageku yapatoitantaigarira ontiri aikiro kara avotsipageku kameti irishineventaigakempariniri itovaireegi, kantankicha maika nonkantaigakempi gatanika ishineventumaigari Tasorintsi kañoigirorira maika, intaganityo shineventaigakari itovaireegi neaigakeririra. ³ Antari pipaigirira tyanirika kogakovageigankicharira garatyo tyani pikamantumati, ⁴ impogini yogari Piri neagetakerorira magatiro irishineventakempi ovashi inkavintsaakempi.

*Jeso yogotagantake tyara inkantakenkani irinienkanira Tasorintsi
 (Ir 11.2-4)*

5 “Antari piniaigerira Tasorintsi gara pikañoigari kematsatamampegaigacharira kogapage iniamampegaigarira. Iriroegi ontitari ikogavintaigi iraratinkaigakera pankotsipageku apatoitantaniganirira ontiri aikiro avotsiku iniamampegaigakarira kameti ineaigakeriniri itovaireegi. Yogaegiri kañoigacharira maika garatyō ishineventumaigari Tasorintsi. Intagani shineventaigakari maganiro neaigakeririra.

6 Kantankicha viro pinierira Tasorintsi piatake pinkianake pivankoku pashitakotakempa paniro, impo piniakeri. Irirori ineaikempi panirora papuntaka piniakerira inkemavakempi irishineventakempi ovashi irogishineakempi.

7 Nerotyo pinierira Tasorintsi gara piniavageti kogapage vero vero ganiri pikañoigari terira inkematsaigeri Tasorintsi. Onti ineaigiri ariori inkemaigakeri iniavageigakera.

8 Nonkantutaigaemptyo aikiro garatyō pikañoigari iriroegi, yogotitari Tasorintsi tatarika pikogakoigaka tekyakenkara pineviigeri.

9 Antari piniaigerira ontī pinkañoigakero maika pinkantaigakerira:

‘Apa Tasorintsi timatsirira enoku,
nokogaigake impinkatsatasanoigakempira maganiro matsigenkaegi

10 inkematsatasanoigakempira impegaigakempira Igoveenkariegite.

Nokogaigake ontsatagakenkanira aka kipatsiku magatiro pikogakerira viro

onkañotakempara otsatagaganira kara enoku.

11 Pimpaigakenara omirinka nogaigakemparira.

12 Pimagisantaerora novetsikaigakerira terira onkametite gara pikenkiagaiganaro.

Ariotari nokaaigakari naroegi nomagisantaigakero

yovetsikaigakerira tsipereakagaigakenarira tera nonkenkiagaigeri.

13 Pimpampogiakoigakenara ganiri opokashigeigana garira noshintsitashigeigiro.

Onti nokogaigake pishintsitagaigakenara ganiri yagaveaigaana kamagarini inkañovagetaigaenara.’

14 “Pimagisantaigaerorika yovetsikaigakerira tsipereakagaigakempirira ario inkañotakempa Piri timatsirira enoku imagisantaero magatiro povetsikaigakerira viroegi terira onkametite gara ikenkiagaimpiro. **15** Kantankicha garika pimagisantaigiro yovetsikaigakerira tsipereakagaigakempirira garatyo imagisantairo Piri povetsikaigakerira viroegi terira onkametite.

Jeso yogotagantake tyara onkantakenkani omnipitashitakenkanira kogapage

16 “Ariorika pinkogaigake pimpitashiigakemparora kogapage gara pisekataiga kameti pimpiriniventaigakeroniri pisuretakoigakemparira Tasorintsi gara pikenkisureamampegaiga kogapage, garira ontionti pinkañoigakempari kematsatamampegaigacharira. Iriroegi ontitari ikenkisureamampegaiganaka kogapage kameti ineaigakenkaniniri. Kantankicha yogaegiri kañoigacharira maika garatyo ishineventumaigari Tasorintsi, intaganityo shineventaigakari

maganiro neaigakeririra. ¹⁷ Kantankicha viroegi pimpitashiigemparora kogapage pinkishiigakempatyo, aikiro pinkivaiigakempa ¹⁸ ganiri yogoigimpi pitovaireegi onti pipitashiigakarora kogapage. Intagani neaigakempine Piri Tasorintsi impo irirori irishineventtaigakempi ovashi pineakoigakemparo impaigakempirora onkatinkageigakempirira impogini.

*Oshineventavagetakenkanira magatiro
ikogagetakerira Tasorintsi
(Ir 12.33-34)*

¹⁹ “Gara onti pishineventavageiga pashintavageigakempara aka kipatsiku, onkonogagarantakemparati irogagagetakemparo gagetarorira, pashinikya onkiterigetanake, pashinikya onkoshigetakenkani, ontsonkagetakenkani magatiro. ²⁰ Onti pishineeventavageigakempa magatiro ikogagetakerira Tasorintsi kameti inkavintsaavageigakempiniri irogishineaigakempira impogini anta enoku. Antari anta gara tatoita tsonkatumagetaacha. ²¹ Antari irororika pishineventavagetakempa timagetatsirira aka kipatsiku irorotyo pimpiriniventavagetake, intagatitari pisuretakotakempa. Antari irororika pishineventavagetake ikogagetirira Tasorintsi ario pinkante irorotyo pimpiriniventavagetake, irorotari pisuretakotakempa.

*Suretakotasano tarorira Iriniane Tasorintsi
onti ikañotakari neatsirira
(Ir 11.34-36; 16.13)*

²² “Yogari suretakotasanolagetakemparonera iriniane Tasorintsi irogotasanotakero magatiro ikogagettirira irirori, onti inkañotakempari neatsirira tyarika iati ineasanotanake tera irontivatumatempa, okoneagitetimotakeritari magatiro. ²³ Kantankicha yogari terira isuretakotasanoltempo Iriniane Tasorintsi tera irogotero ikogagettirira, onti ikañotakari terira inee, tyampa inkantakempa iranuivageta, onti yontivativavageta, teranika onkoneagite-timoteri, onti inea kero pavatsaasemata. Garika pisureigarо Iriniane Tasorintsi, intagatirika pisuretakovageigakempa timagetatsirira aka kipatsiku onti pamatavinaigaka tsikyata viroegi, kañoigamatakavi terira inea igumate, ontari apavatsaasetimoigakari.

²⁴ “Gara tyani gaveatsi intimakera piteni shintaririra inkematsatasanoigakerira piteniro. Panirotyo irishineventakempa inkematsatasanotakerira, yogari irapitene gara ikematsatiri, gatanika ishineventari. Ario ikañotaka tyanirika kogankitsine irashintaarantavagetakempara garatyо ikogumati inkematsatasanotakerira Tasorintsi.

*Tasorintsi impaigakeri kematsatasanoigiririra
magatiro ikogakogeigakarira*

(Ir 12.22-31)

²⁵ “Nonkantantaigakempirira gara povankinaventaigarо pisekaegi pinkantaigakera: ‘Maikaniroro kamani ¿tatarikatyо nogaempа?’ Aikiro gara povankinaventaigarо pogaguigakemparira pinkantaigakera:

‘¿Tyarikatyo nagakero nogagutaemparira?’
 Kañotari pisure paniantaigarira yagaveaketyo
 Tasorintsi itimakagakerora irorompari piseka
 paipo impaigakempiro. Ario okañotaka
 pogaguigakemparira, kañotari yagaveakera
 Tasorintsi itimakagakerora pivatsa irorompari
 pogaguigakemparira paipo impaigakempiro.
26 Pineaigiritari aragetatsirira teratyo impanki-
 vaseigavetempa, aikiro teratyo ontimavetempa
 irogantaigakemparorira iseka iriatapiniigakera
 iragapiniigakera isekataigakempara, kantankicha
 Piri timatsirira enoku ipaigirityo
 irogaigakemparira. ¡Viroegimparorokari paipo
 impaigakempi pisekaegi pogaigakemparira,
 paipotari pavisaigakeri aragetatsirira! **27** Antari
 povankinaventaigemparora pinkimoiganakera
 ¿matsi ario pagaveaigake pinkimoiganakera?
 Garatyo pagaveimaigi.

28-29 “Iroroventi ¿tyara okantakara
 povankinaventaigakarora pogaguigakemparira?
 Pineaigironirorotyo oka otegapage tsikyata
 oshivokashiigaroirori tera antumaigavetempa,
 aikiro tera onkirkaiagavetempa akyari okameti-
 vaseigi avisagagetaketyo kara okametitakera,
 avisagetakerotyo kamisa kametimagorisanorira
 pairanitirira yogagutarira koveenkari Saromon
 pairorira avisake okametimagotakera.
30 Kañotari oka otegapage porenkamaivagetake
 ikametitagagetirora Tasorintsi, kantankicha
 kamani ovatuakenkani ontagakenkanira,
 ¡viroegimparorokari paipo impaigakempi
 pogaguigakemparira! Kantankicha viroegi tera
 pinkematsatasanoigeri onti povankinaventaiga

posantepage. ³¹ Nonkantantaigakempirira gara povankinavageiga pinkantaigakera: ‘¿Tatarika nogaempa? ¿Tatarika novikaempa? ¿Tyarikatyo nagakero nogagutaemparira?’ ³² Intitari kañoigiro maika yogaegi terira inkematsaige yovankinaventaigarora posantepage, irorotari ipiriniventaigi iriroegi. Kantankicha viroegi gara pikanoigiro maika, aiñotari Piri timatsirira enoku. Irirori yogotake omirinka tatarika oita pikogakoigaka. ³³ Irorompatyo pinkogasanoigake pimpiriniventaigakerora magatiro ikogagetirira Tasorintsi pintsatagaigakerora, impo irirori impaigakempiro magatiro pikogakogeigakarira. ³⁴ Gara povankinaventaigaro pinkantaigakera: ‘¿Tyarikatyo nonkantanakempa kamani?’ Omirinkatari kutagiteri aityo posantepage tsipereakagaigakempirira pisuretakoigakemparira. Onkutagitevetanaempa pashinikyatyo timaatsine osuretakotaenkanirira.

7

*Gara iniashinatagani atovaireegi kogapage
(Ir 6.37-38, 41-42)*

¹ “Gara piniashinaigari pitovaireegi kogapage pinkantaigakera yovetsikaigake terira onkametite ganiri ikisashiigimpi Tasorintsi impogini. ² Pinkantantavageigakerika kogapage pantsipereakagaigakera ariotyo inkañotagaigakempi viroegi impogini inkisaigakempsyo iratsipereakagaigakempsira irirori. Tyarika pinkantaigakeri pashini ariotyo inkañotagaigakempi Tasorintsi irirori. ³ ¿Tyara pikantakara pikanomajaigirira vetsikaigirorira

terira onkametite? ¿Matsi tera pineero
pashi virompatyo viro pairo pogagaka?

⁴ Kañomatakatyo ontinirika pikantanakeri
pitovaire: ‘Atsi taina nogotagakempi ganigeniri
pikañovagetaa’, tenirikatyo pineemparo viro
tyarikaroro apatoventavagetakempsyo kara.

⁵ ¡Ontityo pineakagantavintsatakara! Atsi
negintetasanovagetempanityo viro kameti
pagaveakeniri pinkanomaantakera.

⁶ “Gara pikenkitsatimoigiri Iriniane Tasorintsi
samatsanaigirorira garira onti inkisaigakempi.

Tyara inkantakenkani iriniakenkanira Tasorintsi

(Ir 11.9-13; 6.31)

⁷ “Neviigeri Tasorintsi tatarika pikogako-
geigaka impo irirori impaigakempirotyo.
Pinkogasanoigakerorika pineakoigakemparotyo.
Atanatsirika pinevinatakeri Tasorintsi
inkemaigakempsyo impaigakempirora. ⁸ Yogari
nevitantatsirira ipunkani. Yogari kogankitsirira
ineakero. Aikiro yogari tyanirika atanatsirira
inevitantira ikemunkani ipunkanityo. ⁹ ¿Matsi
pinkañoigera viroegi inevitempira pitomi
pan pinoshike mapu pimperi? ¹⁰ Intirika
inevitakempi shima, ¿pinoshike pimperi maranke?

¹¹ Kañotari viroegi pikañovageigavetari akyari
pipaigiri pitomiegi tatarika oita kametiripage
ineviigakempirira, jiriromparorokarityo Piri
timatsirira enoku pairorokari impaigakempiro
tatarika oita kametiripage pineviigakeririra!

¹² “Irorotari nonkantantaigakempirira
pikogaigakerika inegintevageitakempi

iroroventi pinegintetantavageigaketyo viroegi aikiro. Ariotari okantiri itsirinkakotanakerira Moiseshi ontiri aikiro itsirinkakoiganakerira kamantantaigatsirira.

*Sotsimoro maaniñakitirira
(Ir 13.24)*

¹³ “Pinkiantaiganakemparora sotsimoro maaniñakitirira, aityotari pashini sotsimoro omaranakini ontiri aikiro avotsi ariopokirikatyo onake atatsirira savi morekariku. Onti okenantavintsatantanagirira iatantaigarovaini matsigenkaegi. ¹⁴ Kantankicha ogari apipokitene avotsi maanisano ochapavokivagetaka onti oavokitake enoku Tasorintsiku. Gara ineaigairo igamane maganiro kenantanakemparonerira. Ario okañotaka sotsimoro irorori maaniñakisano okañovagetaka. Tesakona intovaiige neaigakeronerira inkiantaiganakemparora ganiri ineaigairo igamane.

*Ogari inchatopage onti oneantagani oi
(Ir 6.43-44)*

¹⁵ “Tsikyanira yamataviigimpikari kenkitsatakotamampegaigaririra Tasorintsi inkañoigavetapaakempari ovisha terira tyara inkantantavagete, kantankicha onti ikañoigakari matsontsori pogereantatsirira. ¹⁶ Viroegi onti pineantaigavakempari irororika yogotagan-taigake Niagantsisanorira ontirika yogagaigakero iramatavinaigakempira. Pineaignironiroro ova tera oneenkani ontimantemparora kivitsa. Ario okañotaka igo tera oneenkani ontimantemparora tanko. ¹⁷⁻¹⁸ Ario okañotaka inchatopage. Magatiro timatsirira oi ogaganirira

gara agaveimati ontimera oi terira ogenkani. Intagatityo timankitsine oi ogaganirira. Ario okañotaka aikiro inchatopage timatsirira oi terira ogenkani gara agaveimati ontimera oi ogaganirira. Intagatityo timankitsine terira ogenkani. ¹⁹ Ogari timatsirira oi terira ogenkani onti otogagani impo otagunkani. ²⁰ Ario ikañoigaka matagavageigacharira iroro pineantaigavakempari tera inegintevageigempa, aikiro tera katinka irogaigero yogotagantaigira.

*Gara itimimoigiri Tasorintsi maganiro kantaigavetakemparinerira: ‘Notinkami, Notinkami.’
(Ir 13.25-27)*

²¹ “Antari impogini irapatoitaigakerira Apa maganiro kematsaigiririra impegakempara Igoveenkariegite, gara itimimoigiri yogaegi maganiro kantaigavetakenanerira: ‘Notinkami, Notinkami.’ Intaganityo timimoigakerine vetsikaigakeronerira ikogagetakerira irirori. ²² Antari aganakempara kutagiteri nonkisantaigakemparirira maganiro terira inkematsaigena tovainityo kantaiganakenane: ‘Notinkami, Notinkami, nokenkitsatakoigakempi, aikiro naventashiigakari pivairo noneaganontaigakarira itimaguigakerira kamagarini, aikiro novetsikaigakera terira oneimagekenkani nokantaigake vinti gaveakagakena.’ ²³ Kantankicha naro nonkantaigerityo: ‘Teratyo naro shintaigempine. ¡Piaigetyo parikoti maganiro viroegi vetsikagisevageigirorira terira onkametite!’

*Jeso ikantakoigakerira matsigenka
ikañotagaigaikerira vetsikirorira pankotsi
(Mr 1.22; Ir 6.47-49)*

²⁴ “Maika nonkantaigakempi tyanirika kematsatakenane irovetsikagetakerora nokantagerikerira onti inkañotakempari govagetatsirira yovetsikakerora ivanko ikigantashitakero yogavagetakerotyo savi kameti onkusotasanotakeniri. ²⁵ Impogini oparigavetanaka inkani okimoatanake nia, otampiavagetanaketyo jiriririri, kantankicha teratyo agaveero ontuanakerora, okusotasasanotaketari. ²⁶ Yogari kemisantavetakenarira kantankicha tera irovetsikero nokantakeririra onti ikañotakari terira irogote yovetsikakerora ivanko tera irogasanotero savi ²⁷ impo opariganake inkani okimoatanake nia, otampiavagetanaketyo jiriririri ogatyo okenake otuanakero okantavageti togn, teranika onkusotasanote.”

²⁸ Impo yagatanaira Jeso ikenkitsavagetakera yogavageiganaketyo kavako maganiro kemisan-taigakeririra, ²⁹ ineraigaketari yogotagaigaikerira yogovagetiratyo kara, tera ario inkañoiemparsi gotgantaigirorira itsirinkakotanakerira Moiseshi.

8

*Jeso yovegairira vesegasenari
(Mr 1.40-45; Ir 5.12-16)*

¹ Impogini yanonkaara Jeso ipokaira, yogiaigapaakeri tovaini matsigenkaegi. ² Ikenapaake paniro vesegasenari itigeroaventapaakari ikan-tiri:

—Notinkamii, nokogavetaka povegaenara, kantankicha impatyora viro tyarika pinkante.

³ Yogari Jeso yakontsaanake itsagatakeri ikan-tiri:

—Jeeje, nokogake, jmaika veganaempa!

Irorotyo ikantakerira ogatyo ikenake yoveg-anaa yovesegavetakara. ⁴ Impo ikantavakeri Jeso:

—Gara tyani pikamantumati. Inti piatimotake saserorote pokotagakemparira ontiri aikiro pamagetanakenerira piratsipage pintsatagakerora ikantakerira Moiseshi kameti ineasanotakempiniri ovashi inkantakempi vegaavi irogoigakempiniri maganiro vegasanotaavi.*

Jeso yovegairira iromperane itinkamiegi soraroegi

(Ir 7.1-10)

⁵ Impogini iatanake Jeso Kaperenaoku. Iroro yogenketapaakara ineiri ikenapaake paniro iroman. Irirori inti itinkamiegi soraroegi. Impo ikantapaakeri:

⁶ —Notinkami, imantsigavagetanake nomperane aiño inoriaka anta novankoku. Ishinkogise-vagetanaka yatsipereavagetaketyo kara.

⁷ Ikantiri Jeso:

—Iroroventi noatake novegaerira.

⁸ Inianake itinkamiegi soraroegi ikanti:

—Notinkami, garorokari pikiimatiro novanko, nogotaketari vinti gaveavagetatsirira. Piniimatakeria intagatityo irovegantanaempa nomperane. ⁹ Kañotari naro itimavetari

* ^{8:4} Ire 14.1-22

peraiganarira, akyari itimi nashi nomperaneegi. Tyarikara nonintake nontigankakerira ikematsatakenatyo iatake. Pashinikya nokaemirira ipokake. Aikiro aiño pashini tatarika nomperatakari ikematsatakenatyo.

¹⁰ Iroro ikemavakerira Jeso ikantakera maika yoganaketyo kavako ikantaigiri giaigapaakeririra:

—Arisanotyo nonkantasanoigakempi teratyo noneimageteri paniro Iseraerekunirira inkañotakemparira yoka iromano yogotasanotakera nagaveavagetira. ¹¹ Impogini irapatoitaigakerira Tasorintsi maganiro kemattaigiririra impegakempara Igoveenkariegitte iripokaigake pashini tovaini terira iriroegi jorioegi imponiageigamatempatyo samani parikotipageku. Imponiageigamatempatyo oatakara ikontetira poreatsiri, pashini imponiageigamatempatyo iatira poreatsiri intentaigakemparira Averan, Isaako intiri Jakovo isekataigakempara, ¹² kantankicha yogaegiri jorioegi ikogavetakarira Tasorintsi intentaigakemparimera garatyo intentaigari, onti intigankaigakeri parikoti apavatsaasevagetara. Antari anta inkantakan iriraguntevageigakempa inkaemavavageigaketyo kara iratsikagisevageiganakerotyo irai.

¹³ Impo ishonkashitari itinkamiegi soraroegi ikantiri:

—Maika piatae pivankoku, pogotaketari na-gaveakera novegaerira pomperane, maika irovegaempaty.

Iroro iniakera Jeso ogatyo ikenake yoveganaa.

*Jeso yovegairora yagashintotirira Perero
(Mr 1.29-31; Ir 4.38-39)*

¹⁴ Impogini iatake Jeso ivankoku Perero in- eapaakero yagashintotirira mantsigatake nori- aka oanativagetakera. ¹⁵ Itsagatapaakero akoku ogatyō okenake opeganaka oanatire ovashi oti- naanaa opakoigakeri ise kатаigakempa.

Jeso yovegaigakerira tovaini mantsigaigankitsirira

(Mr 1.32-34; Ir 4.40-41)

¹⁶ Impogini ochapinitanakera yamaiga- paakeneri Jeso tovaini itimaguigakerira kamagarini. Irorotyo iniakera Jeso ogā ikenaigake kamagarinipage iokaiganairi itimaguigavetakarira iaigaira parikoti. Aikiro yamaigapaakeneri tovaini mantsigaigankitsirira, yovegageigairi maganiro. ¹⁷ Ariotari ikantakeri pairani kamantantatsirira Isaiashi ikamantakotakerira ikantakera: “Yatsipereaventaigakaira akañovageigara, aikiro yovegaigakaira amantsigaigakera.”

*Kogaigavetankicharira irogiaiganakerimer
Jeso*

(Ir 9.57-62)

¹⁸ Antari ineaigakerira Jeso yapatoven- taiganakarira tovaini matsigenkaegi ikantaigiri irogamereegi:

—Tsame amonteaiganakera intati.

¹⁹ Impo ikenapaake gotagantirorira itsirinkakotanakerira Moiseshi ikantiri Jeso:

—Gotagantatsirira, nokogake nonkantakanira nogiavageta kempa.

20 Ikanti Jeso:

—Yogari etini aityo ikiantarira. Ario ikañoigaka tsimeripage irirori aityo imagantaigarira, kantankicha yogari Kañotasanotakaririra Matsigenka teratyoy ontine ivanko irimagantakemparira.

21 Impogini inianake paniro irogamere ikanti:

—Notinkami, nokogavetaka nogiatanakempimera, kantankicha aiñokyatari apa gatata noppoki. Antari inkamanaera nonkitatanaerira, ario pinkante nompokake nonkantakanira nogiavagetanakempi.

22 Ikanti Jeso:

—Giavagetenatyo maika. Yogari igamagapage kantetyo inkitaigaerira terira inkematsaigeri Tasorintsi.

*Okematsakerira Jeso tampia ontiri inkaare
(Mr 4.35-41; Ir 8.22-25)*

23 Impo yomatetanaka Jeso pitotsiku intentaiganaari irogamereegi iriaigaera intati.

24 Osamanitanakera otampiamatanaketyo omaranerikatyoy tampia kara jiriririri ogatyoy okenake ovoresekantanake inkaare osagusagutanakerotyo pitotsi. Yogari Jeso magasevagetake.

25 Itsarogaiganake irogamereegi yogireaigutaryoy ikantaigiri:

—¡Notinkamii, tainakario atake atsiti-gakoiganake!

26 Irirori ikantaigiri:

—¿Antari gara pitsarogaigi? ¡Tekya pogotasanoigero yagaveavagetira Tasorintsi!

Itinaamatananakatyoy inianakerora tampia ikan-tiro:

—¡Peganaempa, intaga pitampiati!

Iniiro aikiro inkaare ikantiro:

—¡Maireatanae!

Ogatyō okenake opeganaa tampia, ario okañotaka inkaare irorori omaireatanai.

²⁷ Iriroegi yogavageiganaketyo kavako ikan-taiganakera:

—¿Tyanimpatyora yoga, nerotyo okematsage-matanakerira tampia irorori ontiri inkaare?

Jeso yoneaganontaigaarira itimaguigakerira kamagarinipage

(Mr 5.1-20; Ir 8.26-39)

²⁸ Antari yogonketapaakara Jeso intati Gararaku ikenaigapaake piteni matsigenka itimaguigakerira kamagarini. Iriroegi onti iponiaigapaaka imperitanakiku yogantanagirira igamaga. Isurarivageigiratyō kara ipinkasanovageigunkani, teratyō tyani kenantumatemparone avotsi atacharira inaigakera. ²⁹ Impo ineaigavakerira Jeso ikaemavaitanake ikantaigiri:

—¡Eeee! ¡Jeso, Itomi Tasorintsi, arionena gara tyara pikantaigana! ¿Iroro pipokashitake pantsipereakagaigakenara maika tekyauenkara agumatempa nantsipereantaigakemparira?

³⁰ Ario inaigake kara shintori isekatavageigakara itovaigavagetiratyō kara. ³¹ Impogini yogari kamagarini timaguigakeririra inianiaiganakeri Jeso ikantaigiri:

—Poneagaigakenarika onti pintigankaigakena nontimaguigakerira shintori.

³² Ikanti Jeso:

—Nanityo piaige.

Igenanekyatyo ikonteigapanuti iokaiganairi itimaguigavetakarira irirokya iatashiigavetaka shintori. Iroro itimaguigavetaakarira ogatyo ikenaigake ishigaiganaka otseraaku yanonkaiganaka iokaavioigaka pokorom pokorom pokorom, ipogereraigakatyo maganiro.

³³ Iroro ineaigavakerira sentaigiririra itsarogavageiganaketyo kara ishigaiganaka iaigai itimaigira ikamantageigapaakeri itovaireegi iokajaigakara shintori. Aikiro ikamantaigapaakeri tyara ikantaiganaka itimaguigavetakarira kamagarinipage.

³⁴ Ikemaigutatyo iriroegi iaigake anta inakera Jeso ikantaigapaakeri:

—Nokogaigavetaka piataera parikoti.

9

*Jeso yoganuitairira shinkogisenari
(Mr 2.1-12; Ir 5.17-26)*

¹ Impogini yomatetanaa Jeso pitotsiku imonteanaa iataira itimira. ² Impo ipokaigapaake pashini matsigenkaegi ikompitakoigapaakeri paniro shinkogisenari yamaiganakenerira irovegaerira. Antari ineaigakerira Jeso arisano opaitaka yogoigakera iragaveakera irovegaerira ikantantakaririra shinkogisenari:

—Notomi, shinetanakempa. Maikari mataka omagisantaagani magatiro povetsikagetakerira terira onkametite, garatyo ikenkiagaimpiro Tasorintsi.

³ Ario inaigake kara gotagantaigirorira itsirinkakotanakerira Moiseshi. Ikemaigavakerira ikantakera maika, iniasurentavageiganaka

ikantaigi: “Antari gara ikañota maika, ont
ikañotagumanatanakari Tasorintsi.” ⁴ Kantankicha
Jeso yogoigavakerityo iniasurentaigakara
ikantaigutarityo:

—¿Tyara pikantaigakara piniasurentaigakara
pikañoiokerora maika? ⁵ ¿Tyatimpayyo pairo
avisake okomutakara? ¿Irororika nonkantakerira:
‘Maikari mataka omagisantaagani magatiro
povetsikagetakerira terira onkametite,
garatyō ikenkiagaimpiro Tasorintsi’, ontirika
nonkantakerira: ‘Tinaanake n utanake’?
⁶ Maika noneakagaigakempi yagaveake
Kañotasanotakaririra Matsigenka imagisan-
takoigaerira matsigenkaegi magatiro terira
onkametite yovetsikageigirira.

Impo ovashi ishonkatetanakari shinkogisenari
ikantiri:

—Tinaanake, ganaero pinoriantakarira, piatae
pivankoku.

⁷ Ogatyo ikenake itinaanaka iatai ivankoku.
⁸ Antari ineaigavairira maganiro patoitaigan-
kicharira itsarogavageiganaketyo ovashi
ishineventaiganakari Tasorintsi ineaigakera
onti yagaveakagaigakeri matsigenkaegi irovets-
sikaigakera posante terira oneimagetenkani.

*Jeso ikantakerira Mateo irogijatanakerira
(Mr 2.13-17; Ir 5.27-32)*

⁹ Impogini iatake Jeso ikenanakera kara in-
eapaakeri paniro surari ipaita Mateo. Irirori
onti ipirinitake anta pankotsiku itimashiigavak-
erira visapiniigatsirira ikogantaigavakarira ko-
riki maganiro maiganankitsirira iarakipage on-
tirika tatapagerika oita, intitari kogantiniririra

koveenkari koriki. Impo yogari Jeso ikantapaakeri:

—Tsame, pogiatanakenara.

Irirori ikaviritapanuta iatanake yogiatanakerira.

¹⁰ Impogini Jeso iatake ivankoku isekatavagetakara itentaigakari irogamereegi intiegiri aikiro pashini kogantaigaririra itovaireegi koriki irashi koveenkari intiegiri aikiro pashini kañovageigacharira. ¹¹ Yogari pariseoegi ineraigakerira Jeso itentaigakarira isekataigakara ikantaigiri irogamereegi:

—¿Tyara ikantakara yoga gotagaigimpirira isekatakavageigakarira kogantaiginiririra koveenkari koriki intiegiri aikiro pashini kañovageigacharira?

¹² Antari ikemavakera Jeso ikantaigiri:

—Yogari terira imantsigaige tera inkoigakampari gavintantatsirira. Intagani kogakoigari mantsigaigankitsirira. ¹³ Piaigae pisuretakoigakemparora pogoigakeroniri ikantakerira Tasorintsi ikantakera: ‘Pairo avisake nokogakera pintsarogakagantaigakempara, avisakero povetsaigakenarira piratsipage pintagaigakenarira.’ Teranika iriro nompokashiige terira inkañovageigempa nonkantaigakerira inkantatigaiganakempara, intityo nopokashiigake kañovageigacharira kameti inkantatigaiganakempara irapakuaignakerora yovetsikageigakera terira onkametite.

*Tyara okantaka tera irapakuapiniige irogamereegi Jeso gara isekataiga
(Mr 2.18-22; Ir 5.33-39)*

14 Impo ipokaigapaake irogamereegi Joan Giviatantatsirira ikantaigapaakeri Jeso:

—Naroegi intiegiri pariseoegi napakuapiniigi tera nosekataigempa, kantankicha yogari pogamereegi tera ario inkañoigempa maika. ¿Tyara ikantaigakara?

15 Impo irirori ikantaigiri:

—Pine intimera pashini ikyarira gankitsi itsinanetsite inkaemaigakeri iamigoegite isekatagaigakemparira, ¿matsi gara isekataiga? Isekataigakempaniroro, itentaigakaritari kaemaigakeririra ishinevageigaka. Kantankicha antari aganakempara inkisakenkanira iramanakenkanira parikoti ario pinkante impitashiigakemparotyo kogapage gara isekataigaa, inkenkisureakoiganakemparitari.

16 “Tera onkametite pinkematsatagarantaigerora yogotagaigakempirira pariseoegi irorokya pimaigavake nogotagaigakempirira naro. Ontinirikaty okañotakaro onkotatenkanira kamisa ogantagarira onkotatantenkanira okyamagokyarira. Onkivavetanakempa oga onkenake ontsiomagotanakempa ariompa ontsaraanakerori. **17** Aikiro ontinirikaty okañotakaro ompiaatenkanira vino okyaakyarira tekyarira ompoitompiaatantenkanira kaverameshina igantagarira atakerira yaratsimeshinatanake. Ompoivetanakempa aravonkanake oga onkenake ontempoanakeri imeshina ovashi ontsaraanakeri osanakempsa vino, aikiro iraparatakempsa imeshina irisaraanakera. Nerotyo paio okametitake ompiaatantenkanira ikyameshinakyarira kameti

ganiri aparaata vino, aikiro ganiri yaparata imeshina.”

*Jeso yoganiairora irishinto Jairo
(Mr 5.21-43; Ir 8.40-56)*

18 Aiñokyara iniavageti Jeso ikenapaake paniro itinkamiegi jorioegi ipaita Jairo itigeroaventa-paakari ikantiri:

—Okyaenka kamanankitsi noshinto. Tsame pimpatikaituterora ogitoku anianaeniri.

19 Impo ikaviritanaka Jeso yogiatanakeri ivankoku itentaiganaari irogamereegi.

20 Ario onake aikiro kara paniro tsinane mantsigavagetankitsirira oseriintevagetanityo pairani ogatyo onakotanake 12 shiriagarini tera ogote ovegaempara, teranika onkaraagaenika oriraa. Irorori aiñonitanakari okenashitapaakeri itishitaku otsagatakotapaakeri okaratsaiku imanchaki. **21** Oniasurentavagetakatari inkaara okanti: “Intagatityo nontsagavetakemparo imanchaki noveganaempatyo.” **22** Impo ishonkanaka Jeso ineiro aratinkake ikantiro:

—Noshinto, shinetanakempa. Maika pogotake-tari nagaveakera novegaempira, nerotyo povegantaarira.

Ovashi ovegasanovagetanaa. **23** Impo iroro yagonketapaakara ivankoku Jairo ineaigapaakeri kovuvageigatsirira kovuigamatake. Yogari iragatsikaigaririra igamaga iragaigamataka kae-mavaimataketyo kara. **24** Ikantaigapaakeri:

—Atsi meraiganake konteiganake. Tera ario onkame, onti omagake.

Ogatyo ikenaigake ikavakavaimatanaketyo ikaavintsanaiganakerira. ²⁵ Iroro yogikonteigakerira ikianake tsompogi ikatsavakotapaakero. Ogatyo okenake otinaanaa okaviritanaa. ²⁶ Impo ovashi maganiro timageigatsirira kara parikotipageku ikemakoigakeri yoganiairora irishinto Jairo.

Jeso ineaigairira piteni terira ineaige

²⁷ Impogini iatanaira Jeso yogiaiganakeri piteni terira ineaige ikaemakonaigavakeri ikantaigiri:
—Viro, Iyashikitannerira Iravi, tsarogakagavag-eigenakario!

²⁸ Impo yogenketapaakara Jeso pankotsiku ikiapaake tsompogi. Yogaegiri terira ineaige giaigapaaikeririra yaiñoniigapaakari. Inianake Jeso ikantaigiri:

—¿Tyara pinkantaige viroegi? ¿Nagaveake noneakagaigakempira?

Iniaiganake iriroegi ikantaigiri:

—Jeeje, Notinkami, pagaveakeniroro.

²⁹ Impo itsagaigakeri irokiku ikantaigiri:
—Iroroventi pogoigaketari nagaveakera noneakagaigakempira, maika neaigakevi.

³⁰ Ogatyo ikenaigake ineaiganake. Impo Jeso ikantaviigavakeri ikantaigiri:

—Arisanora tsikyanira pikamantantaigirokari.

³¹ Kantankicha teratyo inkematsaigeri. Irorotyo iaigaira ikamantantageiganakero tyara ikantaigakeri Jeso ineaigakakerira.

Jeso iniakagakerira terira irinie

³² Choeni osamanitanake ikenaigapaake pashini yamaigapaakeneri terira irinie,

itimagutakeritari kamagarini. **33** Irorotyo yoneaganontaarira Jeso ogatyo ikenake inianai. Yogavageiganaketyo kavako maganiro ikantaiganakera:

—Teratyo oneimagetenkani kañopagerira oka!

34 Kantankicha yogaegiri pariseoegi ikantaiganaketyo:

—Irirori arisano yagavei yoneagagetarira kamagarinipage timaginegakeririra matsigenka, intitari gaveakagakeri itinkami kamagarinipage.

Jeso itsarogakagaigakari maganiro

35 Impogini iatake Jeso ikenanake kara itsotenkanakero apatogetakara pankotsipage yogotagantagematanake pankotsipageku yapatoitantaigarira jorioegi ikamantaigakerira maganiro tyara inkantaigakempa kameti irogavisaakoigakeriniri Tasorintsi impegakempara Igoveenkariegite. Aikiro yovegagematityo tovaini oposantetashigeigakarira mantsigarintsipage, tenigetyo tyara inkatsitumageigae paa vegasanolageigaa. **36** Antari ineaigakerira maganiro yapatoventaigapaakarira itsarogakagaiganakarityo kara ineaigakeritari yatsipereavageigakera posantepage ikenkisureavageigakara, onti ikañoigakari ovisha terira intime sentiririra.*

37 Impogini ikantaigiri irogamereeegi:

—Nonkantasanoigakempi aiño tovaini kogakoigankicharira irogoigakera tyara inkantaigakempa kameti irogavisaakoigakeriniri Tasorintsi impegakempara Igoveenkariegite,

* **9:36** Nm 27.16-17

kantankicha tesakona intovaige gotagaigakerineririra. Onti ikañoigakaro osampatira turigoki ogatuitakoni tesakonara intovaige gaigakeronerira. ³⁸ Irorotari maika nonkantaigakempi piniaigakerira Tasorintsi pinkantaigakerira intigankaigakera gotagaigakerineririra.

10

*Jeso yagaveakagaigakerira irogamereegi
(Mr 3.13-19; Ir 6.12-16)*

¹ Impo iroro yagatanakera Jeso iniaavagetakera ikaemaigakeri irogamereegei naigatsirira 12 ovashi yagaveakagaigakeri ironeaganontaigakemparira itimaguigakerira kamagarinipage, aikiro irovegägeigakerira oposantetashigeigakarira mantsigarintsipage.

² Iriroegi ontì ikantaigunkani aikiro iritigankaneegi. Onti ipaiigaka:

Sumo, ikantanagirira aikiro Perero;

Anturishi, irirenti Perero;

Santiago intiri Joan, itomiegi Severeo;

³ Jeripe,

Varitorome,

Tomashi,

Mateo, kogantiniririra koveenkari koriki;

Santiago, itomi Arejeo;

Tareo,

⁴ Sumo komperagetatsirira, intiri

Jorashi Ishikariote, gakagantakeririra Jeso.

*Jeso itigankaigakerira irogamereegei iriaigakera
inkenkitsavageigakera
(Mr 6.7-13; Ir 9.1-6)*

⁵ Impogini itigankaigakeri ikamantaigavakeri ikanti: “Gara piatimoigiri terira iriroegi jorioegi pogotagaigakerira. Yogaegiri Samariakunirira garatyō pikamosotumaigiri anta itimageigira. ⁶ Intagani piatimoigake maganiro iseraereegi, ontitari ikañoigakari ovisha timpinaigankitsirira. ⁷ Maika piaige pinkenkitsatimoigakerira pinkantaigakerira panikya aganakempa impegantakemparira Tasorintsi Igoveenkariegite maganiro kematsaigakerinerira. ⁸ Povegaigaerira vesegasenari intiegiri aikiro pashini mantsigaigankitsirira. Poganiaigaerira kamaigankitsirira, aikiro poneaganontaigakemparira itimaguigakerira kamagarinipage, kantankicha garatyō pikogantaigari. Kañotari naro teratyō nonkogantaigempi nagaveakagaigakempira, ario pinkañoigake viroegi garatyō pikogantaigari yogaegi tyanirika povegaigaerira.

⁹ “Gara pamumaigi koriki. ¹⁰ Gara pamaigi pitsagine. Intagatityo pamaiganake pamagotiro pimanchaki pogaguigakarira, aikiro pisapatote pisapatoigakarira. Gara pamaigi pigotikiro. Maganirotari piriniventavageigirorira ikogagetirira Tasorintsi kametitaketyo impaigakenkanira iseka.

¹¹ “Tyarika kara pogonkeigapaakempa aiñorika negintevageigacharira, iriro pimagimoiganake kigonkero piaiganaera parikoti. ¹² Piaigakerika ivankoku pinkaigapaakera piniaigapaakerira pinkantaigeri: ‘Nokogake inkavintsajaigakempira Tasorintsi.’ ¹³ Irishineventaigavakempirika inkemisantaigakempira pinkenkitsatimoigak-

erira irirokya shineventaigakemparine Tasorintsi inkavintsajaigakerira. Antari garikara ishineventaigavakempi garatyo ishineventaigari Tasorintsi inkavintsajaigakerira, panirotyo inkavintsajaigakempira viroegi. ¹⁴ Antari tyarika piaigake kara garikara ishineigavakempi piaigake parikoti, kantankicha oketyo pimpotevonkititasanoiganaemparo kipatsipane pagatikakoigakeririra. ¹⁵ Maika nonkamantasanoigakempi impogini aganakempara inkisashitantakempara Tasorintsi pairotyo inkisashiigakempari yogaegi terira irishineigavakempi avisagetakerotyo inkisashiigaemparira timaigavetankicharira pairani Soromaku ontiri Gomoraku.*

*Iratsipereakagaigakenkanira irogamereegi
Jeso*

¹⁶ “¡Atsi gaige kavako! Naro nontigankaigakempi itimaigira kisantaigatsirira iratsipereakagaigavakemptyo kara kañomataka intinirikatyo notigankake ovisha iriatakera yapatotara garirira ovisha. Onti pinkañoigakempari maranke yogovagetira, kantankicha gara pagashitantavageiga, aikiro gara pipugatsatantavageiga ontí pinkañoigakempari shiromega. ¹⁷ Tsikyanira ikisaigimpikari iramaiganakempira pitinkamiegiku inkisakagantaigakempira impasapasataganataigakempira pankotsipageku yapatoitantaigarira pitovaireegi. ¹⁸ Gara intagati oka. Iramaiganakemptyo aikiro koveenkaripageku inkisakagantaigakempira

* **10:15** Jen 19.24-28

ovashi pimaiganakeri iriroegi pinkenkitsati-moiganakerira intiegiri aikiro maganiro terira iriroegi jorioegi pinkamantakoigakenara naro. ¹⁹ Antari iramaiganakempira koveenkaripageku gara pisureigarо tyarika pinkantaige. Gara pikantaigi: ‘¿Tyarika nonkantaigeri?’, isuretagaigakempitari Tasorintsi kameti pogoiгakeniri tyara pinkantaige. ²⁰ Gatanika tsikyata piniaigi viroegi, intitari suretagaigakempine Isure Tasorintsi timasurentaigakempinerira.

²¹ “Intimaiganake tovaini matsigenkaegi imparantaiganakempari irirentiegi irogakagantaigakerira, pashinikya gakagantaigakerine itomiegi. Ario inkañoigake pashini imparantaiganakempari iriri irogakagantaigakerira.

²² Maganirosanotyo inkisaviiganakempiro pikematsaigakenara, kantankicha yogari tyanirika tsipereakotanankichanerira garira yapakuimati ikematsatakenara ovashi inka-manake iriro pinkante irogavisaakotakenkani.

²³ Tyarika kara iratsipereakagaitakempira, piaigakera pishigaiganakera parikoti. Arisanotyo nonkantasanoigakempi tekyara pintotenkaigero magatiro itimaigira iseraereegei pinkenkitsati-moigakerira, impigaate Kañotasanolakaririra Matsigenka.

²⁴ “Yogari yogotagaganirira teratyо iravisumateri gotagiririra. Ario ikañotaka yonampitaganirira teratyо iravisumateri nampitaririra. ²⁵ Aikiro yogari yogotagaganirira ariotyo inkañotakempari gotagiririra. Ario ikañotaka yonampitaganirira ariotyo inkañotakempari nampitaririra. Kañotari naro Pitinkami akyari

ikantaitana Veresevo viromparorokari pairo irogagaitakempi.

*Panirosanotyo impinkakenkanira Tasorintsi
(Ir 12.2-7)*

²⁶ “Irorotari nonkantantaigakempirira gara tyani pipinkumaigi, magatirotari terira ogotenkani maika impoginityo ogotakenkani. Ario okañotaka magatiro omanagetunkanirira maika impoginityo ogikoneatakenkani. ²⁷ Narori mairenii nogotagaigakempi, kantankicha viroegikya gitivarokaigakerone pinkaman-taigakerira maganiro. ²⁸ Gara pipinkaigiri gaveaigankitsinerira irogamagaigakempira. Iriroegi irogamagaigakempirika intagatitari kamankitsine pivatsa, kantankicha garatyo yagaveimaigi irogamagaigakerora pisure. Inti pimpinkaigake Tasorintsi, panirotari ikantara irirori yagaveira inkantakera tyani kamankitsine impo iragaveake intigankakerora isure morekariku. ²⁹ ¿Matsi tera pineaigeri tsimeripage intagatira ipunata piteni tsimeri pamentyakiniro koriki?, kantankicha teratyo inkamumate paniro terira iriro kogatsine Piri. ³⁰ Kañotari pigishiegi akyari yogotiro papeapagetiro. ³¹ Irorotari nonkantantaigakempirira gara pitsarogaigi, pairotari pavisavageigakeri tsimeripage.

*Terira impashiventagaigempari Jesokirishito
(Ir 12.8-9)*

³² “Maika nonkantantaigakempi tyanirika kantasanotankitsine ikematsatasanotakenara inkamantaigakerira itovaireegi, ariotyo nonkañotakemba naro impogini nonkantaketyo:

'Nanti shintari', inkemakenara Apa timatsirira enoku. ³³ Kantankicha tyanirika kantankitsine: 'Tera nonkematsateri Jeso, inkante', ariotyo nonkañotakempa naro impogini nonkantaketyo: 'Tera naro shintemparine', inkemakenara Apa timatsirira enoku.

*Tera iroro iripokashite Jeso inkantaigakerira
maganiro irishinevakagaigaikempara
(Ir 12.51-53; 14.26-27)*

³⁴ "Viroegi pineaigiri irorori nopokashitake irishinevakagaigaikempara maganiro, kantankicha teratyo iroro nompokashite, ontityo nopokashitake onkenantanakemparora inkisavakagaiganakempara,

³⁵ 'intimaketari surari inkisanakeri iriri. Ario onkañotanakempa tsinane onkisanakero iniro, aikiro gatomintantsirira onkisanakero ovagirote.

³⁶ Yogaegiri garira ikematsaigana inkisas-hivageiganakemparitari iitaneegi kematsaigakenanerira.'

³⁷ "Nonkantaigakempi garatyo nopegumatiri nogamere tyanirika pairorira itasanotakari iriri ontirika iriniro, narokya ogakona intakena. Aikiro garatyo nopegumatiri nogamere tyanirika pairorira itasanotakari itomi ontirika irishinto, narokya ogakona intakena. ³⁸ Ario nonkañotakempa aikiro garatyo nopegumatiri nogamere tyanirika terira inkoge impiriniventavagetanakerora nokogagetirira naro iratsipereaventavage-takenara. ³⁹ Tyanirika tsarogakagacha ikiiro

tera inkoge iratsipereaventavagetakenara ikiirotyo kañotagananankicha, intagatitari ikogake irovetsikagetakera tatarika ikogagetakerira irirori. Kantankicha yogari piriniventirorira nokogagetirira naro yatsipereaventakenara, iriro pinkante iriatake itimira Tasorintsi inkantakan intimake.

*Tyani inkavintsaake Tasorintsi impogini
(Mr 9.41)*

40 “Tyanirika gaigavakempine inkematsaigavakempira nanti ikematsatake, ario ikañotaka tyanirika kematsatakenane naro, inti ikematsatake aikiro tigankakenarira.
 41 Tyanirika gavakerine kenkitsatakotiririra Tasorintsi inkematsatavakerira ineakera inti tigankakeri Tasorintsi, irirori irishineventakempari impo ovashi ineakotakemparo impakeririra impogini inkañotagakemparira impakerira yoga kenkitsatakotiririra. Ario inkañotagakenkani tyanirika gavakerine negintevagetacharira ineakerira inegintevagetakara, irishineventakempari Tasorintsi inkañotagakemparira yoga negintevagetacharira.
 42 Ario inkañotakempa aikiro tyanirika kavintsaakerine irapigematsatene terira impaitumatempa ineakerira ikematsatakenara, irishineventakempari Tasorintsi impo ovashi ineakotakemparo impakerira onkatinkatakeririra impogini. Intagatityo impavetakempari imire irorotakenityo.”

11

*Joan itigankaigakerira irogamereegi inkogakotagantaigakiterira Jeso
(Ir 7.18-35)*

¹ Impogini yagatanakera Jeso yogotagaigakerira irogamereegi iatanake parikotipage apatogetakara pankotsipage ikenkitsavagetakera, aikiro yogotagantavagetakera. ² Yogari Joan Giviatantatsirira aiñokya yashitakotaka. Impo ikemakotavakerira ikenkitsavagetakera, aikiro yovegägeigakerira tovaini mantsigaigankitsirira, itigankaigake piteni irogamereegi inkogakota-gantaigakiterira. Antari yagonkeigapaakara inakera ³ ikantaigapaakeri:

—¿Virorika nogiaigakerira ontirika atanatsi nogiaigera pashini iripokakera?

⁴ Yogari Jeso ikantaigiri:

—Maika piaigae pinkamantaigapaakerira Joan magatiro pineageigutirira ontiri pikemageigutirira. ⁵ Yogari terira ineaigavetempa ineaiganake. Yogari terira iranuitagantsiigavetempa yanuitagantsiiganake. Ario ikañoigaka vesegaigavetankicharira yovegaiganaa. Yogari terira inkemaigavetempa ikemaiganake. Aikiro yogari igamagapage yaniaiganai. Intiegiri aikiro terira irashintavageigempa ikenkitsatimoigunkani ikamantaigunkani tyara inkantaigakempa kameti irogavisaakoigakenkaniniri. ⁶ ¡Irishinevagetakempa tyanirika kantakanirira inkematsatasanotakenara gara yapakuimatana!

⁷ Impo iaiganaira iriroegi iniavagetanake Jeso iniakotakerira Joan ikantaigiri maganiro: “¿Tatoita piatashiigakiti anta osarigagiteta-paakera? ¿Iriro piatashiigakiti pineaigakitirira matsigenka terira ishintsitashigetero magatiro matavitantagantsi, irorokya ikanti irorokya ikanti? ¿Ario ikañotakaro savoroshi amirora tampia akya otuiti akya otuiti? ⁸ ¿Ario tatatyō piatashiigakiti? ¿Iriro piatashiigakiti pineaigakitirira matsigenka gagutacharira mechomagori kamisa? Pogoigaketari maganiro gaguigacharira mechomagori kamisa ontí ipirinitaigi ivankoku koveenkari. ⁹ Iroroventi ¿tatatyō piatashiigakitira? ¿Iriro piatashiigakiti pineaigakitirira kamantantatsirira? Jeeje, irironiroro, kantankicha pairo yavisavagetakeri kamantantatsirira, ¹⁰ irirotari itsirinkakotunkanirira pairani iniakerira Tasorintsi Itomi ikantiri:

‘Notomi, impogini nontigankake papiro ivatanakempinerira inkantaigakerira itovaireegi inegintetashi-igavakempira.’

¹¹ Maika nonkantaigakempi maganirosanotyo matsigenkaegi tera intumamate papiro visakerinerira Joan, kantankicha tyanirika yogavisaakotake Tasorintsi ipegakara Igoveenkarite, irirori pinkante yavisakerityo.

¹² “Pairani ikyasanokyara tsititanakero Joan ikenkitsavagetanakera ovashi maika yogari kisantaigatsirira tera inkogaigavetempa inkenkit-satakotakenkanira Tasorintsi tyara ikanta yogavisaakotantira ipegakara Igoveenkariegite

maganiro kematsaigiririra, kantankicha ariompatyo ishineventasanoiganakarori tovaini matsigenkaegi ikematsaiganakera. ¹³ Maganirotari kamantantaigatsirira ikaman-takoigakero pairani ovashi ikenkitsatanakera Joan. Ario ikañotaka Moiseshi irirori itsirinkakotakero. Maganiro ikantaigaketari iripokake intigankakerira Tasorintsi irogavisaakotantakera ovashi impegakempa Igoveenkariiegite maganiro kematsaigakerinerira. ¹⁴ Yogari Joan irirotari kamantantatsirira Eriashi pikemakoigakerira iripokakera iivatakerira intigankakerira Tasorintsi. Pinkogaigakerika viroegi pinkematsaigakenara kematsaigenatyo. ¹⁵ Pikemaigakenarika maika atsi suretasanoigem-parotyo nokantaigakempirira.

¹⁶ “¿Tatarikatyo nonkañotagaigakempi viroegi? ¿Tata pikañoigaka? Inti pikañoigaka ananekiegi impitaigera pampatuiku imagempivageigakera impo ovashi inkisavakagaiganakempa inkan-taige: ¹⁷ ‘Nokovutimoigavetakempi teratyo pintiontaigempa. Impo nomatikimoigavetakempi matikagantsi kenkisureaenkatavagetakatyo kara teratyo piragaigempa.’ ¹⁸ Ariotari pikañoigakari viroegi. Ipokavetaka Joan tera isekatavagetempsa, aikiro tera iroviikumatemparo poiri, onti pikantaigakeri itimagutakeri kamagarini. ¹⁹ Impo maika ipokavetaka Kañotasanolakaririra Matsigenka isekata, aikiro yoviika ariokya pikantaigakeri: ‘Pairo isekaata aikiro pairo ishinkiseta, aikiro inti itsipaiga kañovageigacharira intiegiri kogantaiginiririra koveenkari koriki.’ Kantankicha ogotunkani tyani kematsatasanotiri

Tasorintsi aikiro tyani terira inkematsateri, ontitari oneantunkani yovetsikagetakerira.”

*Jeso ikanomajaigakeri timaigatsirira
Korasunku, Vetsairaku ontiri Kaperenaoku
(Ir 10.13-15)*

20 Impogini Jeso ikanomajaigutarityo yovetsiki-mogeigakerira tovai terira oneimagetenkani, ineajakeritari tera inkantatigaigempa inkematsaigakerira Tasorintsi, ikantaigiri: **21** “¡Maikaniroro pantsipereavageigake viroegi timantaigarorira Korasun! ¡Maikaniroro pantsipereavageigake viroegi timantaigarorira Vetsaira! Pineaigavetakarotyo novetsiki-moigavetakempirira, kantankicha teratyo pinkogaige pinkantatigaiganakempara pampakuaiganakerora povetsikageigira terira onkametite. Yogari pinkante timaigavetacharira pairani Tiroku ontiri Suronku iriroegimetyo neaigakerome inkantatigaiganakempametyo irogaguiganakemparome tontaporokiri, aikiro intiaitaiganakempametyo samampopane iokotagantaigakempara ikenkisureaigakara ineajakerera yovetsikageigira terira onkametite inkantatigaiganakempara. **22** Kantankicha viroegi aganakempara inkisashitantakemparirira Tasorintsi maganiro terira inkematsaigeri, paipotyo irogagaigakempi kara avisavage-takerotyo inkisashiigakemparira Tirokunirira intiegiri Suronkunirira. **23** Viroegiri timaigatsirira Kaperenaoku paventakovageigaka. ¿Pineaigiri ariori piaigake enoku? ¡Garatyo! Ontityo piaigake morekariku. Ariome ovetsikakenkanime

terira oneimagetenkani pairani anta Soromaku onkañotakemparora novetsikimogeigakempirira viroegi maika gamerorokari ipogereiraiga maganiro, aiñokyametyo intimantaigemparo maika.* ²⁴ Irorotari nonkantantaigakempirira impogini aganakempara inkisashitantakempara Tasorintsi, pairotyo inkisashitasanoigakempi viroegi avisakero inkisashiigaemparira Soromakunirira.”

Jeso ikantake irampishigopireakagaigaigakemparira ventaigakaririra
(Ir 10.21-22)

²⁵ Impogini Jeso inianakeri Tasorintsi ikanti: “Apa, vinti vetsikagetakerorira inkite ontiri kipatsi ontiri aikiro magatiro timantageterorira. Noshineventakemptyo kara, pomanapitsaigakeritari govageigatsirira tera pogotagaigeri tyara pikanta viro. Inti pogotagaigake terira irogovageige. ²⁶ Arioniroro okañotaka maika, ariotari pikogakeri viro.”

²⁷ Impo ikantaigiri maganiro: “Ipagetakenaro Apa magatiro, aikiro yagaveakagavagetakena posante. Tera tyani gotatsine tyara nokanta. Intagani gotankitsi Apa. Aikiro tera tyani gotatsine tyara ikanta irirori. Intagani naro gotankitsi intiegiri aikiro yogaegi nonkogakagaigaigakerira nogotagaigaikerira.

²⁸ Maganiro viroegi tsipereraigankitsirira pipomirintsiigakarora pintsatagageigakerora magatiro ikogageturira Tasorintsi, atsi tainaegi

* **11:23** Jen 19.24-28

naroku paventaigakenara nampishigopireakagaigakempira.²⁹ Pinkematsaigakenara kameti nogotagaigakempira ovashi pampishigopireaigakempa pisureku, teranika naro kisantatsirira, aikiro nantitari tsipereakovage-tacharira tera naventakotumatempa.³⁰ Tera onkomutempa pintsatagaigakerora magatiro nogotagaigakempirira, nantitari shintsita-gaigakempine nogishineasanoigakempira.”

12

Irogamereegi Jeso yagaigakera turigoki kutagiteriku apishigopireantaganirira

(Mr 2.23-28; Ir 6.1-5)

¹ Impogini aganakara kutagiteri apishigopire-antaganirira iatake Jeso ikenanake turigoshiku itentaiganaari irogamereegi. Iriroege itasegageiganake yagaigamatananaketyo turigoki yagaigakarora. ² Irorotyo ineagakerira pariseoegi ikantaigutarityo Jeso:

—Atsi gaigeri kavako pogamereegi! Yagaiganake turigoki maika kutagiteriku apishigopireantaganirira, okantavitantaganitari antavagetantenkanira.

³ Kantankicha irirori ikantaigiri:

—¿Matsi tera piniavantumaigero viroegi otsirinkakotunkanira yovetsikakerira Iravi pairani? Itaseganake irirori intiegiri itentaigakarira, mamerisanotyo tatampatyoyogaigakempa, ⁴ impo ikiamatanaketyo ivankoku Tasorintsi yogakarora pan okantavitan- taganirira ogenkanira, ontitari irashi Tasorintsi.

Intagani gaigaro saseroroteegi, ariotari ikantiri Tasorintsi, kantankicha yogari Iravi yogakarotyo, aikiro ipaigakeri itentaigakarira.* ⁵ ¿Matsi tera piniavantumaigero aikiro itsirinkakotanakerira Moiseshi okantira yogari saseroroteegi tavageigatsirira ivankoku Tasorintsi yantavage-tantaigakaro kutagiteri apishigopireantaniganirira kantankicha teratyo iroro irovetsikaige terira onkametite? ⁶ Maikari maika aikiro nonkamantaigakempi aiño aka pairorira yavisavagetakero ivanko Tasorintsi. ⁷ Viroegi tera pinkemaigavakeronika Itsirinkakagantakerira Tasorintsi kantatsirira: ‘Pairo avisake nokogakera pintsarogakagantaigakempara, avisakero povetisaigakenarira piratsipage pintagaigakenarira.’ Pinkemaigavakeromera oka gamerorokari pineantavageigi yovetsikaigakera terira onkametite. ⁸ Yogari Kañotasanolakaririra Matsigenka irirotari kantatsirira tyati okantavitantagani antantenkanira kutagiteriku apishigopireantaniganirira, aikiro tyati terira onkantavitantenkani.

*Jeso yovegairira shinkovakotankicharira
(Mr 3.1-6; Ir 6.6-11)*

⁹ Osamanitanakera iatake Jeso pankotsiku yapatoitantaigarira jorioegi ikianake tsompogi. ¹⁰ Ario inake kara paniro shinkovakotankicharira. Yogaegiri kisaigakeririra Jeso ikantaigiri:

* **12:4** 1 Sa 21.1-6; Ire 24.8-9

—¿Kametitake irovegantakenkanira mantsigatankitsirira kutagiteriku apishigopireantaniganirira?

¹¹ Ontityo ikantaigakeri maika ineaigakera tyarika inkante kameti intsavetantaigakerira inkisakagantaigakerira. Kantankicha irirori ikantaigiri:

—Aiñorika shintacharira irovishate impogini irashiriantanakemparo pairo ovegantara kutagiteriku apishigopireantaganirira, ¿matsi gara iatashitiri inoshikaaterira? ¹² Iriomparorokari matsigenka pairo intsarogakagakenkani, paerotari yavisavagetakeri ovisha. Irorotari maika kametitake onkavintaantakenkanira kutagiteriku apishigopireantaganirira.

¹³ Nerotyo ishonkashitantanakaririra shinkovakotankicharira ikantiri:

—Atsi kontsaanake.

Irorotyo yakontsaanakera ogatyo okenake irako paa vegasanolagetaa kañotasanolagetaatyapipakotene. ¹⁴ Iroro ineaigavakerira pariseoegi yovegairira ikonteigapanuti ovashi isariaiganakari Jeso irogakagantaigakerira.

Isaiashi ikamantakotakeri Jeso pairani

¹⁵ Iroro yogotavakera Jeso isariaigakarira irogakagantaigakerira iatake parikoti ovashi yoviaiganakeri tovaini matsigenkaegi. Irirori yovegageigamatirityo maganiro mantsigaigankitsirira, ¹⁶ kantankicha ikantaviigakeri ganiri itsavetantaigiri. ¹⁷ Antari ikañotakara maika itsatagakero ikantakerira kamantantatsirira Isaiashi pairani

itsirinkakotakerora ikantakerira Tasorintsi
ikanti:

¹⁸ “Neri yoga nomperane nokogakagakerira non-tigankakerira.

Notasanovagetakari, aikiro noshineventakari.

Nontigankimotakeri nosure intimasurentakerira.

Irirori inkamantaigakeri maganiro matsigenkaegi tyati kametiripage, aikiro tyati terira onkametite.

¹⁹ Gara ikisantumati, aikiro garatyo ikakitsatantumi irogemisantantakera.

²⁰ Garatyo ikisumaigiri tyanirika tesakonarira ishintsitashiigero terira onkametite.

Inkantakani inkavintsaajigakeri maganiro kigonkero aganakempara impegakempara Igovenkariegithe maganiro matsigenkaegi.

²¹ Maganiro matsigenkaegi timageigatsirira aka kipatsiku iraventaigakemparityo.”

Ikantunkanira Jeso inti tinkamitakari kamagarini

(Mr 3.20-30; Ir 11.14-23; 12.10)

²² Impogini yamaiganakeneri Jeso paniro matsigenka terira inee, aikiro tera irinie, itimagutakeritari kamagarini. Impo irirori in-eakagairi, aikiro iniakagairi. ²³ Yogavageigaketyo kavako maganiro ikantaigi: “Irirorakarityo Iyashikitanakerira Iravi agiaigakerira.”

²⁴ Iroro ikemaigakerira pariseoegi ikantaigakerera, iriroegi ikantaigi: “Inti tinkamitakari Vere-sevo itinkami kamagarinipage. Irirotari gaveakagakeri yoneaganontantaigakaririra itimaguigakerira kamagarinipage.”

25 Kantankicha irirori yogurtavakerotyo isureigakarira ikantaigiri: “Pine intimera matsigenka irapatoitakeri itovaire impegakempara itinkami impo intsiiganakerorika inkisavakagaiganakempara ovashi irashirikovakagaiganakempa iokaiganakeri itinkami panivani irinae, mameri tyanimpatyo iromperataempsa. Ario ikañoigaka tentaigaririra iitaneegi ikiirora parantavakagaiganachane inkisavakagaiganakempara ogaga inkenaigake irashirikovakagaiganakempa ganige itsipavakagaigaa.

26 Ario ikañotaka Satanashi irirori, ¿matsi tyara inkantakempara ikiirora neagaachane? Inkañotakemparika maika ikiirora parantaachane, ¿matsi iragaveake atanatsira impeganakempara itinkamiegi maganiro kamagarinipage?

27 Viroegi onti pikantaigake inti tinkamitakena Veresevo nagaveantakarira noneaganontaigakarira itimaguigakerira kamagarinipage. Iriromera gaveakagakenane kamagarini, ¿ario tyaniratyo gaveakagaigakerira pitovaireegi yoneaganontaigakarira itimaguigakerira kamagarini? Irorotari ogotantunkani onti pikomuigakaro viroegi.

28 Kantankicha intityo gaveakagakena Isure Tasorintsi noneaganontantaigakaririra itimaguigakerira kamagarinipage, iroro pogotantaigavakempa atake yogikoneatimoiganakempi Tasorintsi iragaveane.

29 “Maika nokogake nonkantaigakempsa: ¿Tyara inkantakenkani inkiashitakenkanira pairorira isurariti inkoshigetakenkanira garira oketyo yogusotagani?” Antari

oketyorika irogusotakenkani ario pinkante inkosiarantakenkani.

³⁰ “Maganiro terira irishinetena onti ikisashitakena, aikiro yogari terira intentena napatontakera onti itivarokantake.

³¹ “Nonkamantasanoigakempi maika tatarika irovetsikaigake matsigenka terira onkametite ontirika isamatsanaigakeri Tasorintsi, irirori iragaveaketyo imagisantakoigaerira garatyo ikenkiimatairo, kantankicha yogari neavetakemparonerira iragaveane Isure Tasorintsi impo inkantake intityo gaveankitsi kamagarini, garatyo imagisantakotumatiri. ³² Ario okañotaka aikiro tyanirika samatsanatakerine Kañotasanolakaririra Matsigenka iragaveake Tasorintsi imagisantakotaerira, kantankicha tyanirika samatsanatakerine Isure Tasorintsi, iriro pinkante garatyo imagisantakotumatairi.

*Tatoita ogotantunkani tyara ikanta matsigenka
(Ir 6.43-45)*

³³ “Yogari matsigenka onti ineantunkani yovetsikagetirira ovashi yogotunkani tyara ikanta. Yogari terira inkametite onti yovetsikagetake terira onkametite. Yogari kometiri omirinka onti yovetsikagetake kometiripage. ³⁴ ¡Viroegi apaiventavageigakempi kañovagetagantsi! ¿Tyara pinkantaigakempa povetsikaigakera kometiripage?, vintiegitari kañovageigacharira. Magatirotari osuretakotunkanirira irorotari oniakotunkani. ³⁵ Ario ikañota matsigenka negintevagetacharira onti iniakogeti kometiripage, irorotari isuretakogeta. Yogari terira inegintevagetempa onti iniagisevageti posante,

irorotari isuretakogeta irirori. Magatirotari osuretakotunkanirira irorotari oniakogetunkani. ³⁶ Naro kantaigakempine antari aganakempara inkisashitantaigakenkanirira kañovageigacharira inkenkiakagaigakenkani magatiro iniagisevageigakerira kogapage. ³⁷ Tatarika piniavageti irorotari inkantaviigakempi Tasorintsi kametitakevirika ontirika tera pinkametite. Pinegintetakerorika piniane irishineventakempi. Antari piniagisevagetakerika ineakempi tera pinkametite, inkisashitakempi intigankakempi morekariku.”

Kañovageigacharira ikantaigavetakarira Jeso in-eakagaigakerira terira oneimagedenkani

(Mr 8.12; Ir 11.29-32)

³⁸ Impogini ipokashiigapaakeri Jeso pariseoegi intiegiri gotagantaigirorira itsirinkakotanakerira Moiseshi ikantaigiri:

—Gotagantatsirira, atsi okotagaigenanityo terira oneimagedenkani.

³⁹ Ikantaigiri Jeso:

—Viroegi apaiventavageigakempi kañovageta gantsi, pikogantaigavetakarira noneakagaigakempira terira oneimagedenkani, kantankicha garatyō noneakagumaigimpi. Intagatityo noneakagaigakempi pashini onkañotakemparo ikañotagunkanira kamantattatsirira Jonashi pairani.* ⁴⁰ Pikemakoigakeritari irirori inigakerira omani imaranesanorikatyō kara impo yomavatakotanakara kutagiteri anta isegutoku. Ario inkañotakempa

* ^{12:39} Jon 1-3

impogini Kañotasanolakaririra Matsigenka iromavatakotanakempa kutagiteri anta kipatsiku. ⁴¹ Impogini aganakempara inkisashiigakemparira Tasorintsi maganiro terira inkematsaigeri inkantake yogari timaigavetacharira pairani Niniveku pairotyo yavisaigakempi viroegi, maganirotari Ninivekunirira ikematsaigakeri Jonashi ikenkitsatimoigakerira ikenkisureaiganaka ineaigaketari yovetsikagisevageigira terira onkametite ovashi ikantatigaiganaka. Kantankicha maika ipokavetaka pairorira yavisavagetakeri Jonashi teratyo pinkematsaigeri. ⁴² Ario onkañotakempa aikiro impogini inkantake Tasorintsi ogari igoveenkariegitie Savakunirira pairotyo avisaiigakempi viroegi, opokashitakeritari Saromon pairani oponiavagetakatyo samani kara onkemisantakerira irogotagagetakerora,* kantankicha maika ipokavetaka pairorira yavisavagetakeri Saromon teratyo pinkematsaigeri.

*Kamagarini ipigashitarira itimaguvetarira
(Ir 11.24-26)*

⁴³ “Antari itimagutirira matsigenka kamagarini impo iokanairi iatake anta osarigagitetaapaakera yanuivagetakera. Impo ikogavetaka irapishigopireavagetakempameria, kantankicha teratyo iragavee ovashi ⁴⁴ isurematanaatyo ikanti: ‘Irirompatyo nompigashitanae notimaguvetarira.’ Impo ipigavetaa ineapaakeri

* **12:42** 1 Kov 4.34

giakomatakatyo kañomataka pankotsi otaroga-ganira onegintetaganira saagitemataketyo kara mameritari timantemparonerira. ⁴⁵ Ovashi iatake yagakitira pashini 7 kamagarini pairorira yogagavageigaka. Impo itimaguigapaakeri yoga itimaguvetarira okyara ovashi irirori oga ikenake paioertyo yogagavagetanaka. Ario pinkañoigake viroegi apaiventavageigakarira kañovagetagantsi ariompatyo pogagavageiganakempari, tera pinkematsaigenika.”

*Tyani impegaigake Jeso iitaneegi
(Mr 3.31-35; Ir 8.19-21)*

⁴⁶ Aiñokyara ikenkitsavageti Jeso opokapaake iriniro intiegiri irirentiegi ikogaigavetaka iriniaigakerira, kantankicha tyampa inkenaigake, itikaigakeritari maganiro patoitaigankicharira nerotyo onti inaigapaake sotsi. ⁴⁷ Impo ikamantunkani Jeso ikantagani:

—Pokake piniro intiegiri pirentiegi aiño inaigake kara sotsi ikogaigake iriniaigakempira.

⁴⁸ Kantankicha irirori ikantiri kamantakeririra:

—¿Tyanimpatyora ina? ¿Tyanimpatyora igeegi?

⁴⁹ Impo ishonkateiganakari irogamereege iokoigakeri ikanti:

—Neri yogaegi nopegaigakerira ina aikiro igeegi. ⁵⁰ Imirinkatari tsatagagetirorira ikogagagetirira Apa timatsirira enoku irirotyo nopegake ige ontiri incho ontiri aikiro ina.

13

*Jeso ikantakotakerora okenkitsataganira Irini-anne Tasorintsi
(Mr 4.1-9; Ir 8.4-8)*

¹ Impogini ikontetanai Jeso iatake otsapiaku inkaare ipirinitapaake. ² Yapatovageiganakatyō tovaini matsigenkaegi inakera irirori, ovashi yomatenaka pitotsiku ipirinitake ikenkitsaigakerira. Maganiro patoitaigankicharira ipitaigake otsapiaku.

³ Impo yogotagaigakeri ikantakogetakerora posante ikantaigiri: “Iatake paniro matsigenka impankivagetakera turigoki. ⁴ Iokagisetanakero pakarara pakarara itsotenkavagetanakero. Okonogagarantaka oparigetanake avotsiku, impo iparigashiigakero tsimeri yogaigakarora.

⁵ Pashinikya ontī oparigetanake mapuseku, shintsi oshivokavetanaka, tesakonatari ontimasanotenika kipatsi. ⁶ Impogini iporeavetanaka poreatsiri itaganakero oshigirikanake okamanake, tetanika oatasanote oshitsaki savi, otikakerotari mapu. ⁷ Okonogaka pashini oparigetanake okitagigetakara okitsoki tovaseri timatsirira otsei. Impo oshivokavetanaka turigo ogenanekyatyō oshivokutanaka tovaseri irorori asaganakero okamanai, tera ontīme okitsoki. ⁸ Pashini okonogaka oparigetanake okametipatsatakera kipatsi. Irorori pinkante oshivokanake okimotanake otimanake tovaiti okitsoki, okonogaka otimake 100, pashini 60, pashini otimake 30. ⁹ Pikemaigakenarika maika atsi suretasanoigemparotyo nokantaigakempirira.”

*Jeso yogotagaigakerira irogamereegi tyara
okantaka ikantakogetakerora magatiro
(Mr 4.10-12; Ir 8.9-10)*

¹⁰ Impogini yogaegiri irogamereegi
yaiñoniiganakari ikantaigiri:

—Antari pogotagaigakerira maganiro matsigenkaegi, ¿tyara okantakara pikañotakerora maika pikantakogetakerora magatiro?

¹¹ Irirori ikantaigiri:

—Pairani tera ogovetenkani tyara inkantaigakeri Tasorintsi matsigenkaegi irogavisaakoigakerira kameti impegakempara Igoveenkariegit. Maikari maika ikogake pogoigakerora viroegi, kantankicha iriroegi gara yogoigiro. ¹² Nonkantasanoigakempi maika tyanirika kogankitsinerira inke-mavakerora Iriniane Tasorintsi ariompatyo irogotasanovagetanakeri, kantankicha yogari terira inkoge inkemavakerora ontityo onkomutapitsatakempari, garatyoyogotumageti maani. ¹³ Irorotari nokañotantaigakaririra maika. Iriroegi otimaigavetaka iroki, kantankicha kañomataka tenirikatyooptime. Aikiro otimaigavetaka igempita kantankicha kañomataka tenirikatyooptime, tera inkemaigavakeronika nokantaigakeririra. ¹⁴ Okañotaka maika otsataganakerora ikantakerira Isaiashi pairani ikanti:

Viroegi pinkemaigavetakempatyo, kantankicha garatyoyikemumaigavakero.

Aikiro pineaigavetakempatyo, kantankicha garatyoyogotumaigavakero.

15 Tera pinkogaigenika pogoigakera,
kañoigamatakavi tenirikatyo ontimaige
pisure.

Tera pinkemaige, kañomataka tenirikatyo ovegan-
taigempa pigempita.

Aikiro tera pineaige, kañoigamatakavi tenirikatyo
pogaige kavako.

Onti pikañoigaka maika ganiri pineantaigarō pokī,
aikiro ganiri pikemantaigarō pigempita,
aikiro ganiri pikemumaigi maanī.

Tera pinkogaigenika pinkematsatasanoigakenara
kameti nogavisaakoigakempiniri.’

¹⁶ “Kantankicha viroegi paio ikavintsaav-
ageigakempi Tasorintsi pineantaigakarorira
magatiro pineageigakerira maika, aikiro
pikemaigakena nogotagaigakempirira.

¹⁷ Arisanotyo nonkantasanoigakempi maika
itimaigavetaka tovaini kamantantaigatsirira
intiegiri negintevageigacharira ikogaigavetaka
ineagakeromera pineaiganakerira viroegi
maika, kantankicha teratyō ineimaigero.
Aikiro ikogaigavetaka inkemaigakeromera
pikemaigakerira, kantankicha teratyō
inkemumaigero.

*Jeso ikamantaigakerira irogamereegi ikantako-
takerira inkaara*
(Mr 4.13-20; Ir 8.11-15)

¹⁸ “Maika atsi kemisantaigena nonkaman-
taigakempi tatoita nokantakotake inkaara.

¹⁹ Ogari turigoki parigagetankitsirira avotsiku

inti nokantakoigake matsigenkaegi kemisantaigavetakarorira Iriniane Tasorintsi okenkit-satunkanira. Ikamantaigavetunkani tyara inkantaigakempa kameti irogavisaakoigakerira Tasorintsi impegakempara Igoveenkariegit, kantankicha igenanekyatyo ipokashiigakeri kamagarini imagisantakagaigakeri magatiro.

20 Ogari parigagetankitsirira mapuseku inti nokantakoigake kemsantaigavetakarorira Iriniane Tasorintsi ishineventaigavetavakaro, kantankicha tera inkematsatasanoigero,

21 nerotyo imagisantaiganairo shintsi. Impogini opokashitakeri tsipereagantsi ontirika ikisaviigunkani Iriniane Tasorintsi og aikenaigake yapakuaignanairo ikañoiganaara okyara tekyara inkematsatumage. **22** Ogari parigigetankitsirira okitagidgetakara okitsoki tovaseri inti nokantakoigake kemsantaigakerorira Iriniane Tasorintsi ikemaigavetakar, kantankicha impogini irorokya imaigavai isureigavaarora magatiropage timagetatsirira kipatsiku. Impo iriroegi tenige isuretakoigaemparo Iriniane Tasorintsi, ontitari isureiganaka irashintavioigakempara koriki. Tyampa inkantaigakempa inkematsatasanoigaker.

23 Kantankicha ogari parigagetankitsirira okametipatsatakera kipatsi inti nokantakoigake kemsantaigavakerorira Iriniane Tasorintsi impo ikematsatasanoigakeri irirori. Ovashi itimaigake kameti ikañoigakaro turigo timankitsirira okitsoki 100, pashini ikañoigakaro timankitsirira 60, pashinikya ikañoigakaro timankitsirira 30.”

*Jeso ikantakotakerora impegakempara
Tasorintsi Igoveenkariegite kematsaigiririra
ikañotagakaro turigo ontiri tovaseri*

²⁴ Impo ikanti Jeso: “Maika irorokya nonkantakotake tyara onkantanakempa impogini irapatoitaigakerira Tasorintsi maganiro kematsaigiririra impegakempara Igoveenkariegite. Iatake matsigenka ipankitakera turigoki itsamaireku. ²⁵ Impogini imagavioiganaira maganiro ipokaninkuti pashini kisakeririra ipankitapanutiro tovaseri shigirorira turigo yapatuinkavagetakerotyo kara. ²⁶ Impogini oshivokavetanaka turigo ogenanekyatyo oshivokutanaka tovaseri irorori otentaganakaro. Antari otimanakera okitsoki turigo oneinkani onti okonogakaro tovaseri. ²⁷ Yogari iromperaneegi pankitakerorira ineaigutarotyo ikantaigiri: ‘Kogapage noneaigake onti pipankitake turigokisanorira. ¿Maikari tyaratyo opioniakara tovaseri?’ ²⁸ Ikantaigiri irirori: ‘Impa irirorakari kañotakero kisakenarira.’ Iniaiganai iromperaneegi ikantaigiri: ‘¿Atsi noaige nashiaigakiterora?’ ²⁹ Ikanti irirori: ‘Gatata, pitentagantaigarokari turigosanorira. ³⁰ Arionetata osampatanakera, impogini nontigankaigakeri gaigakeronerira ovashi irashiaigakero tovaseri irogusovatuigakerora intagaigakerora. Impo irorokya iragaigake turigokisanorira irontaikapiniigakerora pankotsiku ontaikantaganirira turigoki.’”

*Jeso ikantakotakerora ipegakara Tasorintsi
Igoveenkariegite matsigenkaegi ikañotagakaro*

*okitsoki mosetasa
(Mr 4.30-32; Ir 13.18-19)*

³¹ Impo inianai Jeso ikantakotakerora ipegakara Tasorintsi Igoveenkariegite matsigenkaegi ikañotagakaro okitsoki mosetasa ikanti: “Iatake paniro matsigenka ipankitakerora pakitsotiro mosetasa itsamaireku. ³² Irorori pairotyo avisavetaka otsirepekichotakera avisagetakerora pashinipage tsirepekichogetatsirira okitsoki, kantankicha oshivokumatanakera omaranevagetanaketyo kara okañotanaaro inchato otsegororoitanake avisagetanakero pashinipage pankirintsipage impo itimantaigaaro tsimeripage.”

Jeso ikantakotairora ipegakara Tasorintsi Igoveenkariegite matsigenkaegi ikañotagakaro opoegantarira pan

(Ir 13.20-21)

³³ Impo ikantakotairo Jeso ipegakara Tasorintsi Igoveenkariegite matsigenkaegi ikañotagakaro opoegantarira pan ikanti: “Antari ovetsikira tsinane pan agavatake kimopane turigopane, impo okonogantakaro opoegantarira ogatyo okenake opoeganake magapatsatiro.”

Tyara okantaka ikantakogetakerora Jeso magatiro

(Mr 4.33-34)

³⁴ Ario ikañoigakeri Jeso maika maganiro yogotagaigakerira, onti ikantakogetakero magatiro. Tera irogotagaigeri kogapage, tatarika ikogake irogotagaigakerira ³⁵ onti ikañotakero

maika ovashi otsataganaka itsirinkakotanakerira kamantantsirsirira pairani ikantakera:

“Noniaigerira onti nonkantakogetake posantepage.

Nonkenkitsatakogetakero posantepage ogantagarira omanakogetunkani pairani okyasanokyara ovetsikunkani kipatsi kigonkero maika.”

Jeso ikamantaigakerira irogamereegi tatoita ikantakotake iniakotakerora tovaseri shigirorira turigo

³⁶ Impogini iniaiganairi patoventaigakaririra iatai pankotsiku ikiapaake. Yogari irogamereegi yaiñoniiganakari ikantaigiri:

—Nokogaigake pinkamantaigakenara tatoita pikantakotake inkaara piniakotakerora tovaseri shigirorira turigo.

³⁷ Ikanti Jeso:

—Yogari pankitakerorira turigoki inti Kañotasanolakaririra Matsigenka. ³⁸ Ogari tsamairintsi onti magatiro kipatsi itimantaigarira matsigenkaegi. Ogari turigoki intiegi matsigenkaegi pegaigakeririra Tasorintsi Igoveenkariiegite. Ogari tovaseri intiegi yashintaigakarira kamagarini. ³⁹ Yogari pankitakerorira tovaseri inti kamagarini. Antari nokantakera agakenkanira turigoki onti nokantakotake ontsonkatanaempara kipatsi. Yogaegiri gaigakeronerira intiegi isaankariite Tasorintsi. ⁴⁰ Antari nokantakera ashiakenkanira tovaseri ontagakenkanira, onti nokantakotake tyara onkantanakempa impogini

ontsonkatanaempara kipatsi. ⁴¹ Antari irapatoitaigakerira Kañotasanotakaririra Matsigenka maganiro kematsaigiririra impegakempara Igoveenkariegite, intigankaigakeri isaankariite irapatoitaigakerira kañovagetaigaikaririra itovaireegi intiegiri aikiro maganiro vetsikagi-sevageigirorira terira onkametite ⁴² iokaigakerira morekariku. Karari kara inkantakan iriragunteigakempa inkaemavavageigaketyo kara iratsikagisevageigakerotyo irai. ⁴³ Impogini yogaegiri negintevageigacharira iriaigake intimimoigakerira Tasorintsi inkañoiganakemparira poreatsiri ishimpokirerenkira ikyauenkara kontetapaatsi. Pikemaigakenarika maika atsi suretasanoigemparotyo nokantaigakempirira.

Jeso ikantakotairora ipegakara Tasorintsi Igoveenkariegite matsigenkaegi ikañotagakaro kori yomanunkanirira

⁴⁴ “Antari ipegakara Tasorintsi Igoveenkariegite matsigenkaegi onti okañotaka maika: Yomanunkani kori ikitatunkani kipatsiku. Impogini itimake pashini neakeririra, kantankicha aki-irotyo ikitatanairi. Ishinevagetakatyo kara ipimantagetakero magatiro yashintageterira yagan-takarora koriki ipunaventantakarora oga kipatsi inantakarira.

Jeso ikantakotairora ipegakara Tasorintsi Igoveenkariegite matsigenkaegi ikañotagakaro perera pairorira okametiti

⁴⁵ “Antari ipegakara Tasorintsi Igoveenkariegite matsigenkaegi onti okañotaka maika: Iatake paniro pimantavagetasirira ikogavagetaakera

perera pairorira okametitasanotake. ⁴⁶ Impo
ineake pakitsotiro pairorira avisavagetake
okutamunkarekitasanovagetakerera, opunav-
agетаратyo kara. Ipmantagetakero magatiro
yashintageteririra yagantagetakarora koriki
ipunaventantakarora.

*Jeso ikantakotairora impegakempara Tasor-
intsi Igoveenkariegite maganiro kematsaigiririra
ikañotagakaro kitsari*

⁴⁷ “Maika nonkantakotaero tyara onkan-
tanakempa impogini irapatoitaigakerira
Tasorintsi maganiro kematsaigiririra
impegakempara Igoveenkariegite onti
nonkañotagakemparo kitsari okitsataganira
oaaku, ishatekanaka shima iposanteitanakatyō
kara. ⁴⁸ Impo yogaegiri kitsaigankitsirira
inoshiatakoigakeri yamakoiganakerira
imparagekiku ipirinitaigakera ikogaigakerira
shima yogaganirira yoyagaigavakerira
kantiriku. Yogari terira irogenkani onti
iokajaigavairi. ⁴⁹ Ario onkañotanakempa impogini
ontsonkatanaempara kipatsi iripokaigake
isaankariite Apa Tasorintsi irapatoitaigakerira
negintevageigacharira irashirikoigakerira mag-
aniro terira inegintevageigempa ⁵⁰ iokaigakerira
morekariku. Antari anta inkantakan iriragun-
tevageiganakempa inkaemavavageigaketyo kara
iratsikagisevageiganakerotyo irai.”

⁵¹ Impogini ikantaigiri:

—¿Pikemaigakena nokantaigakempirira?

Iriroegi ikantaigiri:

—Jeeje, nokemaigake.

52 Ikantaigiri:

—Pine intimera shintavagetacharira timankitsirira posantepage iaraki page pairorira okametigetake irompi ogetakero ivankoku irovetsikageta kerora. Impo irirori iragaveake inoshikageta kerora tatarika ikogake irororika ogantagarira yashintaro pairani ontirika okyarira yagagetake. Ario ikañoigaka maganiro gotasanoigirorira Iriniane Tasorintsi Itsirinkakagantakerira pairani, aikiro yogotagasanoigunkani tyara ikanta Tasorintsi yogavisaakoigirira matsigenkaegi ipegakara Igoveenkariiegite, yagaveasanoigaketari irogotagantaigakerora magatiro Iriniane Tasorintsi ogantagarira timankitsi ontiri aikiro okyaenkarira nogotagaigakempi maika.

Yogotagantavetakara Jeso Nasareku

(Mr 6.1-6; Ir 4.16-30)

53 Impogini yagatanakera Jeso yogotagageigakerira patoventaigakaririra iatai itimira. **54** Yogotagantapaake anta pankotsiku yapatoitantaigarira jorioegi. Yogavageiganaketyo kavako maganiro kemisantaigavakeririra ikantaiganake:

—¿Tyarikatyō kara yogotakerora magatiro oka? ¿Tyarikatyō ikantakara yagaveakera yovetsikage-takerora terira oneimage tenkani? **55** ¿Matsi tera iriro tomintemparine karipintero timatsirira atimaigira? Ogari iriniro ontitari Maria. Yogari irirentiegi iriroegitari Santiago, Jose, Sumo intiri Jorashi. **56** Ario okañoigaka iritsiroegi iroroegi

onti otimaigi aka, aneasanovageigirotari aroegi.
¿Tyarikatyo yogotakera kara?

⁵⁷ Ovashi teratyo inkogaige inkematsaigakerira
onti ikisaenkaigakeri ovashi ikantaigakeri irirori:

—Yogari kamantantatsirira tyarika iatake
parikoti ishineventavunkani, kantankicha antari
inavetaka itimira teratyo irishineventenkani, on-
tityo ikisaenkatunkani, imaiganakatyo iitaneegi
iriroegi aikiro tera irishineventaigempari.

⁵⁸ Ovashi tesakona irovetsikagete kara terira
oneimagetenkani, teranika inkematsatumaigeri.

14

*Erorishi isuretakotaarira Joan Giviatantat-
sirira*

(Mr 6.14-29; Ir 9.7-9)

¹ Impogini yogari Erorishi neagetakeneririra
Sesa magatiro Garireaku ikemakotakeri Jeso
yovetsikagetakera terira oneimagetenkani.

² Impo ikantaigakeri inampinaegi ikanti: “Inti
nianaatsi Joan Giviatantatsirira nogakagantak-
erira karanki, nerotyo ikañiotantakarorira maika
yagaveavagetakera yovetsikagetakera terira
oneimagetenkani.”

³ Antari okyara irirotari Erorishi shitakotagan-
takeri Joan yogusotagantakerira karenatsaku in-
eakera ikantavitakerira Eroria yagapitsatakerira
irirenti paitacharira Jeripe. ⁴ Yogari Joan ikan-
takeritari Erorishi: “Tera onkametite pagapitsa-
takerira itsinanetsite pirenti.” ⁵ Irorotari iko-
gantavetakira Erorishi irogakagantakerimera,
kantankicha ipinkaigairi maganiro timaigatsirira
kara, ineraigakeritari Joan inti kamantantatsirira.

6 Kantankicha impogini agamatatyō kutagiteri agakara igutagiterite Erorishi impo irirori ikaemaigakeri iamigoegite isekatimoigakemparira. Impo isekatavageigakara okiapaake oshinto Eroria otosotapaakera oshonkashonkavagetanakatyō kara. Ishineventamatanakarotyo Erorishi **7** ikantiro:

—Maika nonkantakempi arisanotyo nompakempiro tatarika pinevitakena, garatyo namatavitimpi. **Namatavitakempirika** nonkamaketyo.

8 Iroro okemakerira oatake okantakitirora iniro okantiro:

—Ina, ¿tatarikatyō nonevitakeri?

Irorori okantiro:

—Atsi irorompatyō pinevitakeri igitō Joan Giviatantatsirira.

Ovashi opiganaa okantapaakeri Erorishi:

—Onti nokogake pintogitorenkakagantakerira Joan Giviatantatsirira oyagakenkanira igitō peratoku pimpakotakenarora.

9 Oga^{tyo} ikenake irirori ikenkisureanaka, kantankicha matakaturi ikantakero, aikiro ikemaigakeritari maganiro ikaemaigakerira, tyampatyō inkantakempa inkantatigaerora ovashi ikanti:

—Iroroventi nanityo.

10 Itigankake soraro inakera Joan yashitakotakara intogitorenkakiterira iramakotakenerora igitō. **11** Impo yamakotakenero ipakotapaakero, irorokya gishonkakotakenero iniro. **12** Impogini yogari irogamereegi Joan ipokashiigakeri yamaiganairira ikitaigairira. Impo iaigake ikamantaigakitirira Jeso.

*Jeso yogitovaigakerora pan
(Mr 6.30-44; Ir 9.10-17; Jn 6.1-14)*

13 Impogini yogari Jeso ikemakotakerira Joan yogakagantunkanira iatake parikoti intagani intentaiganaa irogamereegi onti ikenaiganake pitotsiku, kantankicha ineaigavakerityo timaigatsirira kara yogiaiganakeri yanuiiganake.

14 Impo yogenkeigapaaka yagatakoigapaakera. Iroro yaguivetanakara Jeso ineaigapaakeri patovageigamataktyo matsigenkaegi kara itsarogakagaiganakari maganiro. Yovegaigakeri maganiro mantsigaigankitsirira. **15** Impo inanaira poreatsiri shavini yogari irogamereegi ikantaigiri:

—Atake ishavitanai poreatsiri. Akari aka tera tyani timatsine. Atsi pakuaigaeri maganiro yogaegi iriaigaera anta otimagetakera pankotsipage kameti impunaventavageigakeniri isekaegi isekataigakempara.

16 Kantankicha Jeso ikantaigiri:

—Garatyō iaigi. Paigerityo viroegi isekataigakempara.

17 Iriroegi ikantaigiri:

—Mameri tatampa nompaigakeri. Intagani-vatisanotyo onai 5 pan, yogari shima pitenivani inai.

18 Ikanti Jeso:

—Atsi maigakenaro.

19 Impo ikantaigakeri impirinitaigakera maganiro shimpashiku. Iriroegi ipirinitaigake impo

yogari Jeso inoshikakero pan intiri shima yapagotakeri ineventanaka enoku iniakerira Tasorintsi ikantiri: “Apa, noshinevagetakatyō maika pipakenara nogaignakemparira.” Impo ikotagakero pan ipaigakeri irogamereegi, iriroegikya paigakeri maganiro. Ario ikañotagakari shima irirori. ²⁰ Isekataigaka maganiro ikemaiganaka, impo yogari irogamereegi yapatoigairo aityokyarira onai yoyagaigairo tsivetaku shatekapagerikatyō kara onakotake 12. ²¹ Maganiro sekataigan-kicharira ikaravageigaketyō 5,000, kantankicha intagani yogotunkani surariegi antariniegi, tera ogotenkani tsinaneegi intiegiri ananekiegi.

*Yanuiatakerora Jeso enokua nia
(Mr 6.45-52; Jn 6.16-21)*

²² Impogini yogari Jeso ikantaigiri irogamereegi:

—Mateiganaempa pitotsiku piivaiganaera pimonteiganaempa intati. Narori gatata nopoki, tsikyata noneaigavaeri yogaegi iriaigaera.

²³ Impo iaiganaira maganiro, irirori iatake otishiku iniakerira Iriri, paniro yapuntanaka. Ipitake anta ovashi ochapitanake. ²⁴ Yogari irogamereegi atavageigake nigankia kara. Ogari inkaare ovoresekantamatanketyo kara osagusagumatanakerotyo pitotsi pogn pogn, otampiavagetanaketari tampie jiriririri ogipigipitakoigavakerityo. ²⁵ Impo osariagitetaara kutagiteri ipokapaake Jeso yanuiatapaakero enokua nia. ²⁶ Yogari irogamereegi ineaigutarityo itsarogavageigamatanketyo kara ikaemavaitaigamatanketyo:

—¡Inaa, inaa, neri yoga kasuvarerini!

²⁷ Iniamatanaketyo Jeso ikantaigiri:

—¡Nanti! ¡Gara pitsarogaigi, shineiganaempa!

²⁸ Iniamatanaketyo Perero ikanti:

—Notinkami, viroraty, iroroventi kaemenanityo nompokakera kara viroku nanuiatanakerora enokua nia.

²⁹ Icantiri Jeso:

—Tainanityo.

Yaguitanake Perero yanuiavetanaka iriatake-mera inakera Jeso. ³⁰ Kantankicha ineakerora otampiavagetanakera itsarogamatanaketyo ogatyo ikenake itsitiganake ikaemamatananaketyo:

—¡Notinkamii, gavaenaa!

³¹ Igenanekyattyo yakontsaanake Jeso inoshitatavairi irakoku ikantiri:

—¡Tesakona pogote arisano nagaveavageti! ¿Antari gara pitsarogi?

³² Iroro yomateiganaara pitotsiku asatyo ope-ganaa tampia. ³³ Maganiro naigankitsirira pitotsiku itigeroaventaiganakari Jeso ikantaigiri:

—¡Arisanoniroro vinti Itomi Tasorintsi!

Jeso yovegaigakerira mantsigaigankitsirira Jenesarekunirira

(Mr 6.53-56)

³⁴ Impogini imonteaganaka intati iaigake Jenesareku. ³⁵ Yogaegiri timaigatsirira kara ineaigavakerira inti Jeso ishigaigamatanakatyo ikamantavakagaiganakara itsotenkav-

ageiganakerotyo itimageigira. Yamaigapaakeneri maganiro mantsigaigankitsirira irovegaigaerira.
³⁶ Impo iriroegi ikantaigiri:

—Notinkamii, nokogake nontsagatu-maigakerora okaratsaiku pimanchaki.
Impo maganiro tsagatakoigakeririra yovegaiganaa.

15

*Jeso yogotagaigaikerira irogamereegi tatoita kitsitinkantatsi
(Mr 7.1-23)*

¹ Impogini ipokaigake pariseoegi intiegiri go-tagantaigirorira itsirinkakotanakerira Moiseshi, iponiaigapaaka Jerosarenku, ikantaigakeri:

² —¿Tyara ikantaigakara pogamereegi tera intsatagaigero magatiro ikantageiganakerira yashikiiganakairira? Pine omirinka isekataigara tera inkivakoigempa inkañotagaigaikerora ikantaiganakerira.

³ Yogari Jeso ikantaigiri:

—¿Tyara pikantaigakara viroegi tera iroro pintsatagaige ikantagetakerira Tasorintsi, onti pikogaigake pintsatagaigaikerora ikantaiganakerira yashikiiganakempirira pairani?

⁴ Ikantavetakatari Tasorintsi: ‘Pimpinkatsaigaikerira piri ontiri piniro gara pipugatsanaigari.’ Aikiro ikanti: ‘Yogari kisashitakemparineririra iriri ontirika iriniro irogakenkanityo.’^{*} ⁵ Kantankicha viroegi onti pogagaigaikerero. Pine maika aiñoegi tomintaigacharira kogakovageigankicharira ikantaigavetakari itomi intsarogakagakemparira impaigakerira ikogakoigakarira, kantankicha

* **15:4** Ek 20.12; 21.17; Ire 20.9

viroegi onti pikantaigake kametitake inkantakerira: ‘Gara nagavei nopaigimpira pineviigakenarira, magatirotari nashintage-tarira onti nashintakagakari Tasorintsi’,
 6 ovashi gara ipiri. Antari pikañoigakerora maika onti pokaganakero ikantakerira Tasorintsi, irorokya pipampiatakoiganake ikantageigakerira yashikiiganakempirira pairani.
 7 Nokantantaigakempirira onti pikematsatamampegaigaka kogapage. Ikantasanotakeniroro kamantantatsirira Isaiashi itsirinkakoiganakempirira pairani ikanti:

8 ‘Irrioegi ikantaigavetaka: Tasorintsi inti pairorira ikametivageti, kantankicha onttyo ikantamampegaigaka kogapage, teratyo arisano isuretakoigena.

9 Aikiro ikantaigavetaka: Tasorintsi inti Atinkamiegi,
 kantankicha onti yogotagantaigi isureigakarira matsigenkaegi.’

10 Impo ikaemaigakeri maganiro yapatoitaigakeri ikantaigiri:

—Kemisantasanoigena maganiro viroegi pinkemasanoigakenara. 11 Ogari ogagetaganirira tera iroro kitsitinkantsine. Ogari pinkante oniagisevagetaganirira posantepage irorotari kitsitinkantagetatsi.

12 Impo yagatanakera iniavagetakera yaiñoniiganakari irogamereegi ikantaigiri:

—¿Pineaigakeri pariseoegi ikisaiganakara ike-maigakempirira pikantaigakerira maika?

13-14 Ikanti Jeso:

—Arione inkañoigake, magatirotari pankirintsi terira iriro pankiterone Apa timatsirira enoku ashiakenkanityo impogini. Iriroegi ontitari ikañoigari terira inee ikatsavakoiganakerira pashini terira inee. Antari inkañotakemparika maika piteni terira inee inkatsavakagaigempara iranuitaiganakera, pitenirotyo iranonkaiganakempa otseraaku.

¹⁵ Iniamatanaketyo Perero ikantiri:

—Atsi kamantaigena tatoita pikantakotake inkaara.

¹⁶ Ikanti Jeso:

—¡Arioratyo pikañoigaka viroegi tera pinkemaige! ¹⁷ ¿Matsi tera pinkemaigero nokantaigakempirira? Nokanti magatiro ogagetaganirira onti oatake segutontsiku, impo oshitakotaagani. ¹⁸ Kantankicha magatiro oniagisevagetaganirira onti oponiaka suretsiku, irorotari osuregisevagetantanaganirira. Iroro pinkante okitsitinkantiniroro suretsiku. ¹⁹ Ariotari oponiagetari isureku matsigenka isuregisevageigarira posantepage, yogantaigira, inoshikaigirora tsinaneegi suraritakoigatsirira ontiri terira osuraritakoige, ikoshiigira, yamatavitantaigira, iniashivageigarora kogapage. ²⁰ Magatiropage oka ovetsikagisetaganirira iroro pinkante okitsitinkantiniroro suretsiku, kantankicha ogari pisekataigempara garira pikivakoiga pinkañotagaigakerora ikantaiganakerira yashihiiganakempirira teratyo onkitsitinkante.

Jeso yovegairora oshinto tsinane terira iroro joria

(*Mr 7.24-30*)

²¹ Impogini iatai Jeso Tiroku ontiri Suronku.

²² Impo okenapaake paniro tsinane kananea okanti:

—¡Notinkamii, Iyashikitanakerira Iravi, kavintsaavagetenakario! Aiño noshinto itimagutakero kamagarini atspereavagetaketyo kara.

²³ Kantankicha yogari Jeso teratyo irinie, onti ikemisantanake. Impo yaiñoniiganakari irogamereegi ikantaigakerira:

—Atsi kematsatero kameti oataeniri, onti ogiaigapaakai okaemavatapaakera.

²⁴ Ikanti Jeso:

—Intagani itigankavitakena Tasorintsi nompokashiigakerira nonkavintsajaigakerira iseraereegi, ontitari ikañoigakari ovisha timpinaigankitsirira.

²⁵ Kantankicha irorori ariompatyo aiñonitanakariri otigeroaventanakarira okanti:

—¡Notinkamii, kavintsaavagetenakario!

²⁶ Kantankicha Jeso ikantiro:

—Tera onkametite iragapitsaigakenkanira iseka ananekiegi impakenkanira otsiti.

²⁷ Irorori okanti:

—Notinkami, arisanoniroro pikantasano-takeniroro, kantankicha otsiti ineakoigirira isekataigara shintaigaririra itimashitavake otapinaku mesa yogaverokitavakara ovoroki* ashirianakara.

* **15:27** Ovoroki: okantagani aikiro “oporoki”.

²⁸ Ikantutarotyo Jeso:

—Iroroventi pogotakera nagaveakera noveg-aerora pishinto, maika nonkavintsaakempityo novegaerora.

Iroro ikantakera maika ogatyo okenake oveg-anaa.

Jeso yovegagetairi tovaini mantsigaigankitsirira

²⁹ Impogini iatai Jeso ikenanake otsapiaku inkaare Garirea itonkoanake otishiku, ario ipirinitake kara. ³⁰ Impo iatashiigakeri tovaini matsigenkaegi yamaiganakenerira terira iranuitagantsiige, terira ineaige, terira iriniaige, terira irakoige, aikiro iposantevagetanakatyō kara mantsigaigankitsirira. Irirori yovegaigairi maganiro. ³¹ Yogari patoitaigankicharira yogavageiganaketyo kavako, ineaigakeritari in-eaignaira terira ineaigavetempa, yakoiganaira terira irakoigavetempa, yanuitagantsivageiganaira terira iranuitagantsiigavetempa, aikiro iniaiganaira terira iriniaigavetempa. Ogatyo ikenaigake ishineventaigamatananakarityo Tasorintsi kavintsajaigiririra iseraereegi.

*Jeso yositovaigairora pan
(Mr 8.1-10)*

³² Impogini ikaemaigakeri Jeso irogamereegi ikantaigiri:

—Notsarogakagaiganakari yogaegi, noneaketari ipiriniventaigakena aka mavati kutagiteri niganki itsونکاتاگاناكا isekaegi. Maikari maika mameri tatampa irogaigakempa. Tera nonkoge nontigankaigaerira iriaigaera ivankoku, ontirorokari agaiganakeri itasegane avotsiku.

³³ Impo ikantaigiri irogamereegi:

—¡Ojojoo itovaigavagetratyo kara! ¿Ario tyara nagaigakero pan nompaigakerira isekataigakempara maganiro? Ontitari anaigake osarigagiteta-paakera, tera tyani timatsine aka.

³⁴ Ikantaigiri irirori:

—¿Akatovainivati onai pan pamaigakerira?

Ikantaigi:

—Intaganivati onai 7, impo aiñó aikiro piteni shima.

³⁵ Yogari Jeso ikantaigakeri impirinitaigakera maganiro, ³⁶ impo yagagetanakero pan intiri shima yapagogetanakeri inianakeri Tasorintsi ikantiri: “Apa, noshinevagetakatyo pipakenara oka noseka.” Impo ikotagakero pan intiri shima ipageigakeri irogamereegi, irirokyari pageigavakeri maganiro. ³⁷ Isekataigaka maganiro ikemaiganaka. Ogari aityokyarira onai, yoyagaigairo irogamereegi tsivetaku onakotai 7. ³⁸ Maganiro sekataigankicharira ikaravageigaketyo 4,000. Intaganisano yogoigunkani surariegi, tera ogoigenkani tsinaneegi intiegiri ananekiegi. ³⁹ Impo Jeso yapakuiaigairi iriaigaera ivankoegiku. Irirori yomatetanaa pitotsiku itentaiganaarira irogamereegi iaigake pashiniku kipatsi paitacharira Magarara.

16

Pariseoegi intiegiri saroseoegi ikantaigavetakarira Jeso ineakagaigakerira terira oneimagetenkani

(Mr 8.11-13; Ir 12.54-56)

¹ Impogini ipokashiigapaakeri Jeso pariseoegi intiegiri saroseoegi ikantaigapaakeri ineakagaigakerira terira oneimagedenkani onkoneatakerera anta enoku inkiteku. Iriroegi onti ikogaigake ineaigakerira arisanorikara opaitaka yagaveavagetira, nerotyo ikañotantaigakarorira maika.

² Kantankicha irirori ikantaigiri: “Viroegi pineaigirora okiraagiteta inanaira poreatsiri shavini onti pikantaigi: ‘Kamani onkametigitake, kiraagitemataketari.’

³ Antari ontirika okiraagiteta tsitekyamani onti pikantaigi: ‘Maika gara okametigiteti, kiraagitetamanaketari, aikiro amokake.’ Tyarikatyo pikantaigaka viroegi pogoigakerora ariorika onkametigitake ontirika gara okametigiteti, kantankicha tera pogotumaige tyara okantaka okañotakara maika pineaigakerora posante terira oneimagedenkani pairani. ⁴ Viroegi apaiventavageigakempi kañovagetagantsi, pikogantaigakarira noneakagaigakempira terira oneimagedenkani, kantankicha garatyo noneakagaigimpi. Intagatityo noneakagaigakempi pashini onkañotakemparo ikañotagunkanira Jonashi pairani.”

Ovashi iokaiganairi iatai.

*Jeso ikantakotakerora irogotagantane
pariseoegi ikañotagakaro opoegantarira pan
(Mr 8.14-21)*

⁵ Antari imonteraigakara irogamereegi Jeso intati imagisantaiganakero iramaiganakera

pan isekataigakempara. ⁶ Impo yogari Jeso ikantaigiri:

—Viroegi, tsikyanira pogakoigarokari opoegantarira pan irashiegi pariseoegi intiegiri saroseoegi.

⁷ Iroro ikemaigavakerira iniavakagaiganaka ikantaigi:

—Onti ineakera tera amaige pan, nerotyo ikan-tantaigakairira maika.

⁸ Yogari Jeso ineaigavakerira iniavaka-gaiganakara ikantaigutarityo:

—¡Tesakona pogotasanoige arisano nagaveav-ageti! ¿Tyara okantakara pikantaigakera: ‘Onti ineakera tera amaige pan?’ ⁹ ¿Matsi tekya pogoige? ¿Matsi tenige pisureigaemparo pan onavetakara 5 nokotagagetakerora nosekatagaigakarira 5,000 surariegi? Impo papatoigairora aityokyarira onai, ¿akatovaiti onakotai tsivetaku? ¿Matsi pimagisantaigairo? ¹⁰ Aikiro ¿matsi tenige pisureigaemparo onavetakara pan 7 nokotagagetakerora nosekatagaigakarira 4,000 surariegi? Impo papatoigairora aityokyarira onai, ¿akatovaiti onakotai tsivetaku? ¿Matsi pimagisantaigairo? ¹¹ Antari nokantaigakempira: ‘Tsikyanira pogakoigarokari opoegantarira pan irashiegi pariseoegi intiegiri saroseoegi’, ¿tyara okantaka tera pogoigavake tera iroro noniakote pan?

¹² Ovashi yogoigake irogamereegi tera iroro inkantasanote opoegantarira pan, ontityo ikantakotake yogotagantaigirira pariseoegi intiegiri saroseoegi ganiri ikemisantaigiri yogotagantavageigira.

Perero ikantakera Jeso inti Igoveenkariegite is-eraereegi

(*Mr 8.27-30; Ir 9.18-21*)

13 Impogini iatake Jeso ikenanake kara ochoenitakara Sesarea Piripo. Impo ikantaigiri irogamereegi:

—¿Tyara ikantaigi maganiro matsigenkaegi?

¿Tyani yoga Kañotasanotakaririra Matsigenka?

14 Iriroegi ikantaigiri:

—Ikonogagarantaigaka ikantaigake: ‘Inti Joan Giviatantatsirira.’ Pashini kantaigankitsi: ‘Inti Eriashi.’ Pashinikya kantaigankitsi: ‘Inti Jeremiashi, terika iriro, inti pashini kamantantatsirira pairaninirira yanianaira.’

15 Impo ikantaigiri:

—Viroegiri, ¿tyara pikantaigana?

16 Iniamatanaketyo Sumo Perero ikantiri:

—Viro vinti Ikogakagakerira Tasorintsi impe-gakempara Nogoveenkariegite, vinti Itomi Tasor-intsi ikantakanirira itimi.

17 Ikantiri Jeso:

—Viro Sumo, itomi Jonashi, shinetempa, teranika iriro matsigenkaegi gotagaigempirone oka pikantakenarira maika. Intitari gotagakem-piro Apa timatsirira enoku, ikavintsaakempitari.

18 Naro nonkantakempi viro vinti Perero. Impogini tyanirika kañotakempine viro pikantakera maika, naro nogavisaakotakeri kameti intentakemparira maganiro kematsaigakanerira. Garatyo yagaveimaigiri kamagarini, ariompatyo inkematsatasanoiganakenari.

19 Kantankicha viro nagaveakagakempi kameti pinkamantaigakerira pashinipage

matsigenkaegi tyara inkantaigakempa kameti nogavisaakoigakerira iriroegi aikiro nompegakempa Igoveenkariegite. Tatarika oita pinkantavitantake aka kipatsiku, ariotyo inkañotakempa Tasorintsi timatsirira enoku inkantakera onkantavitantakenkanira, matakatari ikantavitantakero. Aikiro tatarika oita pinkantake kametitake, ariotyo inkañotakempa irirori inkantake kametitake.

20 Impo Jeso ikantaviigakeri irogamereegi ganiri ikamantakoigiri inkantaigakera inti Ikogakagakerira Tasorintsi impegakempa Igoveenkariegite iseraereegi.

Jeso ikamantaigakerira irogamereegi inkamakeria

(Mr 8.31–9.1; Ir 9.22–27)

21 Impogini Jeso itsititanakero ikamantaiganakerira irogamereegi iriatakera Jerosarenku iratsipereakagavageigakerira itinkamiegi jorioegi intiegiri itinkamiegi saseroroteegi intiegiri aikiro gotagantaigirorira itsirinkakotanakerira Moiseshi impo ovashi irogakenkani, kantankicha omavatanakempa kutagiteri iraniana. **22** Yogari Perero intentanakari antakona ikantavetanakarira ikantiri:

—¡Notinkami, atsi garatyo pikañota maika!
¡Garatyo yogaitimpi!

23 Kantankicha Jeso ishonkatematanakarityo ikantutarityo:

—¡Virori Satanashi, piataenityo parikoti, ontitari pikogavetaka pampakuakagakenamerá ganigeniri notsatagagetairo itigankavitakenarira

Tasorintsi, teranika iroro pisuretakogetempa ikogagetirira irirori, ontari pisuretakogetaka ikogageigirira matsigenkaegi!

24 Impo Jeso ikantaigiri irogamereegi:

—Tyanirika kogankitsine inkantakanira inkematsatasanotakena garatyō ipiriniventiro ikogagetirira irirori, ontityo inkantakani impiriniventavagetanakero nokogagetirira naro, aikiro iratsipereaventavagetakenatyo ariorika inkamaventakena. **25** Tyanirika tsarogakagacha ikiiro tera inkoge iratsipereaventavagetakenara ikiirotyo kañotaganantanankicha, intagatitari ikogake irovetsikagetakera tatarika ikogagetakerira irirori. Kantankicha yogari piriniventirorira nokogagetirira naro yatsipereaventakenara, iriro pinkante iriatake itimira Tasorintsi inkantakani intimake. **26** Intimavetakempatyo gaveankitsinerira irashintakemparora magatiro kipatsipagekutirira kantankicha impoginityo inkamanae iriatake morekariku, ñmatsi ario agaveake organiakerira iaraki? Garatyō agaveimati. Irashintagevetakemparoto magatiro kantankicha garatyō yagaveimati impunaventakempara ganiri iati morekariku. **27** Antari nompigaatera impogini nonkoveenkavagetapaake nonkañotapaakempari Apa ikoveenkavagetira. Antari nompokaatera nontentaigapaakempari isaankariite nogishineaiagaakerira maganiro shineventaiganarira, iriroegikya pashiventagaiganarira onti nogipashagentaigapaakeri. **28** Maika nonkamantasanoigakempi antari

gatataro pikamaigi pinkonogagarantaigakempa pineaigakena nonkoveenkatana kera viroegiku.

17

*Jeso ikantatigimoiganakarira irogamereegi
(Mr 9.2-13; Ir 9.28-36)*

¹ Impogini avisanakera 6 kutagiteri yogari Jeso iatake anta otishiku itonkoavageta naake. Intagani itentaiganaka Perero, Santiago intiri irirenti Santiago paitacharira Joan. ² Impogini inaigakera anta katsiketyo iriroegi ineaigiri ikantatigimoiganakari. Ogatyo ikenake ishimpokirerenkanake ivoroku kañomataka ishimpokirerenkira poreatsiri, aikiro imanchaki onkutamagovageteratyo kara. ³ Ineaigutarityo Moiseshi intiri Eriashi iniaigakerira Jeso ⁴ iniamatanaketyo Perero ikantiri Jeso:

—Notinkami, jmatsi ariokonaty o anaigake aka! Pikogakerika novashiigakera mavati pankotsi otyomiatirira, patiro pashi, patiro irashi Moiseshi, ogari omavatakemparira onti irashi Eriashi.

⁵ Tekyaenkara iragatumate iniakera apamankakoigapaakeri menkori, impo ikemaigiri inianake Tasorintsi arionika apatosegakara ikanti: “Yokari yoka inti Notomi, notasanovagetaryo kara noshineventakarityo. Maika atsi kemisantasanoigeri viroegi.”*

⁶ Irorotyo ikemaigakerira ogatyo ikenaigake itsarogavageiganake yompatakaigamatana katyo. ⁷ Kantankicha Jeso yaiñoniiganakari itsagaigakeri ikanti:

* **17:5** Ireo 18.15

—Tinajaiganae gara pitsarogaigi.

⁸ Ikamaguigavetaa mameri iraratinkaigaera, panivani inai Jeso.

⁹ Impo ipigaigaara yanonkaiganaara yogari Jeso ikantaigiri:

—Gatata tyani pikamantumaigi oga pineaigakerira maika. Antari inkitareanaera Kañotasanotakaririra Matsigenka inkitavetakenkanira, ario pinkante pinkamantantaigakero.

¹⁰ Impo iriroegi ikantaigiri:

—¿Tyara ikantakara gotagantaigirorira itsirinkakotanakerira Moiseshi ikantaigakera iketyo pokankitsine Eriashi?

¹¹ Irirori ikantaigiri:

—Arisanoniroro ogari Itsirinkakagantakerira Tasorintsi okantake iketyo pokankitsine Eriashi inkenkitsatimoigakerira jorioegi inkantaigakerira inkantatigaiganakempara inegintetashigavakemparira impogitapaankitsinerira.

¹² Maika nonkamantaigakempi mataka ipokuti Eriashi, kantankicha tera irogotavakenkani onti ikisavunkani yatsipereakagavagetunkanira ovashi yogunkani. Ariotyo inkañotagakenkani impogini Kañotasanotakaririra Matsigenka iratsipereakagavagetakenkanira ovashi irogakenkani.

¹³ Iriroegi isureigamatananakarotyo ikantaigi: “Inti iniakotake Joan Giviatantatsirira.”

*Jeso yoneagaarira kamagarini
(Mr 9.14-29; Ir 9.37-43)*

14 Impogini yagonkeigapaakara inaigakera matsigenkaegi yapatoitaigakara, ipokashita-paakeri Jeso paniro surari itigeroaventapaakari ikantiri:

15 —Notinkamii, tsarogakagavagetemparikario notomi ikamakamavagetake yatsipereavage-taketyo kara. Iokavokigematakyo tsitsiku, aikiro iokaakaavagetaka oaaku. **16** Namaigavetakeneri pogamereegi irovegaigaerira, kantankicha teratyo iragaveaigeri.

17 Ikanti Jeso:

—¡Ario pikantavageigaka viroegi tekyaenkatyo pogoigero iragaveane Tasorintsi, teranika pinkogaige pinkematsaigakerira! ¿Akasamaninivatirorokari nompiriniventaitgakempi nantsipereakoigakempira? Iroroventi atsi maigakenarinityo aka.

18 Impo iniitarityo kamagarini ikantiri:

—Maika piatae parikoti.

Ogatyo ikenake ikontetapanuti iatai parikoti ovashi yovegasanovagetanaa ananeki itimaguve-takarira.

19 Yogari irogamereegi iniaigakeri Jeso parikoti ikantaigiri:

—¿Tyarika okantakara naroegi tera nagaveaige noneagaigakemparira?

20 Ikanti Jeso:

—Ontitari kantankicha tera pisure-tasanoigemparo nagaveane pinkantaigakera: ‘Arisanotari yagaveavageti Notinkami iragaveakagakenatyo.’ Antari pinkañoigakeromera maika pisuretasanotumaigakemparora maani, ario pinkante pagaveaigaketyo

pinkantaigakerora oga otishi: ‘Gaganakempi piate parikoti’, ogaganakempatyo. Garatyo tatoita komutapitsatumaigimpi arisanorika opaitaka pisuretasanoigakarora nagaveavagetira.
21 Kantankicha yogari kamagarini kañorira maika garira oketyo piniaigiri Tasorintsi, aikiro garira pipitashiigarо kogapage gara pisekataiga, garatyo pagaveimaigiri poneagaigarira.

*Jeso ikamantaigairira aikiro inkamakera
 (Mr 9.30-32; Ir 9.43-45)*

22 Impogini Jeso itentaigakarira irogamereegi ikenaiganakera kara Garireaku, ikamantaigakeri ikanti:

—Yogari Kañotasanolakaririra Matsigenka iragakagantakenkani **23** impo irogakagantakenkani, kantankicha omavatanakempara kutagiteri iranianae.

Iroro ikemaigavakerira ikenkisureavageiganakatyо kara.

Koriki ashi ivanko Tasorintsi

24 Impo yagonkeigapaakara Kaperenaoku, ipokashiigarо Perero kogantaigaririra itovaireegi koriki ashi ivanko Tasorintsi ikantaigiri:

—Yogari gotagaigimpirira ¿ipunatityо koriki ashi ivanko Tasorintsi?

25 Ikanti Perero:

—Jeeje, ipunatinirorotyo.

Iroro ikianakera tsompogi pankotsiku inakera Jeso iketyo niavakeri ikantiri:

—Sumo, ¿tyara pinkante viro? ¿Tyani ikogantaiga koriki koveenkaripage timageigatsirira aka

kipatsiku? ¿Irilo ikogantaiga itomiegi intirika ikogantaiga pashini?

²⁶ Ikanti Perero:

—Intagani ikogantaiga pashini.

Ikanti Jeso:

—Iroroventi tera iriro inkogantaigempa itomiegi, ²⁷ kantankicha aroegi ganiri iniashinaigai, piate inkaareku pintsagaatakitera impo yogari iketyorira pagake pintinkirankakerira pinoshikakerira korikimenta nankitsirira ivaganteku pamaigakenerira kogantantaigacharira koriki ashi ivanko Tasorintsi pimpaigakerira. Irogonketakempa ampunaventaigakempara piteniro.

18

Tyani visaigakerine itovaireegi impogini

(Mr 9.33-37, 42-48; Ir 9.46-48; 17.1-2)

¹ Impogini yaiñoniiganakari irogamereege ikan-taigiri:

—¿Tyani visaigakerine itovaireegi impogini pimegakempara Nogoveenkariiegite?

² Irirori ikaemake paniro ananeki yogaratinkakeri niganki inaigakera ³ ikantaigiri:

—Nonkantasanoigakempi garira pikantati-gaiga pisureku pinkañoigakemparira ananekiegi garatyo pitimimoigana impogini nampatoitaigakerira maganiro kematsaiganarira nompe-gakempara Igoveenkariiegite, ⁴ kantankicha tyanirika kañotakemparine yoka ananeki terira isuretumatempera iravisumanatantakera, irilo pinkante pairotoyo iravisantavagetake impogini.

⁵ Aikiro tyanirika kavintsaakerine ananeki

kañorira yoka kañomataka nantinirikatyo ikavintsaake, nantitari ikematsatake.

6 “Kantankicha tyanirika kañovagetagakerine paniro kematsatakenarira terira impaitumatempa inkisashivagetakenkanityo kara. Irorotari nonkantantaigakempirira ganiri ikañotiri maika oketyome irogatsatakotantakenkani itsanoku omarane mapu otononkantaganirira iramanakenkanira iokaatakenkanira otsompogiatira omaraaniku nia. **7** ¡Maikaniroro iratsipereavageigake maganiro timaigatsirira aka kipatsiku, intimaigaketari kogaigankitsinerira inkañovagetagantaigakera! Ariotyo onkañotakempa maika, kantankicha pairotyo iratsipereasanovageigake kañoigakeronerira maika inkisashitasanoigakenkanira.

8 “Nonkantantaigakempirira irorora kañovagetagakempine pako ontirika pivenkiti, ariometyo povatuakerome povuokakerora parikoti, pairotari okametitake pinegintetasanovagetagempa impo pinkamanakerika piatakera pintimimotakerira Tasorintsi, avisakero pinkañovagetagempa impo pinkamanakerika piatakera morekariku garira otsivakumati. **9** Ontirika poki irorora kañovagetagakempine, ariometyo pinkitsogitakerome povuokakerora parikoti, pairotari okametitake pinegintetasanovagetagempa impo pinkamanakerika piatakera pintimimotakerira Tasorintsi, avisakero pinkañovagetagempa impo pinkamanakerika piatakera morekariku garira otsivakumati.

*Ovisha pegankicharira
(Ir 15.3-7)*

10 “Nonkantaigakempi maika garatyo pikisaigiri yogaegi kematsaiganarira terira impaitumaigempa, aiñoegitari isaankariite Apa pampogiakoigiririra. Irirroegi ikantakani inaigake anta enoku inampinaku. **11** Yogari Kañotasanotakaririra Matsigenka ontí ipokashitake irogavisaakoigakerira pegaigankicharira.

12 “¿Tyara pinkantaige viroegi? Pine intimera paniro matsigenka impiratakempa 100 irovishate impo impegakempa paniro, ¿matsi gara iokaiganakeri maganiro irovishate iriatakeria inkogaaterira pegankicharira? **13** Impo iragaeririka paírotyo irishineventakempari, iravisaketyo ishineventaigarira maganiro 99 terira impegavetempa. **14** Ario ikañotaka Piri timatsirira enoku tera inkoge impegumatempa paniro yokaege kematsaiganarira terira impaitumaigempa.

*Tyara ankantaigakempa agametiaigaerira
apigematsaegine
(Ir 17.3)*

15 “Tayarika inkantakempi papigematsatene pintentanakeri parikoti piniakerira paniro pinkamantaerira tyarika ikantakempi. Irirori inkemakempirika mataka pogametiairi. **16** Antari garika ikemimpi pintentanake paniro, ontirika piteni papigematsaegine kameti inkemaigakeniri irirroegi, aikiro irogoigakeniri arisanorika pikogake pogametiaera. **17** Kantankicha garika ikemi iroroventi piatetyo pintentanakerira

yapatoitaigara kematsaigatsirira inkanomaakenkanira. Garika ikemaigiri iriroegi iroroventi inkañotagakenkanityo terira inkematsateri Tasorintsi intirika kogantaiginiririra koveenkari koriki.

18 “Maika nonkantasanoigakempi tatarika oita pinkantavitantaigake aka kipatsiku, ariotyo inkañotakempa Tasorintsi timatsirira enoku inkantakera onkantavitantakenkanira, matakatari ikantavitantakero. Aikiro tatarika oita pinkantaigake kametitake, ariotyo inkañotakempa irirori inkantake kametitake.

19 “Aikiro nonkantaigakempi tatarika oita pikogaigake pineviigakerira Apa timatsirira enoku oketyo pinkemavakagasanoigakempsa impo piniaigakeri. Irirori inkemaigakempi intsatagakero tatarika oita pikantakerira. Pinaigavetakemparika piteni kantankicha pinke-mavakagaigakemparika inkemaigakempsa. **20** Omirinkatari tyarika kara yapatoventaigakena iriniaigakenara pitenityo irinaigavetakempsa ontirika irinaigavetakempsa mavani, ariotyo nonimoigakeri naro.”

Inampina koveenkari terira intsarogakagan-tempa

21 Impogini yaiñonitanakari Perero ikantiri:

—Notinkami, ¿akatovaiti nomagisantaero tyarika inkantakena napigematsatene? ¿Ario onkaratanake?

22 Ikanti Jeso:

—Garatyo ario okarati 7, ontityo pimagisan-takotaeri magatiro tyarika inkantakempi, gara okaratumati.*

²³ “Iroroventi maika nokogake nonka-mantaigakempira tyara onkantanakempa impegakempara Tasorintsi Igoveenkariegite matsigenkaegi onti nonkañotagakemparo koveenkari ikaemaigakerira inampinaegi inkantaigakerira impunaigaerira ipegakoigakerira.

²⁴ Iroro itsititanakera ikaemakagantaigakerira yamaigapaakeneri paniro pegakovagetiririra tovaini koriki kara. ²⁵ Kantankicha irirori mameri tatampa impunatantaempari nerotyo yomperaventantakaririra koveenkari impiman-takenkanira intentagantakenkanira itsinanetsite intiegiri itomiegi ontiri magatiro yashintageteririra iragantageigakemparora koriki kameti impunataeriniri ipegakogetirira. ²⁶ Kantankicha irirori yompatakaventamatananakarityo ikantiri: ‘Tsarogakagavagetenakario, pogia-kotakempara impoginityo nompunataempi maganiro koriki nopegakotimpirira.’ ²⁷ Yogari koveenkari itsarogakaganakari ikantiri: ‘Iroroventi arione, gara pipunataana’, ovashi yapakuairi.

²⁸ “Kantankicha iroro iataira itonkivoakari itovaire pegakotiririra maani. Yagamatananakerityo ikatikanakerira ikantiri: ‘¡Punataena pipegakotanara!’ ²⁹ Irirori yompatakaventavetanakari ikantiri: ‘Tsarogakagavagetenakario, impogini nompunataempi,’ ³⁰ kantankicha irirori teratyo intsarogakagempari, onti yamakagantakeri

* **18:22** Gara okaratumati: irinianku virakocha onti okantake setenta veces siete.

irashitakotakenkanira kigonkero impunataerira ipegakotirira. ³¹ Impogini ikemakoigakerira itovaireegi ikisaigamatananakatyo iaigake ikamantaigakitirira koveenkari. ³² Iroro ikemavakera ikaemakagantairi ikantiri: ‘¡Viro tera pinkametite, vinti pairorira pogagavageta pikisantira! Kogapage naro nokantakempi arione gara pipunataana, pikantakenatari nontsarogakagavagetakempsira. ³³ Ariometyo pinkañotagakerime pegakotakempsira viro pintsarogakagakemparimera irirori pinkañotakenara naro nontsarogakagakempsira.’ ³⁴ Ikisamatanakanatyo yomperaventakari iratsipereakagaigakemparira ovashi impunataeri magatiro ipegakogetirira.”

³⁵ Yagatanakera Jeso ikenkitsatakera ikanti:
—Ariotyo inkañotagaigakempi Apa timatsirira enoku garira pitsarogakagaigari pitovaireegi pimagisantaigaerora tyarikara inkantaigakempi.

19

Ikantake Jeso gara tyani okumatiro itsinanetsite

(*Mr 10.1-12; Ir 16.18*)

¹ Impogini iponianaka Jeso Garireaku iatakera Joreaku intati Jororanku. ² Yogiaiganakeri tovaini matsigenkaegi. Antari anta yovegaigairi maganiro mantsigaigankitsirira.

³ Impo ikonogagarantaigaka pariseoegi naigankitsirira kara ipokaigapaake inko-gakotagantaigakerira ineaigakerira tyarikara inkantaigeri irirori, ontitari ikogaigavetaka inkemaigakerira inkantakera tatarika oita terira

onkatinkatero ikantaigirira iriroegi kameti intsavetantaigakeriniri inkisakagantaigakerira, nerotyo ikantaigapaakeri:

—¿Okantavitantagani iokakerora surari itsinanetsite?

⁴ Irirori ikantaigiri:

—¿Matsi tera piniavantaigero Itsirinkakagantakerira Tasorintsi okanti ikyasanokyara yovamparoatake Tasorintsi matsigenka ‘pitieniro yovetsikaigakeri surari ontiri tsinane’? ⁵ Impo ikantake: ‘Nerotyo yogari surari gankitsinerira tsinane iokanakeri iriri ontiri iriniro iriatakera iragakerora inkantakani impanirotanakero. Antari okyara tekyara iragero piteni inaigavetaka, kantankicha antari yaganakerora oga ikenake itentaganakaro kañomataka panironirikatyo inai.’* ⁶ Nerotyo yogari surari gankitsirira tsinane garatyo iokumatiro, tenigetari irapiteigaempa, kañomatakatarpanironirikatyo inai, ineaketari Tasorintsi yagakerora ikanti maika tera onkametite iokanaerora, kantakanityo iragakerora.

⁷ Iriroegi ikantaigiri:

—Iroroventi, ¿tyara okantakara ikantakera Moiseshi iokanaerorika surari itsinanetsite impakero sankevanti onkantake: ‘Maika mataka nokanaimpi’, impo inkantakero oataera?

⁸ Ikantaigiri Jeso:

—Yogari Moiseshi ontitari ineakera tera pinkogaige pinkematsaigerira Tasorintsi, nerotyo ikañotantaigakempirorira maika itsirinkaiganakempira. Kantankicha antari

* ^{19:5} Jen 1.27; 5.2; 2.24

ikyasanokyara yovamparoatake Tasorintsi matsigenka, tera ario inkañotero maika.⁹ Narori nonkantaigakempi ompaniro takempirika pitsinanetsite garatyo piokiro. Pokanakerorika impogini pashinikya pagake onti pikañovagetaka.

¹⁰ Yogari irogamereegi ikantaigi:

—Iroroventi opomirintsivagetaratyo kara agenkanira tsinane. Onkanteroro tyampa ankantakero agakera tsinane.

¹¹ Yogari Jeso ikantaigiri:

—Tera iragaveaigenika maganiro inke-maigakerora nokantaigakempirira maika, intaganitari kemaigakero yagaveakagaigakerira Tasorintsi. ¹² Aiñoegitar ikonogagarantaigaka tera iragaveaige intomintaigempara. Aikiro aiño pashini onti okitsogitunkani igatsareki. Aikiro aiñoegi pashini onti ishintsitashigakero tera intsagaigero tsinane kameti impiriniventaigakeroniri magatiro ikogageturira Tasorintsi. Tyanirikara gaveankitsine inkemakerora nokantaigakempirira maika kantetyo inkemakerora.

*Jeso iniaventaigakerira ananekiegi
(Mr 10.13-16; Ir 18.15-17)*

¹³ Impogini ipokaigake pashini yamaigapaakenerira Jeso ananekiegi impatikaiigakerira igitoku aikiro iriniaventaigakerira. Yogari irogamereegi ineaigavakerira yamaigapaakerira ikantaviigavakeri ikantaigiri:

—Maiganaeri parikoti, gara poverajaigiri.

¹⁴ Kantankicha ikemaigakerira Jeso ikañoi gakerora maika ikantaigiri:

—Atsi arionenityo iripokaigakera naroku, ishineventtaigaritari Tasorintsi impegakempara Igoveenkariegite kañoigaririra yogaegi ananekiegi.

¹⁵ Impo ishonkateiganakari ipatikaiigakeri igitoku iniaventaigakerira. Impo irirori iatanai parikoti.

*Shintavagetacharira
(Mr 10.17-31; Ir 18.18-30)*

¹⁶ Antari ikenanakera Jeso kara ipokashita-paakeri paniro matsigenka ikantapaakeri:

—Gotagantatsirira, atsi kamantena tyara nonkantakempa kameti nonkantakanira nontimake. ¿Tatoita novetsikakera? ¿Tatoita kametitankitsine?

¹⁷ Ikantiri Jeso:

—Tyara okantakara pikantakenara: ‘¿Tatoita kametitankitsine?’, mameritari pashini kametitasanotatsinerira, panirotari ikantara Tasorintsi ikametitira. Kantankicha pikogakerika pinkantakanira pintimake, tsatagageterotyo magatiro itsirinkakotanakerira Moiseshi pairani.

¹⁸ Ikanti irirori:

—¿Tyatityo?

Ikanti Jeso:

—Irorotari kantatsirira: ‘Gara poganti, gara piatashitiro tsinane, gara pikoshiti, gara pitsoeventari pitovaire. ¹⁹ Pimpinkatsaigakerira piri ontiri piniro gara pipugatsanaigari, aikiro pintsarogakagavagetakemparira pitovaire

pinkañotagasanotakempatyo
vikiiro.*

²⁰ Ikantutarityo irirori:

—Arioniroro nokañotari maika notsititanakero
notsatagasanotanakerora notyomiakyani
ovashi maika. ¿Maika aityokya pashini
nontsatagakerira?

²¹ Ikantiri Jeso:

—Pikogakerika pairora pintsatagasanotakero
ikogagetirira Tasorintsi, piate pimpiman-
tagetakerora magatiropage pashintageterira
pagantakemparora koriki pimpaigakerira
kogakoigankicharira impo pimpokake
pogiavagetanakenara. Impogini ariokya
inkavintsaavagetakempi Tasorintsi enoku.

²² Ikemutatyo ikantakerira maika ikenisu-
reavagetanakatyo kara ovashi iatai ipiganaara,
intitari shintavagetacharira.

²³ Impogini ishonkashiiganakari Jeso
irogamereegi ikantaigiri:

—Arisanotyo nonkantasanoigakempi oko-
muvgatataraty kara irogaviaakotakenkanira
shintavagetacharira impegakempara Tasorintsi
Igoveenkarite. ²⁴ Nonkantutaigaemptyo aikiro,
¿matsi ario iragaveake kameyo inkianakera
otsempokiku kitsapi iravisakerora aikyara?
Garatyo yagaveimati. Irirompasanotyo
shintavagetacharira intasanotakemparorika
yashintageterira garatyo yogaviaakotagani.

²⁵ Ikemaigutatyo irogamereegi ariompatyo yo-
gasanovageiganakeri kavako ikantaigiri:

* **19:19** Ek 20.12-16; Ire 19.18

—Iroroventi ḡtyanimpatyora irogavisaakotakenkani?

²⁶ Ipampogiaiganakeri Jeso ikantaigiri:

—Gara tyani gavisaakotumatacha tsikyata, intaganitari Tasorintsi gaveatsi yogavisaakotantira, teranika tatoita komutapitsatumatemparine irirori.

²⁷ Impo inianake Perero ikanti:

—Notinkami, naroegi nokaiganakero magatiro nashintaigavetarira nogiavageiganakempira. Maikari ḡtatarika impaigakena Tasorintsi?

²⁸ Ikantaigiri Jeso:

—Arisanotyo nonkantasanoigakempi antari onkyatagagetaenkanira magatiro, nompegasanotakempa Igoveenkariiegite maganiro. Viroegi giavageigakenarira maika pintentaigakena pimpegaigakempara aikiro koveenkariegi pinkantaigakera tyara inkantaigakenkani iyashikiiganakerira itomiegi Iseraere.* ²⁹ Aikiro yogaegi maganiro okaiganakerorira ivankoegi intirika irirentiegi, iritsiroegi, iriniro, iriri, itomiegi, aikiro itsamaire, iriaigakera impiriniventaigakerora notigankaviigakeririra impaigakenkani pashini paipotyo avisagetakero yashintageigavetakarira ontovaiagavagetakera, tatarika oita iokaiganake patiro impaigaenkani pashini 100. Aikiro inkantakani intimaigake gara ineimaigairo igamane. ³⁰ Kantankicha ikonogagarantaigaka

* **19:28** Pimpegaigakempara aikiro koveenkariegi pinkantaigakera tyara inkantaigakenkani iyashikiiganakerira itomiegi Iseraere: irinianeku virakocha ontí okantake se sentarán también en doce tronos para juzgar a las doce tribus de Israel.

aiñoegi ineaigavetunkanirira maika yavisaigakerira itovaire, kantankicha iriroegikyatyō iravisaiganaenkani impogini. Iriroegikya ineaigavetunkanirira yavisaigunkanira maika, impogini iriroegikyatyō visantaiganaatsine.

20

*Jeso ikantakotakerora impegakempara
Tasorintsi Igoveenkariegite kematsaigiririra
ikañotagakaro shintankicharira itsamaire*

¹ “Maika nokogake nonkantakotakerora tyara onkantanakempa impogini irapatoitaigakerira Tasorintsi maganiro kematsaigiririra impegakempara Igoveenkariegite nonkañotagakerora shintankicharira itsamaire. Irirori onti iatamanakeni inkaara tsitekyamani inkogakitera tavageigatsirira intsamaaitakoigakenerira iovashite. ² Iroro ineaigapaakerira kogaigankitsirira irantavageigakera ikantaigiri: ‘Pikogaigakerika pintsamaaitakoigakerora ova, naro nompaigakempi paniro tenario.’ Iriroegi ikantaigake kametitake, nerotyo itigankaigakerira iriaigakera intsamaiigakera. ³ Impo yogaenokanakara poreatsiri iatai opimantavagetantapinitaganira inkogaatera pashini tsamaiigankitsinerira. Iroro ineaigapaakerira pashini pitaigamatake kogapage tera tatoita irantumaige, ⁴ ikantaigiri: ‘Piaige viroegi aikiro pantavageigakera notsamaireku, impogini nompunaigakempi’, ovashi iaigake. ⁵ Impo ikatinkatanakera poreatsiri ipigutanaatyō aikiro inkogaatera pashini tsamaiigankitsinerira. Impo ario ikañotagairo itsunkanaira yagaati

pashini. ⁶ Impo panikyara irishonkanakempa poreatsiri ipigutanaa aikiro ineaigapaake pashini tera tatoita irantumaige ikantaigiri: ‘¿Tyara okantaka pirinitaigakevi kogapage tera tatoita pantumaige?’ ⁷ Ikantaigi: ‘Teranika tyani kogakoigenane.’ Irirori ikantaigiri: ‘Iroroventi piaige viroegi pantavageigakera notsamaireku.’

⁸ “Impo ochapinienkatanakera ikantiri tsamaitagaigakeririra: ‘Maika kaemaigeri tsamaiigankitsirira pimpunaigakerira paniropage, pintsitigetanakeri impogigeiganankitsirira pinkaratagagetanakeri iketyorira pokaigankitsi.’ ⁹ Impo ipokaigapaake pokaigankitsirira panikyara irishonkanakempa poreatsiri. Imirinkaegi ipaigakeri paniro tenario. ¹⁰ Impo ipokaigapaake iketyorira tavageigamanankitsi. Iriroege ineaigiri ariori irogavisaigakeri impunaigakerira, kantankicha ariotyo ikañotagaigakari itovaire ipaigakerira paniro tenario. ¹¹ Iroro ineaigakera tera irogavisaigeri impunaigakerira ogatyo ikenaigake iniashinaiganakari shintarorira itsamaire. ¹² Impo ikantaigakeri: ‘Yogaegiri impogigeiganankitsirira maanisano yantavageigavetaka kantankicha viro pipunaigakerityo kañotaka pipunaigakenara naroegi tsipereagankitsirira nantavageigakera poreatsiriku ovashi maika.’ ¹³ Kantankicha yogari shintarorira ikantakeri paniro tavagetankitsirira: ‘Atsi shonkeratyo. Teratyo namatavitempi. ¿Matsi teratyo nonkantempi inkaara nompakempira paniro tenario? ¹⁴ Piatae manakeri ipakempirira. Narotari kantakeri

impunatakerira impogitanankitsirira yantavage-takera inkañotagakempira viro ipunatakempira.
15 ¿Matsi tera naro shintemparine nogorikite kameti ganiri novetsikageti tatarika nokogake? Impa ariorakari pitsimaventaka pineakera pashinira nokavintaake.

16 “Irorotari nonkantantaigakempirira maika aiñoegi ineaigavetunkanirira maika yavisaigakerira itovaire, kantankicha iriroegikyatyō iravia-saiganaenkani impogini. Iriroegikya ineaigavetunkanirira yavisaigunkanira maika, impogini iriroegikyatyō visantaiganaatsine.”

*Jeso ikamantutaigaarityo aikiro inkamakera
 (Mr 10.32-34; Ir 18.31-34)*

17 Impogini iatanakera Jeso Jerosarenku ike-nanakera avotsiku ikaemaigakeri irogamereegi iriroku ikantaigiri:

18 —Maikari ontì atonkoaganake aiganakera Jerosarenku. Antari anta agonkeigakemparika ontì iragakagantakenkani Kañotasanolakaririra Matsigenka iramanakenkanira inaigakera itinkamiegi saseroroteegi intiegiri aikiro gotagantaigirorira itsirinkakotanakerira Moiseshi. Irroiogi inkantaigake: ‘Kante irogakenkanira.’ **19** Impo iramanakenkani inaigira terira irroiogi jorioegi kameti isamat-sanatakenkanira, aikiro impasapasatakenkanira, impo inkentakotakenkani, kantankicha omavatanakempara kutagiteri iranianaetyo.

*Ogari iriniro Santiago intiri Joan okogave-takara impitaigakera otomiegi inampinaku Jeso
 (Mr 10.35-45)*

20 Impogini okenapaake itsinanetsite Severeo otentaigapaakari otomiegi otigeroaventapaakari Jeso. **21** Irirori ikantiro:

—¿Tatatyo pikogake?

Irorori okanti:

—Impogini pimpegakempara Igooveenkariegite maganiro nokogavetaka povirinitaigakerira yoka notomiegi pinampinaku, paniro pitankitsine pakosanoriraku, yogari irapitene impitake pampateku.

22 Kantankicha Jeso ikanti:

—Viroegi tera pogoigenika yogari pirinitankitsinerira nonampinaku paipotyo iratsipereavageigake aka kipatsiku, nerotyo pikantantaigakenarira maika. ¿Matsi pagaveaigake viroegi pantsipereagakera pinkañoigakenara naro nantsipereakera?

Iriroegi ikantaigiri:

—Jeeje, nagaveaigakeniroro.

23 Ikantaigiri Jeso:

—Pikantasanoigakeniroro pantsipereagakera pinkañoigakenara naro nantsipereakera, kantankicha tera naro kantatsine tyani pitankitsine nonampinaku, intitari kantankitsi Apa pairani okyasanokyara.

24 Impogini yogari itovaireegi irogamereegi ikemaigavakera ikisaigamatannerityo Santiago intiri Joan. **25** Kantankicha Jeso ikaemaigakeri ikantaigiri:

—Pogoigiritari viroegi yogari igoveenkariegite terira iriroegi jorioegi onti ipotetashivageigari itovaireegi. Ario ikañoigaka aikiro itinkamipage yomperaperaigakari. **26** Kantankicha viroegi

gara ario pikanoigiro maika. kogankitsine iravisaigakerira ontityo irimutakovageigakeri. okañotaka tyanirika kogankitsine pairora iravisavageigakeri tsikyatatyō inkogake irirori irimutakovageigakerira kañiomataka irironirikatyo ironampiriaegi. ²⁷ Kañotari Kañotasanotakaririra Matsigenka tera iroro iripokashite irogiakovagetakempara, ontityo ipokashitake irimutakotantavagetakera, aikiro inkamaventaigakerira maganiro kameti irogavisaakoigakenkaniniri.

Jeso ineaikagaigakerira piteni terira ineaigavetempa

(*Mr 10.46-52; Ir 18.35-43*)

²⁹ Impogini Jeso intiegiri irogamereegi iponi-aiganaka Jerikoku iaiganakera Jerosarenku yogaiganakeri tovaini matsigenkaegi. ³⁰ Ario kara ipitaigake onampinapokiku avotsi piteni terira ineaige. Iroro ikemakoigavakerira pokapaake Jeso ikaemavaitaigamatanaaketyo ikantaigiri:

—¡Notinkamii, Iyashikitanakerira Iravi, tsarogakagavagetenakario!

³¹ Ikantanaigavetakarityo itovaire:

—¡Atsi kemisantaigenityo!

Kantankicha iriroegi ariompatyo ikaemasanoiganakeri:

—¡Notinkamii, Iyashikitanakerira Iravi, tsarogakagavagetenakario!

³² Yogari Jeso asatyō yaratinkapaake ikaemaigakeri ikantaigiri:

—¿Tata pikogaigake?

³³ Iriroegi ikantaigiri:

—Notinkami, onti nokogaigake noneaiganaera.

³⁴ Itsarogakagaigamatantanakarityo Jeso itsagaigakeri irokiku. Ogatyo ikenaigake ineaiganai ovashi iaigake yogiaiganakerira.

21

Yogonketanakara Jeso Jerosarenku

(*Mr 11.1-11; Ir 19.28-40; Jn 12.12-19*)

¹ Impogini iaiganake yagonkeigapaaka Vetipajeku otishiku Orivoshi. Ogari Vetipaje onti ochoenitakotakaro Jerosaren. Impo yogari Jeso itigankaigake piteni irogamereeegi ² ikantaigavakeri:

—Piaige anta choeni itimageigira pineaga-paakero kara paniro ashina intiri otyomiani akamotiakyani tsatakoigaka. Pintsaakoiganakeri pamaigakenarira. ³ Aiñorika kantaigakempinerira: ‘¿Matsi tyara pinkantaigakeri?’ viroegi pinkantaigakeri: ‘Inti kogakotakari Atinkami, kantankicha paita irogipigaigaempiri.’

⁴ Ario okañotaka maika otsaganakara ikantakerira kamantantsirira pairani itsirinkanakera ikanti:

⁵ “Kantaigeri timaigatsirira Shionku:
‘Atsi shonke, pokapaake Pigoveenkariiegite.
Irirori inti pairorira ikemisantakovageta.

Onti ishigakotantapaakari akamotiakyani rira ashino, otyomiani kiasevagetatsirira arakintsi.”

⁶ Impo iaigake irogamereeegi itsaakoigapaakero ashina intiri otyomiani ⁷ yamaiganakenerira Jeso. Ipashimititsaigakeneri imanchakiegiku, impo

irirori ipirinitantakari ishigakotantanakarira.
⁸ Yogiaiganakeri tovaini matsigenkaegi. Ikonogagarantaigaka yovetsarankaashiigavakeri imanchaki avotsiku, pashinikya tovishiigavankitsi tsigaroshi ishitavokitashiigavakerira kameti inkenakotanakera. ⁹ Yogari ivaiganankitsirira intiegiri giaigapaakeririra ikaemageigamatityo kara ikantaigi:

—¡Pairo ikametiti yogaa Iyashikitanakerira koveenkari Iravi! ¡Pairo ikavintsaavagetakeri Tasorintsi yoga itigankakerira impegakempara Agoveenkariegit! ¡Pairo ikametiti Tasorintsi timatsirira enoku!

¹⁰ Impogini yogenketapaakara Jerosarenku ogatyo ikenaigake timaigatsirira kara ishigaviovageigapaakatyо ikantaigavakerira giaigapaakeririra:

—¿Tyaniratyo yoga?

¹¹ Iriroegiri ikantaigi:

—Inti Jeso kamantantatsirira poniankichiarira Nasareku Garireaku.

Jeso yoneagaigaarira pimantavageigatsirira ivankoku Tasorintsi

(Mr 11.15-19; Ir 19.45-48; Jn 2.13-22)

¹² Impo Jeso ikianake ivankoku Tasorintsi ineaigapaakeri pimantavageigatsirira intiegiri punaventavageigatsirira. Yoneagaigapaakari maganiro, aikiro itatsinkagetakero imesane yoginoriantaigarira igorikiegite kampiavageigiririra koriki yogishonkagetakero. Imatakero aikiro ipirinitantaigakarira pimantavageigatsirira shiromega. ¹³ Ikantaigiri:

—Okantake Itsirinkakagantakerira Tasorintsi okanti: ‘Ogari novanko onti ashi iripokapini-igera iriniaigakenara’, kantankicha viroegi onti pipegakagaiganakaro ipimantapiniigira matavitaigaitsirira.

¹⁴ Impo ipokashiigakeri terira ineaige intiegiri terira iranuitagantsiige. Irirori ineaikagaigairi terira ineaigavetempa, aikiro yoganuitagantsiigairi terira iranuitagantsiigavetempa.

¹⁵ Yogari itinkamiegi saseroroteegi intiegiri gotagantaigirorira itsirinkakotanakerira Moiseshi ikisaigamatantanakatyō ineaigavakerira yovetsikagetakera terira oneimagetenkani, aikiro ikemaigakerira ananekiegi ikaemavaitaigakera ikantaigakera: “¡Neri yogaa Iyashikitanakerira koveenkari Iravi pairorira ikametiti!”
¹⁶ Impo ishonkateigamatantanakarityo Jeso ikantaigutarityo:

—¿Matsi tera pinkemaigeri yogaegi ananekiegi ikaemavaitaigakera? ¿Tera tyara pinkantumaigeri?

Yogari Jeso ikantaigiri:

—Jeeje, nokemaigakeriniroro, kantankicha ¿matsi tera piniavantumaigero viroegi Itsirinkakagantakerira Tasorintsi niakotakerorira oka? Okantaketari:

‘Yogari Tasorintsi yagaveakagaigakeri ananekiegi intiegiri aikiro aiñokyarira itsomiigi irishineventraigakemparira inkantaigakera: ¡Pairo ikametiti Tasorintsi!’

¹⁷ Impo ovashi iokaiganairi ipiganaa Vetaniaku, ario imaganake kara.

*Jeso ikantakerora igeria ganiri otimumatai oi
(Mr 11.12-14, 20-26)*

¹⁸ Impo okutagiteta manakera ipigaigamanaa Jerosarenku. Yogari Jeso itaseganake. ¹⁹ Impo ineventakotapaakaro igeria onampinapokiku avotsi ovashi iatapanuti inkamosotapanuterora ineiri aityori oi, kantankicha yagavetapaakaro aiñoni mameri, onti gotankicha oshi. Ikantutarotyo:

—¡Maikari maika gara otimumatai pii!

Ogatyo okenake oshigirikanake okamanake.

²⁰ Iroro ineaigakerora irogamereegi yogaiganake kavako ikantaigiri:

—¿Tyara okantakara iroro piniumatakera oga okenake okamanake?

²¹ Yogari Jeso ikantaigiri:

—Arisanotyo nonkantasanoigakempi pogotasanoigakerika arisano yagaveavageti Tasorintsi magatiro, ario pinkante pagaveaigaketyo pinkañoigakenara naro nogishigirikakerora igeria. Kantankicha gara patiro oka. Pinkantaigakerorika oga otishi: ‘Piate okaatempa omaraaniku nia’, oataketyo okaatakempara. Kantankicha gara piniasurentavagetumaigaa maani pinkantaigakera: ‘Ariorikaty iragaveake Tasorintsi.’ ²² Tatarika oita pineviigakeri Tasorintsi piniaigerira pogotasanoigakerika arisano iragaveake impaigakempirora impaigakempirotyo.

*Ikogakotagantunkanira Jeso tyani tigankakeri
(Mr 11.27-33; Ir 20.1-8)*

²³ Impo yogonketapaakara Jeso ikiakte ivankoku Tasorintsi yogotagaigapaakerira. Osamanitanakera ipokashiigapaakeri

itinkamiegi saseroroteegi intiegiri itinkamiegi jorioegi ikantaigiri:

—¿Tyaní kantakempira pinkañotakerora maika poneagaigaemparira pimantavageigatsirira? ¿Tyanímpatyora tigankakempira?

²⁴Yogari Jeso ikantaigiri:

—Maikari maika narokya kogakotagan-taigakempine, pinkamantaigakenarika viroegi ario nonkañotakempa naro nonkamantaigakempi tyani tigankakena. ²⁵¿Tyaní kantakeri Joan irogiviatantavagetakera? Maika viroegi kantaigena tyani kantakeri. ¿Irirorika kantakeri Tasorintsi intirika kantaigakeri matsigenkaegi?

Iroro ikemaigavakera iniavakagaiga-matanakatyo ikantavakagaiganakara: “¿Tyaníkatiyo ankantaigeri? Ankantaigavetempari inti kantakeri Tasorintsi, irorori inkantaigakae-tyo: ‘Iroroventi ¿tyara okantakara tera pinkem-saigeri?’” ²⁶Ariokya ankantaigavetempari inti kantaigakeri matsigenkaegi, inkisaigakaetyo atovaireegi, maganirotari ikantaigake inti kantakeri Tasorintsi inkamantantavagetakera.”

²⁷Nerotyo ikantantaigakaririra:

—Nirorotyo, tyanirorokari kantakeri.

Impo irirori ikantaigiri:

—Iroroventi ariotyo nonkañotakempa naro, garatyo nokamantaigimpi tyani tigankakena.

Jeso ikantakoigakerira terira inkogaige inke-matsaigakerira

²⁸Impogini Jeso ikantaigiri:

—¿Tyaníkika pinkantaige nonkantaigakempira maika? Itimi pairani matsigenka aiño piteni

itomi. Impogini ikantakeri itsitiki: ‘Notomi, piatakera pagavagetakera ova.’²⁹ Irirori ikanti: ‘Garatyo noati’, kantankicha impogini isuretanaka iatake yagavagetakera.³⁰ Impogini iatashitakeri irapitene itomi, ario ikañotagakari irirori yomperatakarira. Iriro pinkante ikantake: ‘Je’ee nonkañotakeniroro’, kantankicha tera iriate.³¹ Maikari kantaigena, ¿tyani kematsatasanotakeri iriri?

Iriroegi ikantaigi:

—Inti itsitiki.

Impo Jeso ikantaigiri:

—Arisanotyo nonkantasanoigakempi ogae giri tsinaneegi pogereantaigatsirira intiegiri kogantaigaririra itovaireegi koriki irashi koveenkari ataketyo yogoiganake tyara inkantaigakempsa kameti impegakempsa Tasorintsi Igoveenkariegit, kantankicha viroegi tekyatyo pogotumaige.³² Pine ipokashiigavetakempitari Joan Giviatantatsirira yogotagaigavetakempsa tyara pinkantaigakempsa pinegintevageigakempsa, kantankicha viroegi tera pinkematsaigeri. Ogaegiri pogereantaigatsirira intiegiri kogantantaigacharira koriki irashi koveenkari iriroegi pinkante ikematsaigakeri. Viroegiri pineaigavetakarityo kantankicha teratyo pinkogaige pinkantatigaigakempsa pampakuuaigakerora povetsikageigira terira onkametite pinkematsaigakerira.

*Jeso ikantakoigakerira itinkamiegi saseroro-teegi intiegiri pariseoegi
(Mr 12.1-12; Ir 20.9-19)*

³³ “Maika nokogake pinkemisantaigakenara nonkantakotaera pashini. Itimake paniro matsigenka yashintaka igipatsite. Impogini ipankishiatake ova itantakotakero. Impo yovetsikashitakero agaatantakenkanirira oani. Imatakero aikiro impirinitantakemparira enoku sentakeronerira kameti ineventakotasano-takemparoniri ganiri okoshitagani. Impo ikaemaigake pashini intsamaitakoigakenerira. Antari ontimanakerika impagarantaigaeri irirori. Impo iavagetake samani.

³⁴ “Impogini aganaara irakantarira ova itigankaigavetakari iromperaneegi ineviigaaterimera impagarantaigaerira irirori, ³⁵ kantankicha yogari tsamaitakoigakerorira onti ikisaigavakeri. Paniro onti ipasapasaigavakeri, yogari irapitene onti yogaigavakeri. Yogari yomavatakarira onti ipitankasenaigavakeri mapuku. ³⁶ Impogini yogari shintarorira ova itigankaigavetaa pashini tovaini iromperaneegi yavisaigakeri iketyorira itigankaigavetaka, kantankicha yogari tavageigatsirira ario ikañotagaigaari iriroegi.

³⁷ “Impogini ikantake: ‘Impa irirorakari nontigankake notomi, iriro pinkante impinkatsaigakerityo’, ovashi itigankakeri. ³⁸ Kantankicha iriroegi irorotyo ineaigavakerira ikenapaakera iniavakagaigamatantanakatyō ikantaiganakera: ‘Neri yonta shintakemparonerira magatiro impogini inkamanaera iriri. Tsamekario agaigakerira kameti aroeginiri shintasanoigakemparone.’ ³⁹ Impo iroro ygonketapaakara yagaigamatantanakerityo ya-

maiganakerira antakona aikyara otantakotakara ova ario kara yogaigakeri.

⁴⁰ “Antari impigaera shintasanotarorira ova ¿tyarika inkantaigakeri yogaegi tavageigatsirira? ¿Tyara pinkantaige viroegi?”

⁴¹ Irroiogei ikantaigiri:

—Irogaigakerityo impogereraigakerira maganiro, gara itsarogakagumaigari. Impogini inkaemaigake pashini impugakagaigaerira. Impo ontimanaerika ova irroiogiri pinkante impagarantaigaeri.

⁴² Ikantaigiri Jeso:

—¿Matsi tera pinavantaigero Itsirinkakagan-takerira Tasorintsi? Ariotari okantakeri maika: ‘Ogari mapu terira irishineventaitgavetemparo vetsikaigakerorira pankotsi

onti opegakagunkani okusotantakarira.

Irirotari kañotagakero maika Atinkami,

impo aneaigakerora aroegi ashinevageigaka.’

⁴³ Irorotari nokantantaigakemperira ganige pineaigai impegaempara Tasorintsi Pigoveenkariegite, pashinikya inkaemaigake kematsatasanoigakerineririra, irroiogiri pinkante pegaigakerine Igoveenkariegite. ⁴⁴ Nantitari mapu okusotantakarira pankotsi. Tyanirika kantankitsine tera iriro tigankenane Tasorintsi tyampatyo inkantakempa irogavisaako-takenkanira. Inkantakanirika inkañotake maika nonkisashitasanotakempari impogini inkisashiigakemparira Tasorintsi maganiro terira inkematsaigeri garatyo yogavisaakotumatagani.

⁴⁵ Iroro ikemaigavakerira itinkamiegi saseroroteegi intiegiri pariseoegi yogoigake

inti ikantakoigake, ⁴⁶ ovashi ikisaiganaka ikogaigavetakara iragakagantaigakerimera, kantankicha ipinkaigairi itovaireegi, iriroegi ineraigakeritari Jeso inti kamantantatsirira.

22

*Jeso ikantakotakerora ikaemaigirira Tasorintsi matsigenkaegi intimimoigakerira impogini
(Ir 14.15-24)*

¹ Impogini Jeso yogotagaiganairi aikiro ikantakogetakerora posante ikanti:

² “Maikari maika nonkamantaigakempi tyara ikanta Tasorintsi ikaemaigirira matsigenkaegi intimimoigakerira impogini irapatoitaigakerira maganiro kematsaigiririra impegakempara Igoveenkariegit. Onti ikañotakari koveenkari yonkotagantake posantepage sekatsi inkaemaigakerira itovaireegi isekatagaigakemparira intentaigakemparira itomi iragakera itsinanetsite. ³ Impo itigankaigakeri iromperaneegi inkantaigariterira pokaigankitsinerira, kantankicha iriroegi tera inkogaige iripokaigera. ⁴ Impo itigankutaatyō pashini ikantaigavakeri: ‘Maika pinkantaigariterira nokaemaigakerira mataka posatake sekatsi. Novetisakagantakeri novakane intiri ityomiani keitavagetankitsirira. Maika mataka vetsikagetaka magatiro. Kantaigariteri iripokaigakera shintsi isekatakoigakitenara.’

⁵ Kantankicha yogari ikaemaigakerira teratyo inkogaige iriaigera. Paniro iatai itsamaireku, pashinikya iatai impimantavagetaera iaraki. ⁶ Impo yogari itovaire yagaigavakeri

iromperaneegi koveenkari ipasapasaigavakeri yogaigavakeri. ⁷ Iki samatanakatyō koveenkari itigankaigakeri isoraroegite irogaigakiterira gantaigankitsirira ovashi impoigutero ivankoegi irorori. ⁸ Impogini ikantaigiri iromperaneegi: ‘Mataka vetsikagevetaka magatiro kameti iragakeniri notomi itsinanetsite, kantankicha iriroegi nokaemaigavetakarira tera inkametiige, teranika inkogaige iripokaigera, onti ipugatsaigakena. ⁹ Maikari maika ariokya piaigake avotsipageku pinkaemaiguterira maganiro tyanirika pineaigake.’ ¹⁰ Ovashi iaigake yapatoitaigakeri kametiigatsirira intiegiri terira inkametiige. Iriroegi ipokaigake ikiaigapaake ishatekaitaiganaka pankotsiku.

¹¹ “Impogini ikiapaake koveenkari inkamosoiguterira ikaemaigakerira. Ishonkavetanaka ineitarityo paniro terira irogagutempa kitsagarintsi kañorira yogaguigakarira itovaireegi ipaigunkanirira kameti intentaigakempariniri ikyuenkarira ganktsine itsinanetsite. ¹² Ikantiri: ‘¿Tyara pikantaka viro pikiakera kogapage tera pogagutempa kitsagarintsi pinkañoigakemparira pitovaireegi?’ Kantankicha irirori ikemisan-taketyo. ¹³ Impo ishonkashiigari iromperaneegi ikantaigiri: ‘Gusoigeri itasagiiku ontiri irakoku maiganakeri okaigakiteri sotsi pavatsaariku intentaigakemparira kaemavaitaigatsirira tsikagisevageigatsirira irai.’ ¹⁴ Itovaigavetakatyō ikaemaigunkanirira intimimoigakerira Tasorintsi impogini, kantankicha teratyō intovaige ikogakagaigunkanirira iriaigakera.”

*Ikogakotagantunkanira Jeso kametitakerikara
impakenkanira Sesa koriki
(Mr 12.13-17; Ir 20.20-26)*

15 Impogini yogari pariseoegi iaigake ikemavakagaigakara iripokashiigakerira Jeso inkogakotagantaigakiterira ineaigakera tyarika inkante, ikogaigaketari inkemaigakerira inkantakera tatarika oita terira onkatinkatero ikantaigirira iriroegi kameti intsavetantaigakeriniri inkisakagantaigakerira.
16 Impogini iriroegi itigankagarantaigakeri irogamereegi intiegiri tentaigaririra Erorishi iriaigakera inkogakotagantaigakiterira. Impo yagonkeigapaakara ikantaigiri:

—Gotagantatsirira, nogoigake viro tera pamatagumatempa. Antari pogotagantavagetira katinka pogakero pikamantaigakerira maganiro tyara inkantaigakempa inkematsasanoigakerira Tasorintsi. Tera tyani pagamaempa, aikiro tera pimpinkumateri matsigenka, pineaigakeritari maganiro ario ikañovakagaigaka. Viro pogotirotari ikantirira koveenkari Sesa ikantira: ‘Maganirosanotyo jorioegi impaigakena koriki.’ **17** Maika ¿tyara pinkante viro? ¿Kametitake nompaigakerira ontirika tera onkametite? ¿Ario nompaigakeri ontirika gara nopaigiri?

18 Kantankicha Jeso yogotavaketyo tera kametikya inkantaigeri onti ishinetamampegaigakari kogapage, nerotyo ikantaigutarityo:

—Viroegi ontityo pishinetamampegaigakena kogapage. ¿Tyara okantakara pikañovintaigakenara maika? **19** Atsi

maigakenanityo pamentaniro koriki ipaganirira
Sesa noneakerira.

Iriroegi yamaigakeneri, ²⁰ impo yagatakera in-eagetakerira ikantaigiri:

—¿Tyani yoka itsirinkakotunkanirira? ¿Tyani shintaro ivairo?

²¹ Ikantaigiri:

—Inti koveenkari Sesa.

Ikantaigutarityo:

—Iroroventi intitari tsirinkakotankicha Sesa paigerityo irirori kameti pintsatagaigakeroniri magatiro ikantagetakerira, kantankicha ariotyo pinkañotagaigakempari Tasorintsi aikiro pinkematsatasanoigakerira pintsatagaigakerora magatiro ikantagetakerira.

²² Ikemaigavakerira ikantaigakerira maika oga ikenaigake yogavageiganake kavako ovashi iaiganai.

Ikogakotagantunkanira Jeso anianaenkanira impogini

(Mr 12.18-27; Ir 20.27-40)

²³ Impo choeni osamanitanake iriroky aiganankitsi saroseoegi inkamosoiguterira Jeso. Iriroegi inti kantaigatsirira gara yaniaiganai igamaga. Ikantaigapaakeri:

²⁴ —Gotagantatsirira, yogari Moiseshi itsirinkanake pairani ikanti: ‘Intimakerika matsigenka terira intomintempa impo inkamanakerika iokanakero itsinanetsite, aiñorika irirenti iriroky gaerone intomintagaemparoniri kañomataka irironirikatyo tomintari kamankitsirira.’ ²⁵ Maika nokogaigavetaka nonkantaigakempira. Pairani itimake paniro

notovaire itomintaka 7. Yogari itsitiki yagavetaka tsinane, kantankicha niganki ikamanake tera intomintaganakemparo. Impo iriroky a gavetaaro irapitene giatiririra. ²⁶ Ario ikañotaka irirori ikamanake tera intomintaganakemparo. Ario ikañovetaka irapitene nigankinirira. Ariompa ipogereanakari maganiro yagaigavetakarora tera intomintagaiganakemparo. ²⁷ Impo okamamatityo irorori. ²⁸ Maika atsi kantaigena, antari impogini iraniaiganaerika maganiro igamaga, ¿tyanirikatyo gasanotaerone?, maganirotari yagaigavetakaro.

²⁹ Irirori ikantaigiri:

—Viroegi onti pikomuigakaro, teranika pogoiger tyara okanti Itsirinkakagantakerira Tasorintsi, aikiro tera pogoige tyara ikanta yagaveavagetira irirori. ³⁰ Impogini iraniaiganaerika maganiro igamaga gatanika tyani gumataatsi tsinane, aikiro tsinane garatyopimantumataagani iragaigakerora surari, ontitari inkañoiganakempari isaankariite Tasorintsi timaigatsirira enoku. ³¹ Maika viroegi onti pikantaigake gara yaniaiganai igamagapage. ¿Matsi tera piniavantaigero ikantakerira Tasorintsi pairani?, ikantaketari: ³² ‘Nanti Tasorintsisanorira Itinkami Averan, Isaako intiri aikiro Jakovo.’* ³³ Matsi iriro Tasorintsi Itinkami igamaga? Teratyo iriro, intitari Itinkami niaigankitsirira.

³³ Iroro ikemaigavakerira maganiro ikantaigakerira maika yogavageiganaketyo kavako.

* ^{22:32} Ek 3.6

*Tyati pairo avisake ontsatagasanotakenkanira
(Mr 12.28-34)*

³⁴ Impogini yogari pariseoegi ikemakoigakerira Jeso yוגemisantaigakerira saroseoegi iatashiigakeri iriroegi aikiro ³⁵ itentaiganakarira paniro gotagantirorira itsirinkakotanakerira Moiseshi inkogakotagantapaakerira ineaigakerira tyarikara inkante kameti ontimakeniri onkenantakemparira inkisakagantaigakerira. Impo ikantiri:

³⁶ —Gotagantatsirira, pogotitari itsirinkakotanakero Moiseshi pairani magatiro ikantagetirira Tasorintsi. Maika nokogavetaka pinkamantaigakenara tyati pairo avisake okametitakera ontsatagasanotakenkanira.

³⁷ Yogari Jeso ikantiri:

—‘Pintasanovagagetanakemparityo Pitinkami Tasorintsi pisuretasanotanakemparira, aikiro pimpanirotasanotanakerira irirori.’*

³⁸ Pairo avisake okametitakera ontsatagasanotakenkanira oka, avisagetakero magatiro ikantagetakerira Tasorintsi. ³⁹ Ogari apitene onti kantatsirira: ‘Pintsarogakagavagagetakemparira pitovaire pinkañotagasanotakempatyo pitsarogakagara vikiiro.’* ⁴⁰ Yogari tsatagasanotakeronerira oka mataka itsatagagagetakero magatiro itsirinkakogetanakerira Moiseshi, ontiri aikiro magatiro yogotagantaigirira kamantantaigatsirira.

*Tyaniyashikitanneri Kirishito
(Mr 12.35-37; Ir 20.41-44)*

* ^{22:37} Ireo 6.5 * ^{22:39} Ire 19.18

41 Aiñokyara inaigake pariseoegi **42** yogari Jeso ikantaigiri:

—¿Tyara pikantaigi viroegi? ¿Tyani yashikitanakeri Ikogakagakerira Tasorintsi impegakempara Pigoveenkariegit?

Iriroegi ikantaigiri:

—Inti yashikitanakeri Iravi.

43 Yogari Jeso ikantaigiri:

—Iroroventi ¿tyara okantakara pairani iniakagakerira Isure Tasorintsi Iravi ipegakerira Itinkami?, ikantaketari maika:

44 ‘Yogari Tasorintsi ikantakeri Notinkami:

Pirinite nonampinaku nakosanoriraku pinten-takenara kigonkero nagaveaigakerira maganiro kisashi-igakempirira.’

45 Irorotari ikantakerira: ‘Notinkami’, ¿tyara inkantakempara iyashikitakerira?

46 Impogini tera intumamate paniro gaveankitsinerira irogipigakenerira nerotyo ovashi teratyo tyani kogakotumataerine.

23

Ikantakeria Jeso gara yogiatakoigagani pariseoegi intiegiri gotagantaigirorira itsirinkakotanakerira Moiseshi

(Mr 12.38-40; Ir 11.37-54; 20.45-47)

¹ Impogini Jeso iniaigakeri patoitaigankicharira intiegiri irogamereegi ikantaigiri: ² “Yogari gotagantaigirorira itsirinkakotanakerira Moiseshi intiegiri pariseoegi ineaigake paniro iriroegi yagaveaigiro yogotagan-taigirora itsirinkakotanakerira Moiseshi.

³ Nonkantaigakempi nanityo kematsaigerityo pintsatagaigakerora magatiro yogotagaigakempirira, kantankicha gara pikāñoiigari iriroegi. Ontitari yogotagantaigavetakaro kogapage, kantankicha tera intsatagasanoigero. ⁴ Onti yovashigakovageigakari matsigenkaegi yogotagaigakerira posante ikantaigakeri intsatagaigakerorika magatiro ario pinkante irishineventtaigakempari Tasorintsi, kantankicha iriroegi tera intsatagumaigero. ⁵ Ontityo ineakagantavintaigakara, nerotyo antari yamatsaitakoigarora itsirinkakotanakerira Moiseshi yovashigageigamatatarotyo yamatsaitakotantaigakarorira ariosarantapagerikatyokara. Ario ikañotagaigakaro aikiro yomaretakoigarora irakoegiku.* Antari iniaigirira Tasorintsi onti yogaguigaka imanchaki timankitsirira oshiroki ogatsantsapageni.

⁶ Antari ikaemaigaganira isekataigakempara tyarika kara yapatovageigara onti ikogaigi iroviriniigakenkanira intentagantaigakenkanira kaemantankitsirira. Ario okañotaka aikiro iaigira pankotsiku yapatotantaigarira ikogaigi iroviriniigakenkanira ipiriniigira tinkamiigatsirira. ⁷ Aikiro iaigira opimantagetaganira arakintsipage ontiri ogagetaganirira ikogaigake iriniaigavakenkanira inkañotagaigakenkanira iniaganira itinkamipage ontiri aikiro inkantaigakenkanira gotagantaigatsirira.

⁸ “Kantankicha viroegi gara pikogaigi inkantaitakempira gotagantatsirira, aiñotari paniro Gotagaigimpirira, narotari. Maganiro

* **23:5** Ireo 6.6-9

viroegi ario pikānovakagaigaka. ⁹ Akari aka kipatsiku gara itiumaigi pikantaigirira: ‘Apa’, aiñotari paniro Piri timatsirira enoku. ¹⁰ Aikiro gara pikogumaigi impegaitakempira itinkamiegi, aiñotari paniro Pitinkami, narotari. ¹¹ Yogari visavageigakeririra itovaireegi inti yoga tyanirika mutakotantavagetsirira tsikyatatyō irirori ikañotagaka nampirantsi. ¹² Imirinkatari ventakovagetacharira impotetashivagetakempari Tasorintsi irogipashiventavagetakerira. Iriroky terira iraventakotempa irishineventakempari inkavintsaavagetakerira.

¹³ “¡Maikaniroro pantsipereavageigake viroegi gotagantaigirorira itsirinkakotanakerira Moiseshi vintiegiri pariseoegi kametitamampegaigacharira! Tera pinkogaigenika pinkematsaigakerira Tasorintsi kameti pintimimoigakeriniri impogini irapatoitaigakerira maganiro kematsaigiririra impegakempara Igoveenkariegit, aikiro antari pogotagaigakerira kogaigavetankicharira inkematsaiganakerira ontityo povashigakovageigakari pikantaigakerira intsatagageigakerora posante nerotyo tyampa inkantaigakempa inkematsaigakera iriroegi aikiro. ¹⁴ ¡Maikaniroro pantsipereavageigake viroegi gotagantaigirorira itsirinkakotanakerira Moiseshi intiegiri pariseoegi kametitamampegaigacharira! Ontitari pamatavinaigakero ogamakotagapage pitsonkatapitsageiganakerora ashintageigarira. Aikiro pineakagantaigakara akaenkinityo piniaiganakeri Tasorintsi teratyo aiñokya pagataige. Nokantantaigakempirira viroegi pairo pavisaigake inkisashivageigakempira

impogini.

15 “¡Maikaniroro pantsipereavageigake viroegi gotagantaigirorira itsirinkakotanakerira Moiseshi intiegiri pariseoegi kametitamampegaigacharira! Viroegi papagiteavageiganakaro kipatsi ontiri omaraani nia pinkematsatagaigakerira paniro matsigenka inkañoiganakempira viroegi. Antari ikematsaigakempira paioptyo yogagavagetanaka ikañoovagetakara yavisavageiganakemptyo viroegi. Irorotari iriatantakemparira morekariku intagakempara.

16 “¡Maikaniroro pantsipereavageigake viroegi, pogotagantaigavetakatari kantankicha teratyo pogotumaige! Onti pikantaigake: ‘Tatarika oita pinkantaigake irororika piniakoigake ivanko Tasorintsi pinkantaigakera: Nontsoegakemparika okyarikatyo tuanankitsi ivanko Tasorintsi, impo garika pitsatagiro pikantakerira kametitaketyo. Kantankicha irirorika piniakoigake kori nankitsirira ivankoku Tasorintsi ario pinkante pintsatagakeronirotyo. Garatyo pikantatigumatiro.’ **17** ¡Teratyo pogotumaige viroegi! ¿Matsi tyatimpatyora paipo avisake okoveenkatakera, irororikara ivanko Tasorintsi intirika kori nantakarorira? Gamera iroro ivanko gametyo ikametiti kori. **18** Impo pikantaigake aikiro: ‘Tatarika oita pinkantaigake irororika piniakoigake itagantanirira piratsipage yamaganirira Tasorintsi pinkantaigakera: Nontsoegakemparika asatyo ompegakempa, impo garika pitsatagiro pikantakerira kametitaketyo. Kantankicha irirorika piniakoigake piratsi

vanketankicharira itagantaganiriraku, ario pinkante pintsatagakeronirorotyo. Garatyo pikantatigumatiro.’ ¹⁹ ¡Teratyo pogotumaige! ¿Matsi tyatimpatyora visankitsi ikoveenkatakera, irirorikara piratsi ontirika itagantaganirira? Gamera iroro itagantaganirira gametyo ikametiti irirori. ²⁰ Yogari niakotirorira itagantaganirira piratsi yamaganirira Tasorintsi teranika patiro iriniakote irorori, iniakotakerityo aikiro piratsi vanketankicharira. ²¹ Ario ikañotaka yoga niakotirorira ivanko Tasorintsi teratyo intagati iroro iriniakote ivanko, iniakotakerityo irirori aikiro Tasorintsi shintarorira. ²² Ario okañotaka aikiro tyanirika niakotiro inkite intityo iniakotake Tasorintsi Igoveenkariegite maganiro, irirotari shintaro.

²³ “¡Maikaniroro pantsipereavageigake viroegi gotagantaigirorira itsirinkakotanakerira Moiseshi vintiegiri pariseoegi kametitamampegaigacharira! Tatarika oita pashintumaiga ontirika mentashi, anishi ontirika komino pipagarantaigiri* Tasorintsi, kantankicha pimagisantavageigakero pairorira avisake yogotagaigakempirira ikantakera pintsatagageigakerora magatiro ikantagetirira, aikiro pintsarogakagaigakemparira pitovaire negintekyara pogaiigakeri. Kametitaketyo pipagarantaigakerira Tasorintsi pashintageigarira, kantankicha gametyo pimagisantaigiro otovaire ikantaigakempirira.

* **23:23** Pipagarantaigiri: irinianeku virakocha onti okantake “ustedes separan para Dios la décima parte” (onti onkantakera 1/10).

24 ¡Pogotagantaigavetakaro Iriniane Tasorintsi, kantankicha teratyo pogotumaigero viroegi! Onti pogotagantavintaigake intsatagaigakerora tesakonarira inkogero Tasorintsi, irorokya ikogasanotirira tera pogotagantaigero.

25 “¡Maikaniroro pantsipereavageigake viroegi gotagantaigirorira itsirinkakotanakerira Moiseshi intiegiri pariseoegi kametitamampegaigacharira! Pikogaigaketari ineaigakempira maganiro arisano pikematsatasanoigakeri Tasorintsi, kantankicha intagati pipiriniventavageigi pamatavinaigakerira matsigenkaegi pagutageigakerira yashintageigarira. Kañomataka intagatira okivagani pamoko ontiri perato otishitaku antari oteniku pairatamatatake potsitasematake. **26** ¡Viroegi pariseoegi teratyo pogotumaige! Atsi negintetasanoigempanityo pisureku kameti ineaasanoitakempiniri negintetasanoigamatatakavi.

27 “¡Maikaniroro pantsipereavageigake viroegi gotagantaigirorira itsirinkakotanakerira Moiseshi vintiegiri pariseoegi kametitamampegaigacharira! Ontitari pikañoiigakaro ikitatantanagririra igamaga. Onti otiritantunkani kutari kameti oneakenkaniniri onkametivagete, kantankicha antari tsompogi pairatamatatake inti shatekankicha itonki kamatsirini yovesegakara. **28** Ariotari pikañoiigakari viroegi onti pikametitamampegaigaka kogapage pineakagantaigakara kameti ineaigakempiniri matsigenkaegi, kantankicha antari pisureku tera pinegintevageigempa onti pisuregisevageigaka terira onkametite.

²⁹ “¡Maikaniroro pantsipereavageigake viroegi gotagantaigirorira itsirinkakotanakerira Moiseshi intiegiri pariseoegi kametitamampegaigacharira! Ontitari povetsikashiigakeneri isuretakotantaigaenkanirira kamantantaigatsirira kamaigankitsirira pairani, aikiro pineginteigakeneri ikitatantaigarira negintetasanoigacharira kameti isuretakoigaenkaniniri.

³⁰ Impogini pikantaigi: ‘Ariome nontimaigeme pairani itimaigira yashikiiganakenarira gametyo notentaigari yogaigakerira kamantantaigatsirira.’ ³¹ Antari pikañoigakerora maika vikiirotyo kañotagantaigankicha, pikantaigaketari vintiegi iyashikiiganakerira gaigakeririra.

³² ¡Maikari maika atanatsira pinkañoigakempari yashikiiganakempirira pairani!

³³ “¡Vintiegi vetsikageigirorira posantepage terira onkametite! Maikari maika ¿tyanimpatyo gavisaakoigakempine ganiri pitagaiga morekariku? ³⁴ Irorotari nontigankimotantaigakempirira kamantantaigatsirira pairorira yogovageigi intiegiri gotagantaigatsirira, kantankicha impogini pogagarantaigavakeri pinkentakotagarantaigavakerira, pashinikya pimpasapasaigavakeri pankotsiku papatoitantapiniigarira, pinkisashivageiganakemparityo pimpatimavageiganakeri itimageigira. ³⁵ Viroegitari kañotagantaigakeri yogantaigunkanirira kematsaigiririra Tasorintsi pairani, iketyo yogiivatunkani Averi terira inkañovagetempa* ikarataganunkani Sakariashi itomi Verekiashi.

* ^{23:35} Jen 4.3-8

Yogari Sakariashi onti yogunkani anta ivankoku Tasorintsi inavetakara aikyara itagantanaganirira piratsipage. ³⁶ Arisanotyo nonkantasanoigakempi maikaniroro inkisashigempi Tasorintsi, vintiegitari gakagantaigakeri.

*Jeso iragatsikaigakarira Jerosarenkunirira
(Ir 13.34-35)*

³⁷ “¡Jerosarenkunirira, Jerosarenkunirira, pogaigirira kamantantaigatsirira,* aikiro pipitankaigirira itigankimoigakempirira Tasorintsi inkenkitsatimoigakempirora Iriniane! Pineagiro atava osavogaigirira otyomiani, nokoganagevetakatyō naro nonkañotagaigakempimera maganiro viroegi nampatoitaigakempimera pinkematsaigakenara, kantankicha viroegi teratyo pinkogumaige. ³⁸ Maikari maika ganigetyo inimoigaimpi Tasorintsi panivani pampuntavageigaempa. ³⁹ Nonkantaigakempi maika gara pineaigaana kigonero aganakempara pinkantaigavakenara: ‘¡Pairo ikametiti yoga itigankakerira Tasorintsi impegakempara Agoveenkariegite!’ ”

24

*Jeso ikantakera ogashiriakenkani ivanko
Tasorintsi
(Mr 13.1-2; Ir 21.5-6)*

¹ Iroro ikontetanaira Jeso ivankoku Tasorintsi iriatanaera parikoti yaiñoniiganakari irogamereegi ikantaigakerira:

* **23:37** 1 Kov 19.10

—Gotagantatsirira, atsi geroratyō kavako oga ivanko Tasorintsi.

² Kantankicha yogari Jeso ikantaigiri:

—¿Pineaigakero magatiro oka? Arisano nonkantaigakempi impogini gara otimumatai patiro mapu vikotaachanerira, magatirosanotyo ogashiriagetakenkani.

*Tyara onkantanakempa impogini
ontsonkatanaempara kipatsi*

(*Mr 13.3-23; Ir 21.7-24; 17.22-24*)

³ Impogini itonkoaganake iaiganakera otishiku Orivoshi, ario ipirinitake Jeso kara. Impo yogari irogamereegi yaiñoniigapaakari ikantaigapaakeri:

—Nokogaigake pinkamantaigakenara tyatirikara agantakempa ontsonkatanta-naemparira inkaaratirira pikantakerira ogashiriagetakenkanira. ¿Tyatirikara nogontaigavakempa pimpigantaemparira impogini ontsonkagetanaempara magatiro kipatsi?

⁴ Yogari Jeso ikantaigiri:

—Tsikyanira yamatavinaitimpikari,
⁵ iripokaigaketari tovaini matsigenkaegi kantaigankitsinerira: ‘Nanti Ikogakagakerira Tasorintsi impegakempara Pigoveenkarie-gite’, impo inkematsaigakeri tovaini.

⁶ Impogini pinkemakoigavakeri pashini iromanatavakagaigakempara aiñoni, ontiri aikiro pashinipageku kipatsi, kantankicha viroegi gara pitsarogaigi. Arionirorotyo onkañotanakempari maika, kantankicha gatata aga ontsonkagetanaempara magatiro kipatsi.

⁷ Yogari timageigatsirira pashinipageku kipatsi

iriatashiigakeri timageigatsirira parikoti-pageku iromanatavakagaigakempara. Ario inkañoigake koveenkariegi intimagarantaigake intigankaigakeri isoraroegite iriatashiigakerira pashini koveenkari iromanatavakagaigakempara irogavakagaigakempara. Aikiro ontimaenkagetanake tasegagantsi, ontiri aikiro ontininkagematanakempatyo kipatsi.
8 Onkañogetanakemparika maika iroro ontsititantanakempa antsipereavagetanakenkanira.

9 “Impogini iragaiganakempi iramaiganakempira inkisakagantaigakempira irogakagantaigakempira. Maganirosanotyo inkisaviiganakempiro pikematsaigakenara.

10 Inkonogagarantaigakempsa kematsaigavetanarira irapakuaignakena ganige ikematsaigaana, onti inkisashivakagaiganakempsa, aikiro intsoeventavaka-

gaiganakempsa iragakagantavakagaiganakempara. **11** Inkoneagematanaketyo aikiro matavitantaigatsirira inkantaiganakera: ‘Onti nokenkitsatakoigi Iriniane Tasorintsi’, kantankicha iriroegi onti iramatavinaigakerira tovaini kematsaiganarira irapakuakageiganakerira ganige ikematsaigaana.

12 Omposantegisevagetanakempatyo kara terira onkametite, ganige itavakagaigaa matsigenkaegi.

13 Kantankicha yogari atanatsirira inkematsatasanotanakena iriro pinkante irogavisaakotakenkani.

14 Inkenkitsatimovageiganakenkanityo kara maganiro matsigenkaegi inkaman-taigakenkanira tyara inkantaigakempsa

kameti irogavisaakoigakeriniri Tasorintsi impegakempara Igoveenkariegite. Ario onkañotakempa maika kameti irogoigakeniri maganiro. Impogini ario ontsonkagetanaempa magatiro.

15-16 “Yogari kamantantsirsira Iraniere pairani itsirinkakotanakerira samatsanatakeronerira ivanko Tasorintsi impogini. Maika viroegi pineaigakeririka ario irinake anta pinkati-maiganakempara pishigaiganakera otishipageku. Ario inkañoigakempa aikiro maganiro timaigatsirsira Joreaku irishigaiganake. (Tyanirika niavantakotakerone oka isuretakotakemparo kameti inkemavakeroniri.) **17** Tyanirika pitankitsine otishitapankoku ivanko irishigapanute garatyō ikiapanaaati iragagetapanutera tatapagerika oita. **18** Tyanirika pitankitsine itsamaireku garatyō iatapanaati ivankoku iragapanaatera apitene imanchaki. **19** ¡Maikaniroro antsipereavageige tsinaneegi kamonkiigankitsinerira ontiri tsomitagaigankitsinerira, paerotari avisagake antsipereasanovageigakera oshigaiganakera! **20** Viroegi niaventaigempatyo ganiri okatinkatiro pishigaiganakera katsinkagiteriku ontiri aikiro kutagiteriku apishigopireantaganirira, **21** paerotari antsipereavagetenkani avisavagetakerotyo magatiro atsipereagetunkanirira okyasanokyara yovetsikagetake Tasorintsi kipatsi ovashi maika. Aikiro gara oneimataagani impogini. **22** Kantankicha gasakona otovaigavageti kutagiteri iratsipereavageigakera ganiri ipogereaiiga maganiro. Isuretakoigakemparitari Tasorintsi maganiro ikogakagaigakerira pairani

okyasanokyara inkematsaigakerira.

²³ “Impogini tyanirika kantaigakempine: ‘Neri yoka Ikogakagakerira Tasorintsi impegakempara Agoveenkariegite’, garatyo pikematsaigiri. Ario onkañotakempa inkantaigakempirika: ‘Aiño inake anta’, garatyo pikematsaigiri. ²⁴ Iripokaigaketari kamantantaigatsirira matagavageigankicharira intiegiri aikiro pashini kantaigankitsinerira: ‘Nanti Ikogakagakerira Tasorintsi impe-gakempara Pigoveenkariegite.’ Aikiro irovetsikageigamate terira oneimagetenkani kameti iramatavinaiganakeriniri tovaini. Irimaigavetanakemparityo kematsaigiririra Tasorintsi, kantankicha garatyo yagaveimaigiri. ²⁵ Nokamantaigakempi magatiro maika tekyara agempa kameti pogoigakeniri ganiri yamatavitumaigimpi impogini. ²⁶ Inkantaigakempirika: ‘Neri yonta nankitsirira osarigagiteta paakera’, gara piaigi pinkamosoiguterira. Aikiro inkantaigakempirika: ‘Aiño kara tsompogi’, gara pikematsaigiri. ²⁷ Pineaiгиrotari kareti tyara okantaka okantira tsarere tsarere, tera ario maani onkoneagitete, magatirotyo ontenerenkagiteapinitakaro. Ario inkañotapaempa Kañotasanolakaririra Matsigenka iripokaera, maganirotyo ineasanoigavakeri. ²⁸ Antari panikyara ontsonkatana kempa magatiro katsiketyotari iripokapaake inkomutagaigapaakerira kañovageigacharira, kañomataka igamaga tyarika kara inoriaka ineventumatakari samponero katsiketyo iparigashitapaakeri.

*Tyara onkantanakempa impigaatera Jeso
(Mr 13.24-31; Ir 21.25-33)*

²⁹ “Iroro avisanakera tsipereagantsi ‘irirokyo tsivakanankitsine poreatsiri intiri aikiro kashiri. Yogari impokiropage irashiriagetanakempa, ganigetari ikusotai.’

³⁰ “Impogini oneavakenkani anta inkiteku tyarika onkovoreavagetanake kara ovashi iroro ogotantakenkani panikyasano iripokapae Kañotasanolakaririra Matsigenka. Ogatyo inkenaigake iriragaiganakempa maganiro kipatsikunirira inkaemavaitaiganakera: ‘Inaa, inaa, maikaniroro nonkame.’ Impogini ineavakenkani Kañotasanolakaririra Matsigenka iripokapaakera inkenapaakera menkoriku inkoveenkavagetaapaakera, aikiro iragaveavagetaapaakera iravisaigakerityo maganiro. ³¹ Impogini ontivotanakenkanira tivorintsi intigankaigakeri isaankariite iriaigakera intsotenkagiteaiganakemparora magatiro kipatsi irapatoitaigakerira irashiegi Tasorintsi.

³² “Maika kemisantaigena nonkantaigakem-pira. Pineaigirora igera okyaenkara mechoshiatanaatsi oshi pogoiwake panikya aganaempa osariganaera. ³³ Ariotyo onkañotakemba impogini pineaigavakerorika onkañotanakempara nokamantaigakempirira maika iroro pogotantaigavakemba panikyasano impigaate Kañotasanolakaririra Matsigenka. ³⁴ Arisanotyo nonkantaigakempi magatirotyo oka nokantaigakempirira maika ontsatagage-tanakempatyo tekyaenkara pimpogereagempa

viroegi. ³⁵ Ogari inkite ontiri kipatsi ontsongagetaempa, kantankicha ogari nokantagetakerira garatyo okantatigumata, ontityo ontsatagagetanakempa magatiro.

*Tera ogotenkani tyati impigantaatempa Jeso
(Mr 13.32-37; Ir 17.26-30, 34-36; 12.41-48)*

³⁶ “Tera tyani gotumatatsine tyati impigantaatempa Kañotasanotakirira Matsigenka. Ario ikañotaka irirori tera irogote. Alkiro isaankariite Tasorintsi tera irogoige. Panirotyo ikantakara Tasorintsi irirori yogotakerora.

³⁷ “Antari impigaera onti onkañotakemparo aiñokyara itimaveta Noe pairani* ³⁸ tekyauenkara irogivarigero Tasorintsi omarane inkani ampamankagiteanakerora magatiro kipatsi. Maganirosanotyo shinevageigamatakatyo, isekataigakara, yoviikaigakara, yagaigakera tsinane, ipavakagaigakara irishintoegi oimentaigakempara, ovashi aganaka kutagiteri ikiantanakarira Noe tsompogi yomatetakara ivitoku okantaganirira areka. ³⁹ Impogini okomutagaigapaakeri inkani opogereasanoigakerityo kara. Ariotyo onkañotakempa impogini iripokaatera Kañotasanotakirira Matsigenka ontityo inkomutagantapaakempa.* ⁴⁰ Antari iripokaatera irinaigake piteni matsigenka itsamaireku, paniro iraganakenkani, yogari irapitene iokanakenkani. ⁴¹ Ario onkañoigake piteni tsinane ompitaigake ontononkavageigakera, paniro aganakenkani, ogari apitene okanakenkani.

* **24:37** Jen 6.5-8 * **24:39** Jen 7.6-24

42 “Irerotari nokantantaigakempirira pinkantakanira pogiaigavaeri Pitinkami, tera pogoigenika tyati impigantaatempa. **43** Atsi sureigemparaty, intimera pashini shintankicharira ivanko irogotemera tyatirikara iripokantakempa koshinti, ¿matsi ario irimagake? ¡Garatyo imagi! Ontityo inkireaventakero iaraki ganiri ikoshitagani. **44** Irerotari nokantantaigakempirira pinkantakanira pinegintevageigakempa pogiaigavaerira Kañotasanolakaririra Matsigenka impigaatera, gatanika pogoiginika tyati impigantaempsa, ontitari katsiketyo inkomutagaigapaempi.

45 “Onti pinkañoigakempari nampirantsi govagetatsirira kematsasanolotiririra shintaririra. Pine intimera shintacharira ironampiriaegi impo iriatakeria parikoti inkantanaeri paniro ironampiria ineaigaerira maganiro irapinampirantsiegite impaigaeri omirinka isekaegi. **46-47** Antari iripokaerika inea-paakeririka itsatagasanotakero ikantanakeririra, ariompatyo irishineventasanotanakempariri inkantanakerira: ‘Maika nokogake pineagetakenarora magatiro nashintageterira.’ Impo irirori irishinevagetakempatyo kara. **48** Kantankicha antari intirika terira inkematsatante gara yogiavairi shintaririra onti inkantake: ‘Gatatarorokari ipokai’, **49** ovashi intsittanakero inkisakisaganakerira irapinampirantsiegite, aikiro inkonoivageiganakempari shinkisenari onti impiriniventuntetanake isekatavagetaempa, aikiro ishinkivagetakempara. **50** Impo katsiketyo inkomutagapaakeri

shintaririra ⁵¹ inkisashivagetapaakemparityo kara intentagantaigakemparira kematsatamampegaigacharira kogapage iokakerira parikoti inkaemavavagetake iratsikagisevagetakerora irai.

25

Jeso ikantakotakerora impegakempara Tasorintsi Igoveenkariegite maganiro ikañotagakaro 10 tsinaneegi okyaenkarira antaroiganankitsi

¹ “Maika nonkantakotakero tyara onkan-tanakempa impogini irapatoitaigakerira Tasorintsi maganiro kematsaigiririra impegakempara Igoveenkariegite, onti nonkañotagakemparo 10 tsinaneegi okyaenkarira antaroiganankitsi. Iroroegi amakoiganake omecheroegite oaiganakera ontonkivoaigavakemparira gankitsinerira tsinane. ² Onaigake 5 terira osuretasanovageigempa. ³ Iroroegi amaigavetanaka omecheroegite, kantankicha tera amakoiganake aseite ompiajaigavaera paita intsoatanakempara. ⁴ Ogari otovaireegi iroro pinkante amakoiganake. ⁵ Impo tekyatanika aiñokya iripoke gankitsinerira tsinane opochokiigamatanaketyo ovashi omagaiganake. ⁶ Impo onigankigitetanakera okemaigutatyo okaemunkanira: ‘¡Pokapaake gankitsinerira tsinane! ¡Piaigekario pintonkivoaigavakemparira!’ ⁷ Oyatyo okenaigake otinajaiganaka maganiro onoshikakoiganakera omecheroegite. ⁸ Ogari terira amakoige oaseitete okantaigiro shintakoigankicharira: ‘Pajaigenakario maani piaseitete panikya nontsivakakoiganake.’

9 Kantankicha iroroegi okantaigiro: ‘Garorokari nopalajimpi. Antari nompajaigavetempi onti nontsoatakoiganakempa shintsi maganiro. Piaigetyo pimpunaventaigakitera pashini.’

10 Kantankicha iroro oaigavetanakara ompunaventaigemera mataka gonketapaaka gankitsinerira tsinane. Ogari makoigankitsirira oaseitete okiaiganake tsompogi otentaigakarira, oga okenake ashitanunkani shitakomentontsi.

11 Impo opokaigavetapaaka otovaire oneaigapaakero shitaka okaemaigapaake okantaigi: ‘¡Shireakoigenakario!’ **12** Kantankicha irirori ikantaigavakero: ‘¿Matsi noneaigimpiratyo kameti nashireakoigakempiniri?’

13 “Irorotari maika nonkantantaigakemprira pinkantakanira pinegintevageigakempa, tera pogogenika tyatirikara impigantaatempa Kañotasanolkaririra Matsigenka.

Jeso ikantakotairora impegakempara Tasorintsi Igoveenkariegite maganiro ikañotagakaro matsigenka shintavagetacharira koriki

(Ir 19.11-27)

14 “Maika nonkantakotaero tyara onkan-tanakempa impogini irapatoitaigakerira Tasorintsi maganiro kematsaigiririra impegakempara Igoveenkariegite, onti nonkañotagakemparo matsigenka shintavagetacharira koriki. Panikyara iriatake pashiniku kipatsi ikaemakagantaiganakeri maganiro iromperaneegi ipaiganairi koriki irogitovaigaigakerira.

15 Yogari gotasanotankitsirira ipanakeri 5,000 korikimenta. Yogari irapitene intagani ipanakeri

2,000. Yogari yomavatakarira intagani ipanakeri 1,000. Impo iavagetake samani. ¹⁶ Yogari ipanakerira 5,000 yagantaari pashini 5,000. ¹⁷ Ario ikañotakari irapitene ipanakerira 2,000 yagantaari pashini 2,000. ¹⁸ Kantankicha yogari ipanakerira 1,000 iatake ikigantashitakeri kipatsiku ikitatakerira.

¹⁹ “Impogini yavisavagetanakera tovaini kashiri ipigaa shintaigaririra ikantaigapaakeri: ‘Tsame aneaigakerira koriki akarikara pagaiwake.’ ²⁰ Yogari ipanakerira 5,000 yamakeneri pashini 5,000 yagantakaririra igorikite ikantiri: ‘Intagani pipanakena 5,000, neri yoga pashini nagantakaririra pigorikite.’ ²¹ Yogari shintaririra ikantiri: ‘Kametitake, pitsatagakerotari nokantakempirira. Maikari maika pikematsatakenatari, nokogake pineagetakenarora pashini pairorira avisakeri yoga 5,000. Taina ashinevageigakempara.’ ²² Yogari irapitene ipanakerira 2,000 yamakeneri pashini 2,000 yagantakaririra igorikite ikantiri: ‘Intagani pipanakena 2,000, maika neri yoga pashini 2,000 nagantakaririra pigorikite.’ ²³ Yogari shintaririra ikantiri: ‘Kametitake, pitsatagakerotari nokantakempirira. Maikari maika pikematsatakenatari, nokogake pineagetakenarora pashini pairorira avisakeri yoga 2,000. Taina ashinevageigakempara.’

²⁴ “Kantankicha yogari yomavatakarira ipanakerira 1,000 ikantiri shintaririra: ‘Noneimpitari vinti terira pintsarogakagantavagetempa, aikiro vinti pairorira

patsipereakagantavageta pantavagetaganira pagakera tovaini koriki. Aikiro onti pagantakari koriki kogapage tera pantavagetumate. ²⁵ Irorotari nopinkantakempirira noatantakarira nokitatutirira pigorikite. Maika neri yoga pipanakenarira.’ ²⁶⁻²⁷ Yogari shintaririra igorikite ikantiri: ‘Virori vinti terira pinkametite, vinti peranti, iroroventira pogotaketari nat-sipereakagantavageta kera nantavagetaganira kogapage nagakera nogorikite, aikiro nagantarira koriki kogapage tera nantavagetumate, ḫtyara okantakara tera pimperi nogorikite pinatantavagetsirira pagantaemparimera pashini, impo nopolavetaara maika pimpavaenarime?’ ²⁸ Ishonkashiigari naigankitsirira kara ikantaigiri: ‘Gapitsaigeri yoga 1,000 korimenta nopalvetakaririra pimpaigakerira gankitsirira 5,000. ²⁹ Pairotari impasanotakenkani tyanirika shintasanotankicharira, kantankicha yogari terira irashintavagetempa irogapuntarenkapitsatakenkanityo yashintagevetakarira. ³⁰ Maika yokari yoka nomperane terira inkematsatante maiganakeri pokaigakiterira sotsi pavatsaariku intentaigakemparira kaemavaitaigatsirira tsikagisevageigatsirira irai.’

Tyara inkantaigakenkani matsigenkaegi impogini impegakempari Jeso Igoveenkariiegite maganiro

³¹ “Maika nonkantaigakempi impogini impigaera Kañotasanotakaririra Matsigenka inkoveenkavageta paaketyo intentaigapaakemparira isaankariite impe-

gakempara Igoveenkariegit maganiro.
³² Irapatoventavageigapaakemparityo maganiro matsigenkaegi. Irirori irashirikoigavakeri inkañotagaigakemparira sentaigiririra ovisha yashirikoigirira irovishate ganiri ikonoitari igaverate. ³³ Yogaegiri kematsaigiririra irogaigavakeri irakosanoriraku. Yogaegiri terira inkematsaigeri irogaigavakeri irampateku.
³⁴ Impogini inkantaigakeri naigankitsirira irakosanoriraku: ‘Tainaegi viroegi ikavintsa-jaigakerira Apa pashintaigakemparora magatiyo yovetsikaigakempirira. Pairani okyasanokyara yovetsikagetake kipatsi viroegitari isariaigaka inkavintsa-jaigakempira. ³⁵ Natsipereavagetira notasegane viroegi pipaigakena nosekatakara. Nomirevagetira pipaigakena noviikakara. Tyarikara nanuivagetake pikaemaigakena pivankoku nomagimoigakempira.
³⁶ Notsonkasetakovagetara viroegi pipatsaraigakena nogagutaara. Nomantsigavagetira viroegi pitsarogakagaigakena pipokaigake pikamosoigutanara. Aikiro yashitakoitanara pipokaigake pikamosoigutanara.’ ³⁷ Impo yogari kematsaigatsirira inkantaigakeri: ‘Notinkami, ¿tyara noneaigakempira kara pitasegakera nopaigakempi piseka? ¿Tyara kara noneaigakempira pimiretakera nopaigakempi pimire? ³⁸ ¿Tyara kara noneaigakempira panuivagetakera nokae-maigakempi pimagimoigakenara? ¿Tyara kara noneaigakempira pitsonkasetakovagetanakara nopatsaraigakempi pogagutaara? ³⁹ ¿Tyara kara noneaigakempira pimantsigatakera,

aikiro yashitakoitakempira noaigake nokamosoigutimpira?" ⁴⁰ Kantankicha irirori inkantaigeri: 'Arisanotyo nonkantaigakempi antari pitsarogakagumaigakarira paniro yoga kematsatanarira terira impaitumatempa, kañomataka nantinirikatyo pitsarogakagaigaka.'

⁴¹ "Impo inkantaigakeri yogaigavakerira irampateku: 'Maika piaige viroegi parikoti anta morekariku garira otsivakumati yovetsikashitunkanirira kamagarini intiegiri itovaireegi, ikisashiigakempitari Apa.

⁴² Natsipereavagetira notasegane tera pimpaigena nosekatakempara. Nomire-

vagetira tera pimpaigena noviikakempara.

⁴³ Nanuivagetira tera pinkaemaigena pivankoku nomagimoigakempira. Notsonkasetakovagetara tera pimptsaraigena nogagutaempara. Nomantsigavagetira ontiri aikiro yashitakoitanara tera pintsarogakagumaigena pimpokaigakera pinkamosoigutenara.' ⁴⁴ Iriroegi inkantaigeri: 'Notinkami, ¿tyara kara noneaigakempira pitasegakera, panuivagetakera, pimiretakera, pitsonkasetakovagetakara, pimantsigatakera, aikiro yashitakoitakempira tera nontsaro-gakagaigempi?' ⁴⁵ Irirori inkantaigeri:

'Arisanotyo nonkantaigakempi, terika pintsarogakagaigempari yogaegi ikantaganirira tera impaitumaigempa, kañomataka nantinirikatyo pikisaigake tera pintsarogakagumaigena.'

⁴⁶ Maganiro yogaegi iriaigake inkantakanira intagaigakempa morekariku. Kantankicha yogari kematsaigakeririra Apa onti iriaigake enoku, inkantakani intimaigake gara ineimaigairo

igamane.”

26

*Isarianunkanira Jeso iragakagantakenkanira
(Mr 14.1-2; Ir 22.1-2; Jn 11.45-53)*

¹ Yagatakera Jeso yogotagaigakerira irogamereegi ikantaigiri:

² —Viroegi pogoigaketari pitenivati kutagiteri agantakemparira Pasekoa.* Iroro iragakagantakenkani Kañotasanolakirira Matsigenka inkentakotagantakenkanira.

³ Impo yapatoitaigaka ivampatuireku Kaipashi maganiro itinkamiegi saseroroteegi, gotagantaigirorira itsirinkakotanakerira Moiseshi intiegiri itinkamiegi jorioegi. Yogari Kaipashi inti itinkamisanorira saseroroteegi. ⁴ Ario kara ikemavakagaigaka iramatavinaigakerira Jeso iragakagantaigakerira irogakagantaigakerira.

⁵ Kantankicha ikantaigake:

—Antari avisanakera Pasekoa ario agakagan-taigakeri. Maikari maika gatata agakagantai-giri ganiri ikitakoiganakari maganiro patoven-taiganakaririra.

*Isagutantunkanira Jeso kasankaari
(Mr 14.3-9; Jn 12.1-8)*

⁶ Impogini iatanake Jeso Vetaniaku inkamosoterira Sumo ikantaganirira Vesegavetankicharira. ⁷ Antari inakera ivankoku opokashitakeri tsinane amakotapaake kasankaari punatasanolacharira. Ogari opiaatantakarira onti ovetsikantunkani

* **26:2** Ek 12.1-18, 21-27

aravasetero, shatekaamatatakayo kara. Ipitaigakera Jeso isekatavageigakara irorori aiñonitapaakari otintsanorenkakotakero osagutantakarira igitoku. ⁸ Yogari irogamereegi iroro ineaigavakerora ogatyo ikenaigake ikisaiganaka iniavakagaiganakara ikantaigi:

—¿Antari gara aparaatagantiri? ⁹ ¡Matsi tera ogote opunavagetaratyo tovai kara! Ariometyo ompimantakenkanime agantakenkanira koriki impaigakenkanira kogakovageigacharira.

¹⁰ Kantankicha Jeso irorotyo ikemaigavakerira ikantaigutarityo:

—Atsi arionenityo, gara pikisaigiro, pairotari okametitake okañotakenara maika osagutakenara. ¹¹ Yogari kogakovageigacharira kantakatari pintentaigaemparira, kantankicha narori gatanika pikantakani pintentaigana. ¹² Ogari oga tsinane ontitari osaguvitakena kasankaari inkaitaenara impogini nonkamakera. ¹³ Maika nonkaman-tasanoigakempi tyarika kara inkenkitsatakotakenkani Tasorintsi tyara ikanta yogavisaakotantira ario onkañotagakenkani oga tsinane onkenkit-satakotaenkani tyara okantakena osagutakenara kameti osuretakotaenkaniniri irorori.

*Jorashi ikogakera iragakagantakerira Jeso
(Mr 14.10-11; Ir 22.3-6)*

¹⁴ Impo yogari irogamere Jeso paitacharira Jorashi Ishikariote iatake ikamosoigutirira itinkamiegi saseroroteegi ¹⁵ ikantaigapaaikeri:

—¿Aka tovaini koriki pimpunaigakena nagakagantaigakempirira Jeso?

Iriroegi ipaigakeri koriki 30 imenta. ¹⁶ Impo iatai ovashi isuretanaka tyarikatyo inkantakeri iragakagantakerira.

*Jeso isekatagaiganaarira irogamereegi
(Mr 14.12-21; Ir 22.7-18; Jn 13.21-30)*

¹⁷ Impo aganakara vieseta ogantaganirira pan terira onkonogempa opoegantarira yogari irogamereegi Jeso yaiñoniiganakari ikantaigiri:

—¿Tyara kara pikogake novetsikaigakerora magatiro kameti asekataigakemparra paita?

¹⁸ Irirori ikantaigiri:

—Piaige Jerosarenku ivankoku pashini matsigenka pinkantaigapaakeri: ‘Yogari Gotagantatsirira ikanti: Ataketari omonkaratapaaka nopokashitakerira, irorotari nokogantakarira nosekatagavageiganakemparira nogamereegi pivankoku nosuretakoigaemparora Pasekoa.’

¹⁹ Ovashi iaigake yovetsikaigakerora magatiro itsatagageigakerora ikantaigavakeririra Jeso.

²⁰ Impo ochapinienkatanakera yogari Jeso itentaigakari irogamereegi ipitaigakera mesaku

²¹ isekatavageigakara. Impo ikantaigiri:

—Maika nonkamantasanoigakempi, paniro viroegi pagakagantakena paita.

²² Yogari irogamereegi ogatyo ikenaigake ikenkisureaiganaka ikantaiganakera paniropage:

—Notinkami, ¿naro gakagantakempine?

²³ Ikanti Jeso:

—Inti gakagantakenane tsiantakotakenarira maika peratoku. ²⁴ Ontitari ontsataganakemparra okantakerira Itsirinkakagantakerira Tasorintsi iniakotakerira Kañotasanolakaririra Matsigenka,

kantankicha jmaikaniroro iratsipereavagetake
yoga gakagantakerinerira! Gamerakari itimi
okyara.

²⁵ Iniamatanaketyo Jorashi gakagantakeriner-
irira ikanti:

—Gotagantatsirira, ñnaro gakagantakempine?

Icantiri irirori:

—Virotari kantankitsi.

*Jeso ikotagakerora pan ipaigakerira
irogamereegi*

(*Mr 14.22-25; Ir 22.19-23; 1 Ko 11.23-26*)

²⁶ Impo panikyara iragataiganae isekataigakara inoshikakero Jeso pan yapagotakero iniakeri Tasorintsi ikanti: “Apa, noshineventakempi pipakenarora oka pan.” Impo ikotagakero ipaigakerira irogamereegi ikantaigiri:

—Okari oka pan kañomataka ontinirikatyono-
vatsa. Nero gaigemparo.

²⁷ Impo osamanitanakera irorokya inoshikakotake vino, iniairi aikiro Tasorintsi ikanti: “Apa, noshineventakempi pipakenarora oka vino.” Impo ipakoigakeri irogamereegi ikantaigiri:

—Okari oka vino kañomataka ontinirikatyono-
rira. Nero viikaigemparo. ²⁸ Antari nonkamaventaigakerira maganiro ovoatanake noriraa.* Irorotari maika irogavisaakotanta-
igakenkanirira maganiro kematsaigakenanerira ganiri ikenkiimatairo Tasorintsi ikañovageigara.

²⁹ Maika nonkamantasanoigakempi gara noviikumataaro vino. Antari impogini irapatoitaigakerira Apa maganiro kematsaigiririra

* **26:28** Ek 24.8

impegakempara Igoveenkariegit, ario pinkante nontentaigakempi aviikaigakemparora vino okyaakyarira.

*Jeso ikamantakerira Perero interatakotakerira
(Mr 14.26-31; Ir 22.31-34; Jn 13.36-38)*

30 Impo yagataiganakera imatikaventaigakerira Tasorintsi ikonteiganake itonkoaignakanakera iaigakera Orivoshiku. **31** Impo ikantaigiri Jeso:

—Maika maganiro viroegi pintsarogaaignakanake paita pokaiganakena piaigakera parikoti. Ariotari okantakeri Itsirinkakagantakerira Tasorintsi okanti:

‘Impogini nogakeri sentiririra ovisha.

Yogari ovisha ogatyo inkenaigake irishigavio-vageiganake.’

32 Kantankicha impogini nanianaera naketyo ivaiganakempine noatakera Garireaku.

33 Inianake Perero ikantiri:

—Intsarogaigavetanakempatyo maganiro iokaigavetanakemputyo, kantankicha narori garatyoy nokumatimpi.

34 Kantankicha Jeso ikantiri:

—Nonkamantasnotakempi, paita tekyara irinie atava pinteratakotakena mavati.

35 Iniitanaatyo Perero ikanti:

—Intagarora intentagantitenara irogaitakenara irogaitenataty, kantankicha garatyoy noteratakotumatimpi.

Ario ikañoigakero maganiro ikantaigakera.

*Jeso iniakerira Tasorintsi Jetsemaniku
(Mr 14.32-42; Ir 22.39-46)*

36 Impogini iaigake Jetsemaniku. Iroro yagonkeigapaakara yogari Jeso ikantaigiri irogamereegi:

—Pitaigeta aka, narori noateta anta noniakerira Apa.

37 Intagani itentaiganaka Perero intiegiri itomiegi Severeo. Irirori ikenkisureavagetanakatyō kara yovankinavagetanaka. **38** Osamanitanakera ikantaigiri:

—Nokenkisureavagetanakatyō kara panikya agavagetanakena. Pitaigeta viroegi aka pintentaigakenara pinkireaventaigakenara.

39 Irirori iatake antakona anta yompatakasetapaaka inianakerira Iriri ikanti: “Apaa, nokogavetaka pogavisaakotaenara ganiri natsipereavageti, kantankicha impatyora viro.”

40 Impo yagatanakera iniakerira iatai inkaaraku inaigakera irogamereegi ineaigapaakeri magasevageigake. Ikantapaakeri Perero:

—¿Matsi tera pagaveaigumate samanikonara pinkireaigake? **41** Kireaige gara pimagaigi. Niaventaigempa ganiri pikafiovageiga. Viroegi pikogaigavetakaniroro pinkematsatasanoigakerira Tasorintsi, kantankicha tera pishintsitashiigero posante terira onkametite.

42 Osamanitanaira ipiganaa aikiro iniairi Iriri ikantiri: “Apaa, gatanika pikantatigironika ganiri natsipereavageti, ariotyo onkañotakempa maika ontsatagakempara pikogakerira viro.”

43 Impo ipigavetaa ineaigapairi magasevageigaityo aikiro, avisaganakeritari ivochokine tera inekoigavakempa imagantaiganaarira.

44 Iokaiganairi ipigutanaara aikiro iniairira Iriri,

okiiro ikantairi inkaaratirira ikantakeririra.
45 Impo yagatanakera iniairira ipiganaa inaigakera irogamereegi ikantaigapaakeri:

—¿Ogaa, magaiganatsivi pishigopireaganachavi?
 Gapaaka iragakagantakenkanira
 Kañotasanotakaririra Matsigenka irogaigakerira
 kañovageigacharira. **46** Maikari maika tinajaiganake, tsame, mataka pokapaake gakagantakenanerira.

Yaganunkanira Jeso

(*Mr 14.43-50; Ir 22.47-53; Jn 18.2-11*)

47 Tekyara iragate Jeso iniaavagetakera ipokapaake Jorashi itentaigapaakari tovaini matsigenkaegi yamashiigapaakeri savuri ontiri inchakii. Intiegi tigankaigakeri itinkamiegi saseroroteegi intiegiri itinkamiegi jorioegi.
48 Yogari Jorashi gakagantakerineririra Jeso yogotagaigakeri okyara ikantaigiri: “Agonkeigapaakemparika pineaige tyanirika noatashitake nasaraanatapaakemparira, irirotari pikogaigakerira, paginaakerira.”

49 Impo iroro yogonketapaakara inakera irirori ikantapaakeri:

—¡Gotagantatsirira!, ¿aiñovi?
 Impo yasaraanatakari. **50** Yogari Jeso ikantiri:
 —Jeeje, aiñona. Maika aityotari pipokashitakerira atsi nani kañotero.

Impo yogari tentaigakaririra Jorashi yaiñoniigapaakari Jeso inoshikaigapaakeri yairikaigakerira. **51** Kantankicha aiño paniro itentakarira Jeso inoshikamatanketyo

isavurite iserogempitatutaryo ironampiria itinkamisanorira saseroroteegi.

⁵² Kantankicha Jeso ikantaigiri:

—Atsi arionenityo, piataero pisavurite. Tyanirika ventarorira isavurite ontityo irogantakenkani savuri. ⁵³ ¿Matsi tera pogote narora kogankitsine nonkantakerityo Apa intigankakera isaankariite intovaigavagetaeketyo kara impugamentaiganakenara? ⁵⁴ Kantankicha ariomera nonkañotagakerome maika, ¿ario tyara onkantakempara ontsataganakempara Itsirinkakagantakerira irirori pairani okamantakotakenara nantsipereavagetaekera?

⁵⁵ Impo ishonkashiigari ikantaigiri intentaigakarira Jorashi:

—¿Matsi naro koshinti nerotyo pamashiigakenara savuri ontiri inchakii pagaiganakenara? Omirinkatari kutagiteri notentaigakempi viroegi anta ivankoku Tasorintsi nogotagantavagetakerira tera ario pagaigena, ⁵⁶ kantankicha okañotantanakarira maika onti ontsatagage-tanakerora ikamantakoigakenara pairani kamantantaigatsirira itsirinkakoigakenara okyara.

Impo ishigavioigamatatanakatyo maganiro irogamereegi iokaiganakeri Jeso paniro.

*Yamanunkanira Jeso yapatoitaigakara
itinkamipage jorioegi*

(*Mr 14.53-65; Ir 22.54-55, 63-71; Jn 18.12-14, 19-24*)

⁵⁷ Yogaegiri gaigakeririra Jeso yamaiganakeri ivankoku Kaipashi. Irirori inti itinkamisanorira

saseroroteegi. Ario inaigake kara gotagantai-girorira itsirinkakotanakerira Moiseshi intiegiri aikiro itinkamiegi jorioegi yapatoitaigakara. ⁵⁸ Impo yogari Perero intaina inapaake yogiatapaakerira Jeso. Antari yagapaakerora pampatuiku ineaigapaakeri soraroegi pirinitaigake kara. Iriroegi intiegi sentaigirorira ivanko Tasorintsi. Ovashi ipirinitapaake irirori kameti ineakotakeriniri Jeso tyarikara inkantakenkani.

⁵⁹ Yogari itinkamiegi saseroroteegi itentaigakari itinkamiegi jorioegi ikaemakagan-taigakeri pashini tsoeventaigakemparineririra kameti ontimakeniri onkenantakemparira irogakagantaigakerira. ⁶⁰ Ipokaigavetapaakatyovaini tsoeventaigakaririra, kantankicha irorokya ikantaigi irorokya ikantaigi, nerotyo tyampa inkantaigakeri. Impo ipokaigamatapaaketyo piteni kantaigankitsirira ⁶¹ ikantaigi:

—Naroegi nokemaigakeri ikantakera: ‘Naro nagaveake nogimamerinkakerora ivanko Tasorintsi impo novetsikaero, omavatakotanakempakutagiteri nagataero.’

⁶² Impo ikavirimatanakatyovaini Kaipashi ikantiri Jeso:

—¿Tera tyara pinkantumate?, pikemaigakeritari ikantanaigakempira. Maika ¿tyara pinkanteraviro?

⁶³ Kantankicha irirori ikemisantanaketyo, teratyo tyara inkantumate. Osamanitanakera imatutaarityo aikiro ikantiri:

—Maika nonkantakempi kañomataka irironirika kantakempi Tasorintsi ikantakanirira itimi, atsi kamantena ¿arisanotyo vinti Ikogakagakerira Tasorintsi impegakempara Nogoveenkariegite? ¿Viro Itomi Tasorintsi?

64 Iniamatanaketyo Jeso ikantiri:

—Jeeje, naroniroro katinka pogakero, kantankicha maika nonkantaigakempi impogini pineaigakeri Kañotasanotakaririra Matsigenka impirinitakera inampinaku irakosanoriraku Tasorintsi Gaveavagetatsirira. Aikiro pineaigavakeri iripokaera inkenantapaemparora menkori.

65 Ogatyo ikenake ikisamatanakatyo Kaipashi itisaraitarotyo imanchaki tseerererere ikanti:

—¡Yokari yoka ontí ikañotagumanatakari Tasorintsi! Iroroventi maika intagatityo akaemakagan-taigi pashini iripokaigakera inkamantaigakaera ikañotakerora maika, matakiroro pikemaigakeri tsikyata viroegi ikantakera. **66** Maika ¿tyara pinkantaige viroegi?

Iriroegi ikantaigi:

—Kantetyo inkamakera, tsikyatatarí ikañotagantaka irirori.

67 Impo itoanaigakeri ivoroku, itaataaigakeri togn togn, aikiro pashinikya patosanaigakeri ivoroku **68** ikantaigakerira:

—Irorotari vintira Ikogakagakerira Tasorintsi impegakempara Igoveenkariegite jorioegi, ¡atsi gotenityo tyani taakempi!

*Perero iteratakotakerira Jeso
(Mr 14.66-72; Ir 22.56-62; Jn 18.15-18, 25-27)*

⁶⁹ Yogari Perero aiñokya inake anta parikoti pampatuiku. Impo okenapaake paniro nampiriantsi okantiri:

—Viro aikiro pitentavagetari Jeso Garireaku-nirira.

⁷⁰ Kantankicha yogari Perero ikemamampe-ganakatyō ikantiro:

—¿Jaa? ¿Tyara pikanti? Tera nonkeme tyarika pikanti.

Ikemaigakeri maganiro naigankitsirira kara. ⁷¹ Impo iavetakara anta sotsimoroku oneitaarityo aikiro pashini nampiriantsi okantaigiri naigankitsirira kara okanti:

—Yogari yoga inti itentavagetarira Jeso Nasarekunirira.

⁷² Kantankicha irirori ikantutaarotyo aikiro ikanti:

—¡Teratyo noneimateri yoga piniakotakerira! Ineakenatari Tasorintsi tera ario nontsoegumatempa.

⁷³ Choeni osamanitanakera yaiñoniigapaakari naigankitsirira kara ikantaigiri:

—Arisanoniroro pitentavagetari noke-maigavaimpitari piniakera.

⁷⁴ Yogari Perero ikantutaatyo aikiro:

—¡Nokantakeniroro teratyo noneimateri! Arisan-tyo nokantake, ineakenatari Tasorintsi tera ario nontsoegumatempa. Antari ontirika notsoegaka inkisashitakenatyo, tera noneimaterinika pini-akoigakerira maika.

Irorotyo ikantakera maika, iniamatanaketyo atava ovashi ⁷⁵ isurematanakarotyo Perero ikantakeririra Jeso inkaara ikantiri: “Paita

tekyara iriniimate atava pinteratakotakena mavati.” Ikaviritapanuta iataira ogatyo ikenake iragamatantanakatyō jiii jiii jiii, ikaemavavagetaketyo kara.

27

*Yamanunkanira Jeso Piratoku
(Mr 15.1; Ir 23.1-2; Jn 18.28-32)*

¹ Impogini okutagitetanakera maganiro itinkamiegi saseroroteegi intiegiri itinkamiegi jorioegi ikemavakagaiganaka tyarika inkantaigakeri Jeso irogakagantaigakerira.

² Impo yagaiganakeri yogusoiganakeri yamaiganakenerira Pirato. Irirori inti inampina Sesa.

Ikamakera Jorashi

³ Impogini yogari Jorashi gakagantakeririra Jeso yogotake arisano irogakagantakenkani ovashi isurematantanakatyō ikanti:

—¡Narotakaniroro! Ario nokantavagetaka naro gamerakari nagakagantiri okyara.

Impo iatake inaigakera itinkamiegi saseroroteegi intiegiri itinkamiegi jorioegi irogipigaigaatenerimera yoga 30 korikimenta ipaigakeririra okyara iragakagantakerira Jeso ⁴ikantaigavetaapakari:

—Narori onti novetsikake terira onkametite nagakagantakeritari terira tatakona irovetsikumate, maika irogakenkani.

Kantankicha iriroegi ikantaigavakeri:

—¿Ario tyara nonkantaige naroegi? Virompatyo, virotari kañotankicha okyara.

⁵ Nerotoyo yovuokagisetapanutiri koriki kara tsompogi ivankoku Tasorintsi iatakera ishitikakara.

⁶ Impo yogari itinkamiegi saseroroteegi yapatogiseigairi koriki ikantaigi:

—Tera kameti agaigaerira ankonogiseigaerira yamaigirira pashini ipaigirira Tasorintsi. Ontitari ipunavitunkani iragakagantakerira irogakenkanirira.

⁷ Impogini ikemavakagaigaka impunaventantaigakemparora kipatsi paitacharira Igipatsite Vetsikirorira Koviti kameti ontimakeniri inkitatantaigemparira ponaiagankicharira parikotipage. ⁸ Irorotari otantanakarira oga kipatsi opaitanakara Iraatsigiteri ovashi maika. ⁹ Okañtotantakarira maika onti otsatagagetanakerora ikantakerira pairani kamantantatsirira Jeremiashi ikanti: “Yogaegiri iseraereegi yagaigakeri yoga 30 korikimenta ivunaro pairorira ikametiti ¹⁰ ipunaventantaigakarora kipatsi paitacharira Igipatsite Vetsikirorira Koviti, ariotari ikantakenari Notinkami.”

*Pirato ikogakotagantakerira Jeso
(Mr 15.2-5; Ir 23.3-5; Jn 18.33-38)*

¹¹ Impogini yogari Pirato ikogakotagantakeri Jeso ikantiri:

—¿Arisano viro Igoveenkariegite jorioegi?

Ikanti Jeso:

—Jeeje, arisano pikantasanotakeniroro, naroniroro.

¹² Antari itsoeventanaigakarira itinkamiegi saseroroteegi intiegiri itinkamiegi jorioegi tera

tyara inkantumate Jeso onti ikemisantanake.

¹³ Irorotari ikantantakaririra Pirato:

—¿Matsi tera pinkeme ikantanaiganakempira?

¹⁴ Kantankicha yogari Jeso teratyo iriniimate. Iroro ineavakerira Pirato ikañotakerora maika, yogavagetanaketyo kavako, tyampatyo inkanteria.

Ikantunkanira Jeso irogakenkanira

(*Mr 15.6-20; Ir 23.13-25; Jn 18.38-19.16*)

¹⁵ Omirinkatyo agara iviesetaegite jorioegi okantaganirira Pasekoa yogari Pirato yapakui paniro yashitakovitunkanirira yovetsikakera terira onkametite, tyanirikara ikogaigakerira itovaireegi irapakuaigaerira. ¹⁶ Ario inake kara paniro shitakotankicharira ipaita Varavashi, yapagiteakovagetatyō kara ikemakotaganira. ¹⁷ Impo Pirato ineaigakerira yapatoventaiganakarira maganiro ikantaigiri:

—¿Tyani pikogaigake nampakuaerira? ¿Irirorika Varavashi intirika Jeso pikantaigirira inti Iko-gakagakerira Tasorintsi impegakempara Pigovenkariegit?

¹⁸ Irirori ineaketari onti ikisavitunkani ineinkanira intira yapatoventanunkani, irorotari yamantanunkanirira iriroku.

¹⁹ Aiñokyara ipiriniti Pirato anta ikanomaantapinitira okantakagantakeri itsinanetsite okanti: “Gara pimavageta viro, tyampa ankantakeri yoga terira tatakona irovetsikumate. Nokisanigisevagetaketari inkaara posantegisematakatyo nogisanire. Irirorakari gimanatakena.”

20 Kantankicha yogari itinkamiegi saseroro-teegi intiegiri itinkamiegi jorioegi yogotagaigak-eri maganiro inkantaigakera: “Irirompatyo pam-pakuae Varavashi, yogari Jeso pinkentakotagan-takerityo.”

21 Yogari Pirato iniitaigaarityo aikiro ikantai-giri:

—¿Tyani pikogasanoigake nampakuaerira?
¿Iriro Varavashi intirika Jeso?

Ikaemaigamatanaaketyo:

—¡Inti pampakuae Varavashi!

22 Ikantaigiri Pirato:

—Iroroventi, ¿tyaratyo nonkantakerira yoga Jeso pikantaigirira inti Ikogakagakerira Tasorintsi impegakempara Pigoveenkariegite?

Ikaemaigutanaatyo aikiro maganiro:

—¡Kentakoteri!

23 Ikantaigiri Pirato:

—¿Matsi tyara ikantakara? ¿Tatampatyora yovetsikakera?

Ikaemaigutanaatyo aikiro:

—¡Nokantaigaketari kentakoteri!

24 Impo yogari Pirato ineavakera atanatsi ikaemavaitaiganakera tyampa inkantaigavakeri, ovashi ikaemakagantake nia inkivakotakempara kameti ineaigakeriniri maganiro impo ikanti:

—Irogakenkanirika maika tera naro kañotachane. Virompaegityo, viroegitari kañoigankicha.

25 Maganirosanotyo ikaemaiganake:

—¡Ariompa naroegityo kañoigankichane intiegiri aikiro notomiegi, naroegitari gakagantaigaker-ine!

26 Iroro ikemaigakerira Pirato yapakuakagan-tairi Varavashi. Impo yomperaventakari Jeso im-pasatakenkanira iramanakenkanira inkentako-takenkanira.

27 Yogari soraroegi yamaiganakeri tsompogi impo ikaemakagantaigakeri maganiro irapisoraroegitene yapatoventaiganakari isamatsanaigakerira. **28** Impo isapokaigakeri imanchaki yogagutantaigakari pashini kamisa kiraamagori. **29** Yagaigake kivitsa yovetsikashi-igakeri iramatsaire yamatsaitakerira. Aikiro yairikakagakeri inchakii irakosanoriraku, impo itigeroaventaigakari isamatsanaigakerira ikantaigakerira:

—¡Ojojoo, neri yogaaa! ¡Atsi neaigerikario Igovenkariegitie jorioegi!

30 Itoatoaigakerityo kara impo yagapitsaigairi inchakii ipasatantaigakarira igitoku tagn tagn.

31 Impo yagataiganakera isamatsanaigakerira isapokaigairi irorokya yogagutantaigaari irashi imanchaki yamaiganakeri inkentakoigakerira.

Ikentakotunkanira Jeso

(Mr 15.21-32; Ir 23.26-43; Jn 19.17-27)

32 Antari iaiganakera inkentakoigakerira itonkivoaigakari paniro Surenekunirira ipaita Sumo. Yogari soraroegi ikantaigavakeri inatanakenerira Jeso igoroshite. **33** Impo yagonkeigakara Gorogotaku, (onkantakera: “Ontaikara Itutai Kamatsirini”), **34** ipaigavetakari vino okonoatunkani kepishiari, kantankicha irirori yoviikavetaka maani ovashi tera inkoge iroviikasanotemporara.

³⁵ Impo yagataigakera ikentakoigakerira yogari soraroegi isokagiaigakero mapukicho ogotantanagririra kameti irogotantaigakemparora tyanirika shintakemparone imanchaki.
³⁶ Impo ovashi ipitaigake kara ikamaguigakerira.
³⁷ Antari enoku oatakara igitoku ogunkani inchakota otsirinkunkani okanti: “Yokari yoka inti Jeso, Igoveenkariegit jorioegi.”

³⁸ Aikiro itentagantunkani piteni koshinti ikentakotunkanira, paniro yogaratinkakotunkani irakosanoriraku, yogari irapitene onti yogaratinkakotunkani irampateku. ³⁹ Yogari visapiniigankitsirira kara ineaigakerira iokookonaigakerityo ⁴⁰ ikantaigakerira:

—¡Eejee tyanirityo maika! Kogapage pikantira: ‘Nogimamerinkakero ivanko Tasorintsi impo novetsikaero, omavatakotanakempa kutagiteri nagataero.’ Maikari atsi pugamentanakempanityo. Irorotari vintira Itomi Tasorintsi kentakoreanaempanityo paguitanaera.

⁴¹ Ario ikañoigaka itinkamiegi sasero-roteegi itentaigakarira gotagantaigirorira itsirinkakotanakerira Moiseshi intiegiri itinkamiegi jorioegi isamatsanaigakerityo iniavakagaiganakara ikantaigakera:

⁴² —Kogapage ikantunkani yagaveavagetityo ikavintsaantavagetakera yogavisaakotakerira pashini matsigenka, tyara okantakara maika tera iragavee impugamentanakempara ikiiro iraguitanaera. Antari irirora Agoveenkariegit inkentakoreanaempametyo iraguitanaera koroshiku kameti ankematsaigakeriniri.

⁴³ Irorotari ikematsavintsatakerira Tasorintsi

kantetyo impugamentaerira maika arisanorikara itakari, irorotari ikantira: ‘Nanti Itomi Tasorintsi.’

⁴⁴ Imaiganakatyo aikiro itentagantunkanirira ikentakotunkanira ikantanaigakerityo kara.

Ikamanakera Jeso

(*Mr 15.33-41; Ir 23.44-49; Jn 19.28-30*)

⁴⁵ Impo ikatinkatanakera poreatsiri ogakenake apavatsaasetanaka magatiro ovashi itsunkavagetanake. ⁴⁶ Ogatyo ikenake ikaemamatantanaketyo Jeso ikanti: “Eri, Eri, ¿irema savakatani?” (onkantakera: “Apa Tasorintsi, Apa Tasorintsi, ¿tyara okantakara povashigantakenara?”)

⁴⁷ Ikonogagarantaigaka naigankitsirira kara iroro ikemaigavakerira ikantaiganake:

—Atsi kemerikanika ikaemakotakerira kaman-tantatsirira Eriashi.

⁴⁸ Ishigamatanakatyo paniro yaganakera chomiatirorira nia iokaatakerora kachoariku vino yogaenokakovetakenerira savorokiiku irachomiatagakerimera. ⁴⁹ Kantankicha yogari itovaireegi ikantaigiri:

—Atsi pampogier, aneaigakerira iripokashitakeririka Eriashi iroguitaerira.

⁵⁰ Impo yogari Jeso ikaemapanaati aikiro imaraenkarikatyo kara ovashi ikemisantanake ikamanakera.

⁵¹ Irorotyo ikamanakera ogatyo okenake osaraamatanaketyo kamisa tsatamagotacharira ivankoku Tasorintsi* okantanakera katinkasano niganki tseerererere oponianakara enoku

* **27:51** Ek 26.1-37

oatakerora savi pairatamatake kotarenkasantake. Ontininkamatantanakatyō tinin tinin tinin otsiraagematanaketyō imperitapage,⁵² oga okenagetake ashirenakigetanaka ikitatantagetaganirira igamagapage, yaniagematanaityō tovaini kematsaigiririra Tasorintsi.⁵³ Impogini yanianaira Jeso iaigake iriroegi Jerosarenku ineaigavairi tovaini timaigatsirira kara.

⁵⁴ Yogari itinkamiegi soraroegi intiegiri intentashiigakarira ipampogiaigakerira Jeso ineaigavakera ontininkanakara, aikiro pashinipage oposantetanakara itsarogavageiganaketyō kara ikantaigi:

—¡Arisanoniroro inti Itomi Tasorintsi!

⁵⁵ Ario onaigake kara tovaini tsinaneegi giaigakeririra Jeso iponianakara Garireaku, aikiro omutakovageigakeri. Iroroegi onti aratintiitaigake antakona anta opampogiaigakerira.⁵⁶ Ario onaigake aikiro kara Maria Magarena ontiri Maria iriniro Santiago intiri Jose, ontiri aikiro iriniro itomiegi Severeo.

*Yogaataganira Jeso imperitanakiku
(Mr 15.42-47; Ir 23.50-56; Jn 19.38-42)*

⁵⁷ Impogini panikyara onchapinitanae ipokake paniro shintavagetacharira ipaita Jose. Irirori onti iponiaka Arimateaku. Ario ikañotaka aikiro inti irogamere Jeso.⁵⁸ Irirori iatashitakeri Pirato ikantakerira ikogakera iramanaerira Jeso inkitataerira. Yogari Pirato ikantakeri:

—Iroroventi nanityo.

Impo ikantaigakeri soraroegi:

—Kametitake pimpakerira iramanaerira.

⁵⁹ Ovashi yaganairi iponatantanakarira mechomagori kamisa okyamagokyarira ovetsikantunkanirira irino. ⁶⁰ Impo yamanairi yogaatirira imperitanakiku okyaenkarira ikigakagantake irogantaenkanimera irirori inkamanaera. Impogini itikakotantanakari omarane mapu iatai. ⁶¹ Ario onaigake kara Maria Magarena ontiri apitene Maria opirinitaigakera kara katinka yogaaganira.

Soraroegi sentaigavetakoriria yogantave-tunkanirira Jeso

⁶² Impo okutagitetenakera apishigopireanta-ganirira yogari itinkamiegi saseroroteegi intiegiri pariseoegi iaigake inkamosoiguterira Pirato ⁶³ ikantaigapaakeri:

—Naroegi nosureiganakaro ikantakerira yoga tsoenti tekyara inkame ikantakerira: ‘Nonkamakerika impo omavatanakempara kutagiteri nanianae.’ ⁶⁴ Maika kamani iroro iromavatakotantanakempa, irorotari nonkantaigaempirira atsi tigankenityo soraroegi irisentasanoigakerora yogantunkanirira ganiri ipokashiigiri irogamereegi iragaigapanuterira impo inkantaigakeri maganiro atake yanianai. Intagarora inkañoigerora maika pairorokari avisavagetakero iramatagaigakempara avisakerorokari yamatagakoigakarira tekyara inkame.

⁶⁵ Yogari Pirato ikantaigiri:

—Iroroventi nanityo, neri yogaegi soraroegi. Piaigetyo pisentaigakiterira, virompaegityo tyarika pinkantaigakeri.

66 Iririoegi iaigake yogunkanira Jeso yavitsa-jaigapaakerora mapu itikakotantunkanirira impo ikantaiganakeri soraroegi irisentasanoigakerora ganiri tyani pokashitumatiiri.

28

Yanianaira Jeso

(*Mr 16.1-8; Ir 24.1-12; Jn 20.1-10*)

1 Impo iroro okutagitetamanakera tominko, ogari Maria Magarena ontiri apitene Maria oaigamanake onkamosoigaaterira yogaaganira, ataketari avisanake kutagiteri apishigopireantaganirira. **2** Antari tekyara ogonkeigempa ontininkanaka kipatsi tinin, tinin, tinin, ipokapaaketari isaankariite Tasorintsi iponiapaaka enoku itiguronkapaaikerora mapu tikakovetakaririra Jeso ipirinitantakarora. **3** Ikovoreavagetiratyo kara kañomataka kareti okantira tsaarere tsaarere. Ogari igitsagare onkutavageteratyo kañomatakayto okutatira mampe. **4** Yogaegiri soraroegi iroro ineraigavakerira ogatyo ikenaigake itsarogavageiganaketyo kara ishigekavageiganakera shige shige shige ituaignamatanketyo ikamaigakitityo. **5** Impo iroro ogonkeigavetapaakara tsinaneegi yogari isaankariite Tasorintsi ikantaigiro:

—Gara pitsarogaigi. Naro nogotake inti pikogaigake Jeso ikentakovetunkanirira. **6** Kantankicha akari aka mameri, ataketari yoganiaagani, ariotari ikantakeri irirori tekyara inkame. Atsi tainaegi pineaigakerora yuginoriavetunkanira, **7** impo piaigepage

pintsatimaiganakera pinkamantaigapaakerira irogamereegi pinkante: ‘Atake yanianai. Maika iketyo ivatanankitsine iriatakerira Garireaku. Antari anta ario pineaigapaakeri.’ Irorotari nopolashitake nonkamantaigakempira.

⁸ Iroro okemaigavakera otsarogavageiganake, kantankicha oshinevageiganaka aikiro. Akyatyo otsatimavageiganake tsikyari onkamantaigapaakeri irogamereegi. ⁹ Impo itonkivoaigavakaro Jeso avotsiku iniaigavakero. Iroroegi aiñoniiganakari otigeroaventaiganakarira avinaigakerira itasagiiku. ¹⁰ Irirori ikantaigiro:

—Gara pitsarogaigi. Piaige pinkamantaigakerira nogamereegi iriaigakera Garireaku. Antari anta ario ineraigapakena.

Ikamantaigunkanirajorioegi

¹¹ Iroro oaiganakera ikonogagarantaigaka soraroegi sentaigavetakaririra Jeso ario ikañoigaka iriroegi iaigake Jerosarenku ikamantaigakerira itinkamiegi saseroroteegi magatiro ineageigakerira. ¹² Iriroegi iniavakagaigaka itentaigakarira itinkamiegi jorioegi. Iroro ikemavakagaigakara ipaigakeri tovaini koriki ¹³ ikantaigavakeri:

—Viroegi ontí pinkantaigake: ‘Antari apavatsaanakara naroegi nomagasevageigake impo ipokashitaninkaigakeri irogamereegi yagaigapanutiri.’ ¹⁴ Antari intagarora inkemera Pirato nonkamantagaigakeri nogishineaigaerira ganiri tyara ikantumaigimpi.

¹⁵ Yogari soraroegi yagaiganakerira koriki iaigake itsatagageigakerora ikantaigakeririra. Ario ikañoigakero maganiro jorioegi

kantanakaniroro ovashi maika ikantaigira tera iranianaes Jeso, onti yagaigapanutiri irogamereegi.

Jeso ikantaiganairira irogamereegi inkaman-takoigakerira

(Mr 16.14-18; Ir 24.36-49; Jn 20.19-23)

¹⁶ Impogini maganiro irogamereegi iaigake Garireaku iatantaigaka otishi ikantaigakeririra Jeso tekyara inkame. ¹⁷ Iroro ineaignapaakerira ikantaigi: “¡Inti Atinkami!” Ovashi itigeroaven-taigakari, kantankicha ikonogagarantaigaka iniasurentavageigaka ikantaigake: “Terorokari iriro.”

¹⁸ Kantankicha Jeso yaiñoniiganakari ikantaigiri: —Yogari Tasorintsi ikantakena: ‘Maika viro vinti gaveagetakerone enokupagekutirira ontiri kipatsipagekutirira.’ ¹⁹ Irorotari maika nonkantantaigakemparora piaige pampagiteavageiganakemparora kipatsi pinkenkitsatimoigakerira maganiro matsigenkaegi pinkematsatagaigakerira kameti impegaigakempaniri nogamereegi. Impo pogaviaigakerira kameti iokotagantaigakempaniri arisano ikematsaigakeri Apa Tasorintsi intiri Itomi intiri aikiro Isure. ²⁰ Pogotagaigakerira inkematsaigakenara intsatagaigakerora magatiro nokantaigakemparira. Narori nonkantakani nontentaigakempi omirinka kutagiteri ovashi ontsonkatanaempara kipatsi.

**Iriniane Tasorintsi
New Testament in Machiguenga
(PE:mcb:Machiguenga)**

copyright © 2008 Wycliffe Bible Translators, Inc.

Language: Machiguenga

Translation by: Wycliffe Bible Translators, Inc.

Machiguenga

mcb

Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Machiguenga

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

clxxiii

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

7d5c098e-bb79-57ba-b5df-35eb9f3dce29